

## Aposolo

Alu Aotage Avamu'mo'a amaya hige'ya Aposolo vayala alimainaya ali'yafe Luku'a kaemalene. Luku'a hagoteno Yisasife avona kaemalenegeno Yisasi'a faliteno hetino ikapinaga haitekeno Luku'a foti'a (40) kafu agava maineno mani avona kaemalene. Aposolo vaya'mo'ya (Yisasi kema nehavigeno humatenea vaya'mo'ya) Yisasina kanale ke'a ali'ya alu kote kotega vaya'mogamina mo hamapai-mainae. Pitana ali'yama'a Sapta 1 leti 12 le hane. Polo ali'yamo'a Sapta 13 leti 18 le hanegi hapalika havigo.

*Yisasi'a "Alu Aotage Avamula tamamigahue." huno hulokiya vaino hamapai-mainae.*

<sup>1-2</sup> Tiofilasigae hagote'na kaemalenoa auta'mafina Yisasi'ma aepa heno ali-mainae ali'ya'ene humaveli-mainae kene Anumaya Kotina Alu Aotage Avamu'mo tokiyaleti "Na'a ma'a kava hiho." huno Aposolo vayala\* (agai kema nehavigeno humatenea vayala)\* hamapaiteno ikapinaga haimainae yafe'ene ago kae'na kahapai-mainoe. <sup>3</sup> Yisasi'a tusi'a augafa agataiya alino faliteno hetino Aposolo vaya'mogami amaulagale efalote huno fali-mainefiti'ma hetino mainae yafena havise huno kasago'ya tokiya kava'age humaine. Foti'a (40) yupa mopafina maineno efalote huno amaveliteno amataleno uteno eteno

efalote huno Anumaya Koti'ma kava yagaisia yafena hamapai-maine. <sup>4-5</sup> Amakai'enema mainea kanafina mage huno hamapai-maine “Tamakaya Yelusalemu kumala ataletama o'viho. Nenafa'ma ‘Nago kanoa tamamigahue.’ huno'ma humainea kanoa avaletetama viho. Nagaya ani kanohena ago tamahapai-mainoane. Yoni'a titeti falelamateneanagi tamakaya aupa kana kano'a maisayana Nenafana Alu Aotage Avamu'amoteti falelamategahie.” huno humaine.

*Yisasi'a eteno ikapinaga haimaine.*

<sup>6</sup> Ani yupa Aposolo anaga'mo'ya alitalu hu'ya maine'ya Yisasifena mage hu'ya havinegae “Alatimogae menia ma kanafina Lomu kamani vaya'mogami amayapitila Isaleli vaya'mogati hafaleka kagaika'a kava yagailatesanageno tokiya'age hisifi?” hu'ya havinegae. <sup>7</sup> Havigageno Yisasi'a mage huno hie “Nenafa'a agai'a tokiyaleti ‘Ma kanaene muki'a kanafi'ene ma'a kava hugahue.’ huno huteno yagai-mainegi agayama hisia yana tamakaya havisaya yana omalene. <sup>8</sup> Omalenege Anumaya Kotina Alu Aotage Avamu'amo'ma tamakaite'ma esiana tokiya'a tamamisigetama nagai kea Yelusalemuene muki'a Yutia kotegaene Samelia kotegaene muki'a ma mopamo atupale mainaya vea'nenena nagaifena hamapaigahae.” huno humaine. Yisasi'a ikapinaga haimaine. <sup>9</sup> Mani kea huno ha'no huteno age'ya mainageno mopaleti haino haino haigeno nako sia'mo'a melino aiso hulino avaleno haimaine. <sup>10</sup> Haige'ya amakaya ikapinaga agesaga hu'ya age'ya

maiya anayufi tole kanolatana efe'age kena faili'ana efalote hu'ana amakai'ene anile hetimaina'e. <sup>11</sup> Heti'ana mage hu'ana ha'e "Kalili kumate vea'mogatama na'a higetama hetimainetama ikatela aulula maitama nehae? Yisasi'a tamataleno ikapinaga ago haiyanagi manima ikapinaga haiya avamete huno eteno elavisigetama agegahae." hu'ana hamapai-maina'e.

*Yutasi kuma alisie hu'ya nago kanoa hapalite-nae.*

<sup>12</sup> Amakaya Olivi yosa hanea ago'yaleti tavite'ya aupa'ale lagi'ya vani kilomita vaya'amo'ya Yelusalemua uva'yi humainae. <sup>13</sup> Uva'yi hute'ya nemaiya nona folamo hu'ya ana yapi kimale nopi hai'ya mainae. Hai'ya mainaya vaya'mogami amakia Pita'e Yoni'e Yemesi'e Etalu'e Filipi'e Tomasi'e Patolomiu'e Matiu'e Alafiusi nafa'nea Yemesi'e Saimoni'e kanomona nako agia Seloti'e Yutasi'a Yemesi nafa'nene hai'ya mainae. <sup>14</sup> Ani vaya'ene a'neyagaene Malia'a Yisasina ita'amo'ene Yisasina agana'amo'yaene nagoke amaku amakesale maine'ya muki'a yupa Anumayamotega muse hu'ya nunamu humainae. <sup>15</sup> Ani kanafina Yisasifema havi'ya amakupi male'ya amametiti humainaya veala, vani hataleti tueti'a (120) vea'ne, mainageno Pita'a amakai amu'nopi heti-maineno mage huno humaine. <sup>16</sup> "Nafu'naganagatama Anumaya Kotina Alu Aotage Avamu'amo'a Teviti avayafiti hufalote huno nayona Yutasife humaine. Yisasima atafa hisaya kama amavelisia kanohe, aune laga

humaine. Ani kemo'a ago falote huno tamage humane. <sup>17</sup> Ani kanoa, Yutasi'e, Yisasi'enema tokaeta nemauna anagapi maineno Yisasi kea nehavigeno ali'yatela hutenea kano maine. <sup>18</sup> Ani kanoa, Yutasi'e, kefo yama hia yamo anona'a mone aliteno mopa miya humaleteno ani mopafi ago'ya faigeno aipamo'a aitalaga higeno muki'a aipamo'a helafi lavi-maine. <sup>19</sup> Helafi lavige'ya muki'a Yelusalemuma mainaya vea'mo'ya ani kea havite'ya ani mopamo agia amakai'ami kefina 'Akelatama.' hu'ya humainae. Tagai kefina ani agia 'Kolama lavi-mainea kumale.' hu'ya humainae. <sup>20</sup> Teviti'ma yagamema humainea auta'mafina, Samupina, mage huno kae-maleneane

'Agai'ama nemaiya kumala vaya omaino yu kuma hapaesie.'

huno kae-maleneane. Ani kemo'a nago kaiyaga mage huno humaineane

'Alu kanomo'a agai ali'yatela alisie.' huno humaineane.

<sup>21-22</sup> Ani yafe nago kanomo'ma Yoni'a tima falematenea kanaleti aepa heno Anumayatia Yisasi'ene tagai'enema vaiyatete huno huno egeno'ma Yisasi'a ikapinaga haimainea yupa tagai'enema nemaiya vayapiti nago kanoa Yisasi'ma fali-mainefiti'ma heti-mainea kema hamapaisiafe ani ali'yatela alita hetitesune." huno Pita'a humane. <sup>23</sup> Hige'ya amakaya tole kanolafe "Anakayae." hu'ya hage'ana nago kanoa, Yosefe Pasapasi'e kanomona, nago agia Yasatusi'e, nago kanoa Matiasi'e hu'ya anakia ayemainae. <sup>24-25</sup> Ayete'ya Anumayamotega mage

hu'ya havinegae “Anumayamoga kagaya muki'a vaya'mogami amaku'afina ago age-mainane. Yutasi'ma haiya kava'ma huteno tataleno havi kapi umainea yafe anona'ale alu kanomo'a hetino Aposolo kano maisie huta nehune. Kagaya ani kanolatapitila hana kano ago hapalika hune'atane? Hune'atana kanoa tavelio.” hu'ya havinegae. <sup>26</sup> Nunamuna hute'ya anakia aote yate kaete'ya yopafi malene'ya nagoke avayu hu'ya agayana Matiasi agi avayu hute'ya ani kanoa avale'ya hetitageno Aposolo vayapi maine.

## 2

### *Alu Aotage Avamula amakaite elavi-maine.*

<sup>1</sup> Yisasi'a ago falitege'ya seveni'a (7) sota maite'ya vitimo afulea kanahe muse haya imu kiya kanafina muki'a Yisasi veala nago nopi alitalu hu'ya mainae. <sup>2</sup> Mainageno aupa'a ikapinagati ala age ne'aino ala yasimo'ma huhu huhu nehia kava huno age ne'aino anima mainaya nopina me hiya humaine. <sup>3</sup> Hiya hige'ya agayana atamo anefe kana yamo'a hamaote hamaote amaugafale mo ka'maemaine. <sup>4</sup> Mo ka'mae-mainegeno Alu Aotage Avamu'mo'a eno muki'amogami amakupina me hiya hige'ya amakaya aepa he'ya Alu Aotage Avamu'mo hamapaige'ya amaku amakesafiti nohaviya kea alu ke alu ke humaine. <sup>5</sup> Nehage'ya ani yupa kasago'ya Anumaya Koti kema nehaviya Yuta vaya'yaga muki'a kotegati e'ya Yelusalemu melitalu humaine. <sup>6</sup> Ani vaya'mo'ya ikapinagati'ma ala agegefa aige'ya havite'ya

melitalu hu'ya haviyana ani nopima mainaya vea'mo'ya alu ke alu ke mai'ya nehage'ya alu kotegati'ma emainaya vea'mo'ya mage hae “Nagai ke nehie. Nagai ke nehie.” hu'ya tusi'a amama'yo aimainae. <sup>7-8</sup> Amama'yo ne'ai'ya amakesa havi havi hu'ya mage hae “Mani kema nehaya vaya'mo'ya Kalili vaya mainayanagi hana'a hu'ya tagaiti itatimo'ya nelafa'ya nehageta nehavuna kefitila hageta nehavune. <sup>9-11</sup> Tagaya ma kuma'yagaleti emainone Patia'ene Mitia'ene Elamiene Mesopotemia'ene Yutia'ene Kapatosiene Potusiene Esia'ene Filigia'ene Pamafilia'ene Isipiene Sailinia aupa'ale Lipia kotegati'ene Lomuene Kalitiene Alepia'ene na'a kotegati emainonagi Yuta vaya'ene Yuta vaya'mogami Anumaya Koti'amimo ke havilinaya vaya'ene emainonagi tahaote tahaote ketifiti Anumaya Koti tokiyaleti humainea kavafe tahapai-mainae.” hu'ya hae. <sup>12-13</sup> Hage'ya muki'a vea'mo'ya tusi'a amama'yo ne'ai'ya tusi'a amakesa nehavi'ya nago'a vea'mo'ya mage hu'ya hae “Ani kava'mona aepa'a na'ane?” hu'ya hayanagi nago'a vea'mo'ya havigu ke nehu'ya mage hae “Amakaya havilina vaini nofi alagamo tima'a nete'ya aneginagi nehae.” hu'ya humainae.

*Pita'a ke huhaleno humaine.*

<sup>14</sup> Pita'a aleveni'a (11) Aposolo vaya'ene heti-maineno ala kefiti mage huno humaine Yuta nafu'naganagatamaene Yelusalemuma mainaya vea'nene nago ke tamahapaigahugi haviho. <sup>15</sup> Tamakaya tamakesa haviyana mani

vea'mo'ya havilina vaini li ne'ya aneginagi nehae hutama nehafi? A'ao menia natekefa naeni kiloki nehigi havilina onenae. <sup>16</sup> Onenagi menima agaya yafena nayona Anumaya Koti aune kanomo'a Yoeli'ma humainea kemo'a mage huno humaineane.

<sup>17</sup> Anumaya Koti'a mage huno humaine “Mani kanamo'a aupa'ama ha'no hugahema hisia kanafina nagaya Alu Aotage Avamu'nimona muki'a vea'nemogamina amamigahue. Amamisuge'ya tamakai nafa'nemo'ene muna'nemo'ene Anumayamo avayafiti hamapai-mainea kea hisage'ya neya'vetamimo'ya himona kana ya'yaga feluga ne'agesage'ya kosunatamimo'ya himona agegahae. <sup>18</sup> He, nagaya Alu Aotage Avamula ali'ya vea'nimogamina vene a'nene amamisuge'ya Anumayamo avayafiti'ma hamapai-mainea kea tamahapaigahae. <sup>19</sup> Nagaya ikate'ene ma mopafi'ene tokiya avame'yama hisua yana kola'ene ataene halinaene tamaveligahue. <sup>20</sup> Tamavelitesugeno yagemo'a ayesu hinageno ika'mo'a kolama'age hisigeno Anumayamo'ma esia kanafina tusi'a tokiya'aene hale yama'aene efalote hugahie. <sup>21</sup> Efalote'ma hinage'ya muki'a vea'mo'ya Anumayamo agi ne'aye'ya ‘Kalagi ailato.’ hu'ya nehisageno Anumaya Koti'a amaku amamena aligatigahie.” huno kae-maleneane.

<sup>22</sup> Isaleli vaya'mogatama nago kea tamaha-

paigahugi haviho “Nasaleti Yisasi'e, Anumaya Kotitegati emainea kano maine.” hutama havisaya yafe Anumaya Koti'a aya higeno tusi'a tokiya avame yana tamakaipina ago ali falote higetama age-mainae. <sup>23</sup> Agayanagi Anumaya Koti'a nayona havino “Na'a ma'a hugahue.” huno ha'ya kimaleteno tamayapi ategetama Anumaya Koti'a hutenea kava hutama ani kanoa, Yisasina, kefo vaya'ene yafaga yosalela nilia hetama asaitetama hayageno fali-maine. <sup>24</sup> Falimaineanagi falimainea yamo'a atafa huno atakalo ohune. Anumaya Koti'a anima agata yama alino falimainea yapitila kalu heno ali hetitene. <sup>25</sup> Nayona Teviti'a Yisasi'ma falimainesifiti'ma alino heti-tesia yafena mage huno humaineane

“Muki'a kanafina Anumayani'amo'a nagai'ene maineno tamaga nayategama mainea yafena kolia ohugahue. <sup>26</sup> Nagai'enema nemaiya yafena nagu nafa'nemo'a tusi'a muse nehige'na agia alisaga nehue. Yoka falite'na hetigahue hu'na nametititia nehue. <sup>27</sup> Anumaya Kotigae ‘Alu aotage kanoe.’ huka hunatenana kanonomia naugafa kasalisia yafe fali-mainaya vea'ne mainaya kumatela natalesanage'na o'visua yafe nametititia nehue. <sup>28</sup> Kagaya agola maige maige hisua kana ago navelinage'na age-mainoafe kagai'enema maisua yafena aluya hu'na musena hugahue.” Teviti mani kea humaineane.

<sup>29</sup> Pita'a nago'ene mage hie “Nenafugatama hufalote hu'na tamahapaisue taginagomo'a



Teviti'a ago falige'ya hevaitenae. Hevaitenaya komua tagai amu'nopi hanegi akai'ahe mani kea ohuneane. <sup>30-31</sup> Ohunegi Anumaya Koti'a agai'fe mage huno hulokiya vaino kea humaineane 'Kagai kaginagomopiti nago kanomo'a hetino eteno kagai kumate vea'nea kava yagaimategahie.' huno humaineane. Humaineanagi Teviti'a Anumaya Koti aune kano maineanagino Kalaisi'a, Anumaya Koti'ma taugafa aligatigahe hutenea kanoa, fali-mainefiti hetigahie huno aune laga huno mage huno humaine. Kalaisife 'Augafa'a kasalisia yafe fali-mainaya vea'ne nemaiya kumatela o'ategane.' huno humaineane. <sup>32</sup> Ani kanoa, Yisasina, Anumaya Koti'a fali-mainefiti eteno ago alino hetitegeta age-mainona yafe tamahanepaune. <sup>33</sup> Anumaya Koti'a ali hetiteno avalesaga huno agai'a tamaga aya kaiyaga'a uhagote mainaya vaya mainalega ateteno 'Tamamigahue.' huno'ma humainea kanoa, Alu Aotage Avamu'a, amigeno aliteno Yisasi'a ani Alu Aotage Avamula eteno lamigeta mani kavala hunagetama ne'agae. <sup>34-35</sup> Teviti'a mage huno humaineane Anumaya Koti'a Anumayani'amofena mage huno humaine 'Tamaga nayatega uhagote mainaya vaya mainalega mopale emainesanage'na kame vayaka'a kaiyafi amatesuge'ya ani kame vaya'mo'ya kagaifena ago tagasane.' hu'ya hugahae." huno humaineane.

*Teviti'a Yisasi'ma humainea kava huno ikapinaga haino omainegi mani kea agai'ahena ohunegi Kalaisife humaineane.*

<sup>36</sup> “Ani yafe Isaleli vaya'mogata havilama huta havisune. Ani Yisasina tamakayama yafaga yosalela nilia hetama asai-malenaya kanomofe Anumaya Koti'a mage huno humaine ‘Ani kanomo'a Anumaya maineanagi nagaya hutogeno emainea kano maine.’ huno humaine.” huno nehie. Kasago'ya ve a'mo'ya amaku'a aiyahae hage'ya tina falematenae. <sup>37</sup> Pita'ma hia kemo'a amakupi ayege'ya havite'ya Pita'ene nago'a Aposolo vaya'enefe mage hu'ya hae “Nelafugatama menia hana'a hisune?” hu'ya hae. <sup>38</sup> Hageno Pita'a mage huno hie “Tamakaya muki'amogatama tamaku'a aiyahae hutama egeta Yisasi Kalaisi agile tina falelamatano. Ani'ama hisageno'a Anumaya Koti'a aigetamateno kefo yatamia atalelamateno Alu Aotage Avamula tamamigahie. <sup>39</sup> ‘Tamamigahue.’ huno humainea kea tamakaife nehigi tamakayaene nafa'netamiene Yuta vea omainaya vea'nenefe mani kea huno muki'a Anumaya Koti'a kema humatesia vea'mogamife ‘Tamamigahue.’ humaineane.” huno Pita mani kea humaine. <sup>40</sup> Pita'a mani kea nehuno alu ke alu ke huno kana'ye kana'ye huno mage huno hie “Meni kanafima mainaya vea'mo'ya tusi'a kefo kava mai'ya nehagi havigu tamakaya kefo kava huyafenagi atalegeno Anumaya Koti'a tamaku tamamena aligatino.” huno humaine. <sup>41</sup> Hige'ya nago'a vea'mo'ya tali tauseni'a (3,000) vea'mo'ya mani kea havite'ya ali'ya amakupi male'ya amametiti hage'ya ani yupa lina falematenae. Yisasife amakupi nemalaya vea'mo'ya tokae'ya kanale kava nehae. <sup>42</sup> Lina falematage'ya

amakaya muki'a yupa nago amaku amakesa havi'ya Aposolo vaya'mogami kea havi'ya hame'ya maya kofa hu'ya nete nete nehu'ya Anumayamotega muse hu'ya nunamuna nehae. <sup>43</sup> Nehage'ya muki'a vea'mo'ya tusi'a amama'yo ne'aige'ya Aposolo vaya'mo'ya kasago'ya tokiya avame yana nehae. <sup>44</sup> Muki'a Yisasi kema havi'ya amakupi male'ya amametitima humainaya vea'mo'ya nagoke amaku amakesa havi'ya muki'a ya'yaga'amihena “Nagai'nige yane.” hu'ya ohunagi “Muki'a yana lagaiti ya hane.” hu'ya nehae. <sup>45</sup> Mopaene afeno'ya'amienema hanea vea'mo'ya atalageno alu kanomo'a miya hige'ya monea alite'ya fako hute hute hu'ya kave'amima omalenea veala amaminae. <sup>46-47</sup> Muki'a kanafina nagoke amaku amakesa havi'ya ala mono nopina ne'u'ya alu nopina alu nopina u'ya hame'ya maya kofa hu'ya kave'ene nete nete nehu'ya muse hu'ya Anumaya Koti agia alisaga nehage'ya muki'a vea'nemo'ya agete'ya “Kanale kava nehae.” hu'ya nehageno Anumayamo'a nago kanafina nago kanafina nago'a vea'nea amaku amamena aligatiteno “Nagai ke nehaviya vea'ene maiho.” huno humatene.

### 3

*Pita'ene Yoni'ene nago aiya haviya humainea kanomona ali'ana kanale hutena'e.*

<sup>1</sup> Nago yupa une kanalega tali (3) kiloki Pita'ene Yoni'ene nunamu hisaya kanamo'a aupa hige'ana ala mono notega umaina'e.

<sup>2</sup> Ne'va'age'ya vaya'mo'ya nagola kali kanoa,

atenelegati aiyamo'a haviya humainea kanoa, avale'ya emainae. Muki'a kanafina anima aiyama haviya humainea kanomo'a ala mono nomo fiate mopale nemaiyane. Ani fiamo agia koganali fiane hu'ya agia ne'ayaya fiate maineno ala mono nopima vaya veafena “Monea namiho.” huno ayana ha'ya hulineno auka'ya nehia kanoe. <sup>3</sup> Ani kanomo'a ageana Pita'ene Yoni'ene ala mono nopi haigahe neha'ageno “Monea namitetanao.” huno auka'ya hunatene. <sup>4</sup> Hunatege'ana Pita'ene Yoni'ene tokiya'age aulu hemaine'ana Pita'a mage hie “Ta'agaila ta'ago.” huno humaine. <sup>5-7</sup> Higeno ani kanomo'a “Nago ya namigahe neha'e.” huno anakaila anakeke huno anake-mainegeno Pita'a mage huno hie “Mone'ni'a omalegi nagaipima hanea yana kamigahue Nasaleti Yisasi Kalaisi agile kahanepauve hetika ute ete huo.” huno nehuno tamaga ayate alino hetitegeno aup'a aiyamo'ene ale'yamo'ene kanale hutegeni tokiya hau-maini. <sup>8</sup> Tokiya'age hautegeni hetino ute ete nehuno anakai'ene ala mono nopinaga nehaino haite asaga hulavite nehuno Anumaya Koti agia alisaga hume hume nehaiye. <sup>9-10</sup> Anumaya Koti agia alisaga huno haige'ya muki'a vea'mo'ya agayana hige'ya “Vae mani kanoa muki'a yupa ala mono nomona koganali fiate maineno auka'ya nehia kanogi.” hu'ya nehu'ya alino kanale'ma hutenea yafena tusi'a amama'yo aimainae.

*Pita'a ala mono nopi maineno Yisasi kea hufalote humaine.*

11 Ve'a'mo'ya amama'yo ne'aigeno ani kanomo'a Pita'ene Yoni'ene anatafa huno ananukige'ya muki'a ve'a'mo'ya ala mono nomo haupale yasi alisia ya ayekalo humalenea nomo, agia Solomoni none hu'ya nehaya yate, amakaitega umainae. 12 Vageno Pita'a ageteno mage huno humaine "Isaleli kumate vaya'mogatama na'a higetama atali talua nehae? Ta'agaya ta'agaiti'a tokiyaleti'ene fatago humaino'a au'ava yateti'ene ani kanoa alita'a kanale huto'ageno ute ete nehie hutama ta'agaila ta'agene'asagalifi? 13 A'ao. Taginagomogami Anumaya Koti'a, Apalahamu'ene Aisaki'ene Yekopuene Anumaya Koti'amimo'a, agai'a ali'ya kano'amona, Yisasi, tokiya hale ya amigahe ani kanomona alino kanale hutenegei tamakaya ani Yisasina avaletama kame vaya'mogami amayapi atageno Pailati'a Yisasife 'Afa'a atalegahue.' huno nehiana tamakaya Pailati aulagafi 'Tagai kava kanoa omaigi agaya falisie.' hutama tamakave'no hutena. 14-15 Alu aotage kanoa fatago kava'age nehia kanomona tamakave'no hune'atetama vaya'ma hamaeno fali ne'amatea kanohe 'Atalegeno eno.' hutetama muki'a ve'a'mogami hamaimu'mona aepa'a mainea kanomona hayageno falianagi Anumaya Koti'a fali-mainefiti alino hetitegeta'a ago ageteta'a mani kea tamahanepau'e. 16 'Yisasi'a kanale hula'atesia tokiya hane.' huta'a ta'agupi maleno'a yafe manima ne'agaya kanomona ago kanale hutetegeni aiyamo'a tokiya vaimaine. 'Yisasi'a kanale hutesia tokiya'a hane.' huta'a ta'agupi maleno'a yateti tamakai tamaulagafi ago

kanale hutegeno kanale huno maine. <sup>17</sup> Tamage nenafugatama nagaya havuana tamakai kava vayatamimo'yaene Yisasi'ma emainea aepa'aene havilama ohunetama Yisasina hae-mainae. <sup>18</sup> Hae-mainaya yafe Anumaya Koti aune vayamogami amavayafiti'ma humainaya kea mage humainayane 'Nagaya tamaugafa aligatigahe hutenoa kanomo'a tusi'a agataya aliteno faligahie.' hu'ya humainaya kemo'a efalote huno tamage humaine. <sup>19</sup> Ani yafe kefo yatamia ne'ataletama tamaku'a aiyahae hisageno Anumaya Koti'a kefo yatamia aye ha'mi-talegahie. <sup>20</sup> Aye ha'miteno agai'alegati kanale'ma humatesia yana nelamamino Yisasina tamakaifema tamaugafa aligatigahie huno hutenea kanoa eteno tamakaitega hutenageno egahie. <sup>21</sup> Hutegahianagi meni kanafina Yisasi'a ikapinaga maineno Anumaya Koti'ma muki'a yana eteno haegafa yama'age talo hisia yafe agava-maine. Muki'a Anumaya Koti'ma nayoma mainaya amaune vaya'mo'ya humainaya kemo'a efalote huno tamage humaineafe Yisasi'a eteno egahie. <sup>22</sup> Mosese'a mage huno kaemaleneane 'Anumaya Koti'a tamakaipiti nagola aune laga hisia kanoa nagayama hua'ya huno hisia kanoa ali hetitegahie. Hetitetenageno'ma agayama hisia kea haviho. <sup>23</sup> Ani aune kanomo kema ohavisaya vea'mogamina Anumaya Koti'a hamaeno fali ha'no hinage'ya Isaleli veapina omaigahae.' huno humaineane. <sup>24</sup> Muki'a Anumaya Koti amaune vaya'mo'ya Samueli'ene agai akavelegati'ma falote humainaya amaune vaya'yagaene menima mainona kanahe havi'ya

kae-malenayane. <sup>25</sup> Tamakaya Anumaya Koti amaune laga nehaya vaya'mogami amakinagomogatama mainae. Anumaya Koti'ma Apalahamufe hulokiya vaino alino hagelafi lamatenea kea\* huno tamakai'enefe mani kea humaine. Anima hulokiya vaimalenea kemo'a mage huno humaineane 'Nago tamakinagomo'a esiana muki'a ma mopafi vea'mogamina kanale manua amamigahie.' huno humaineane. <sup>26</sup> Muki'a manima humainaya kemo'a falote huno tamage hisia yafe Anumaya Koti'a agai'a ali'ya nafa'ne'amona alino hetitegetama tamakaya kefo yatamihe tamaku'a aiyahae hisageno tamaya huno kanale manua tamamisia yafe hagoteno tamakaitela hutegenon emaine." Pita'a mage huno humaine.

## 4

### *Pitagani Yoniganina kina hunatenae.*

<sup>1-2</sup> Pitagani Yonigani yaufa mani kea hama-nepai'age'ya mono note kava vaya'ene mono note ati kava kanoene nago'a Satiusi vaya'ene e'ya menakayana anakayama "Yisasi'ma fali-mainefitila ago ali hetiteneanagino muki'a vea'nea ani'a hu'ya fali-mainesafitila ete'ya hetigahae." hu'ana hamapai'a yafe amaipa haviya nehae. <sup>3</sup> Amaipa haviya hute'ya anatafa hagi "Ago une kianagita ega kaiyekea hunategahune." hu'ya kina nopi anavale'ya monatenae. <sup>4</sup> Monatayanagi kasago'ya vea'nemo'ya anakai kea havite'ya amakupi male'ya amametiti nehae. Faefu tauseni'a (5,000)

vea'mo'ya Yisasi'ma hulatenea yafena havi'ya amakupi male'ya amametitia nehae.

*Pitagani Yoniganina kanisole vayate kaiyeke hunatena.*

<sup>5-6</sup> Faete'ya ko'ma neliana kava vaya'ene vayatamaene kahegi kema havilinaya anaga'ene Anasi'a ala mono note hagote kava kanomo'ene agai'a anaga'ene Kaiyafasi'ene Yoni'ene Alekasata'ene muki'amo'ya Yelusalemu alitalu humainae. <sup>7</sup> Alitalu hute'ya ani kanolatana anavale'ya amaufi hetinatene'ya mage hu'ya hanavigae “Tanakaya hana'a agimo tokiyaleti mani kavala humaina'e?” hu'ya hanavigae. <sup>8</sup> Hana-vigageno Alu Aotage Avamu'mo'a Pitana agupina hiya higeno mage huno humaine Kava vaya'mogatamaene vayatamaene haviho. <sup>9</sup> Mani aiyamo'a haviya humainea kanomona ali falu hutetana alitana kanale hutena'e kea havisune hutama kaiyekea hula'atetama na yateti mani kava neha'e hutama ta'ahavi-negapi? <sup>10</sup> Ta'a-havigayanagi muki'amogatamaene muki'a Isaleli vea'mo'yaene haviho. Nasaleti Yisasi Kalaisi agimo'a manima tamaufima heti-mainea kanomona alino kanale hutene. Ani Yisasina tamakaya yafaga yosale nilia hetama asaigeno fali-maineanagi Anumaya Koti'a fali-mainefiti ago ali hetitene. <sup>11</sup> Anumaya Koti kemo'a auta'mafina mage huno humaine “Tamakaya yafa noma kiyana nago yafafena ‘Haviya hie.’ hutama atalayanagi menia ani yafamo'a tusi'a kanale yafane nomo ayetagenale ago malena.” huno humaineane.



Ani yafana Yisasife humaine. <sup>12</sup> Ani kanomo'a agai'age tagu tamena aligatigahie. Muki'a mopafi veapitila nago kanomo agileti tagu tamena aliokatigahigi Yisasina agai'age agileti tagu tamena aligatigahie huno humaine. <sup>13</sup> Pitagani Yonigania tokiya'age ke ha'age'ya havite'ya mage hae “Vae mani kanolatana afa kanolata maine'ana avo nopina o'una'a kanolanagi hana'a hu'ana tusi'a kanale kea neha'e?” hu'ya amakesa havi havi nehu'ya “Vae mani kanolatana Yisasi'ene nemai'a kanolatane.” hu'ya humainae. <sup>14</sup> Hayanagi ali'ana kanale'ma hutena'a kanoa anakai'ene heti-mainege'ya agaya yafe nago'a havige havagea huo'anatenae. <sup>15</sup> “Kanisole vaya nopitila ataletana vi'o.” hu'ya hunatete'ya amakai'amifi kea huge havige humainae. <sup>16</sup> Mage hu'ya hae “Ani tole kanolatana hana'a hunatesune? Mama tokiya avame yana ha'age'ya muki'a Yelusalemu nemaiya vea'mo'ya ago age-mainagi hana'a huta ali fala-kisune? <sup>17</sup> Havigu mani kemo'a alu kote kotega ute ete huyafenagi aluya huta ‘Nago'ene mani agia o'aye'o.’ huta kahegi-natesune.” hu'ya humainae. <sup>18</sup> Anakai'efe ke hage'ana a'age'ya mage hu'ya anaumonola malenae “Yisasifena nago'ene vea'mogamina hamapaitana humaveoti'o.” hu'ya hae. <sup>19</sup> Hage'ana Pita'ene Yoni'ene kenona'amia mage ha'e “Na tamakesa nehaviye Anumaya Koti aulagafi maino'agi ta kele akavela malesu'e? Tamakai kelep'i Anumaya Koti kelele hutama nehafi na tamakesa nehaviye? Tamakaitami fako hutama haviho.

20 Ta'agaya Yisasi'ma humainea kavala ageta'a havimaino'a kava'yaga fala okigahu'e." hu'ana neha'e. 21 Ha'age'ya anaikolisaya amakesa haviyanagi muki'a vea'mo'ya humaina'a kavala agete'ya Anumaya Koti agi alisaga nehage'ya mage hae "Anaiko-lisunana vea'mo'ya kelama-kigahae." hu'ya nago'ene anaumonola malete'ya anatalage'ana umaina'e. 22 Anima aiyama haviya humainea kanoma ali'ana kanale hutena'a kanomona kafu'a foti'a (40) kafu humainea kanogi'ya Anumaya Koti agi alisaga humainae. Yisasife amakupi malenaya vea'mo'ya tokiya vai'ya Yisasi kema hufalote hisaya yafe Anumayamotega havige-mainae. 23 Anatalage'ana anaga'animo'ya mainalega ute'ana muki'a ala mono note ala kava vaya'yagaene vayatamaene hanapaiya kea mo hamapai-maina'e. 24 Mo hamapai'age'ya havite'ya nagoke amakesa havi'ya Anumayamotega ke hu'ya mage hu'ya havige-mainae "Kava yagai Anumayatimogae mopaene ika'ene hage li'ene muki'a anifima hanea ya'yagaene talo humalenana kanomogae. 25-26 Kagaya kagai ali'ya kanoa, tototimo'a Teviti'ma avayafiti Alu Aotage Avamukaletila mage huka humainanane

'Na'a hige'ya Isaleli nofi'ma omainaya vea'mo'ya 'Anumaya Koti'ene tu hugahune.' hu'ya havigu ke hu'ya amaipa kafa hemainae? Ma mopafi kava vaya'ene vayatamaene Anumayamofe'ene agai'a tagu tamema'a aligatigahe hutenea kanomofe'ene amaipa haviya nehu'ya kea ne'vaiye?' huno hu-

maineane.

<sup>27</sup> Mamona kelamage. Mani kumate alu aotage ali'ya kanoka'a kagaika'a taugafa aligatihahema hutenana kanomona kame hutesaya yafe Heloti'ene Potiasi Pailati'ene Yuta vea omainaya vaya'yagaene Isaleli vaya'ene alitalu hu'ya mainae. <sup>28</sup> Kagayama nayoma huka 'Na'a ma'a hugahae.' hukama havi-mainana kagesa ani'a hugahe alitalu humainae. <sup>29</sup> Menia Anumayatimoga manima tagaifema hamae vainelate'ya hu kolima latesaya kema haya kea nehavika taha'mao. Tagaya kagai ali'ya vaya mainonagi kagaya taha'maegeta kolia ohuta kagai kea tokiya'age huta hampaisune huta kahavinegone. <sup>30</sup> Kayana maleka kali veala alika kanale hune'amateka kagaika'a alu aotage nafa'nekamo agile tokiya avame yama hisuna tokiyaka'a lamio." hu'ya Anumayamotega havinegae. <sup>31</sup> Havigageno Anumaya Koti'a amakayama mainaya nona alino kosi kosi hutegenno Alu Aotage Avamu'mo'a amakupina me hiya humainege'ya Anumaya Koti kema tokiya'age hu'ya hamapaisaya yafena kolia ohunae. Muki'a Yisasina amaku'ama aminaya vea'mo'ya nagoke amaipale maine'ya amaipa o'ami a'ami hu'ya mainae. <sup>32</sup> Muki'a Yisasi kema havi'ya amaku'ama aminaya vea'mo'ya nagoke amaku amakesale maine'ya nago kanomo'a agai'age yafena ageteno "Nagai'nige yane." huno ohunegi "Muki'a yana tagaiti yama'age hane." hu'ya humainae. <sup>33</sup> Hageno tusi'a tokiya'a amamige'ya Aposolo vaya'mo'ya "Yisasi'a fali-mainefitila ago heti-maine." hu'ya hamane-

paigeno Anumaya Koti'a kayone hisaya yana ne'amamino amaya humaine. <sup>34-35</sup> Amaya hige'ya amakai amu'no'amifina kavefena kafua ohu vea'ne maine'ya mopa'amia hanea vea'nene no'amia hanea vea'nene "Alu kanomo miya hisie." hu'ya hage'ya monea amamige'ya ali'ya Aposolo vaya'mogamina momamige'ya kave'amima omalenea vea'mogamina amaya hu'ya amamite amamite humainae. <sup>36-37</sup> Nago kanoa Yosefe'e, nago agia Aposolo vaya'mo'ya mage hu'ya malenae Panapasi'e hu'ya malenae. Ani agimo'a tagai kefina mage hie "Amaipa falu hisia ke nehia kanoe." Ani kanomo'a Livai nofi kano maine. Saipalusi kumateti kanomo'a agai'a mopa alu kano amigeno monea eteno amigeno ani monea alino Aposolo vaya me ne'amamiane.

## 5

*Ananaiyasigani Safailagania Anumaya Koti au-  
fina havige humaina'e.*

<sup>1</sup> Nago kanoa Ananaiyasi'e a'amo agia Safaila'e ani alavelatamogania nago mopa'ania alu kano ne'ami'ana mone ali-maina'e. <sup>2</sup> Alite'ana Ananaiyasi'a kesi nago'a monea agai'a alino fala-kigeno a'amo'a anima alia monea ago age-maine. Ananaiyasi'a nago'a monea alino Aposolo vaya momamine. <sup>3</sup> Amamianagi Pita'a agaifena mage hie "Ananaiyasigae Satani'a\* kefo kagu kagesa kamige'ka kagaya 'Muki'a monea mama hane.' huka nehanagi nago'a monea ali fala-negika Alu Aotage Avamu'mofena havige huka ayevataga nehane. <sup>4</sup> Mani mopa kagaika mopagika 'Alu kanomo alisie.' huka monea ne'alika ani'a huka

kagaika monegi na'a higeka 'Havigea hu'na ayevataga hugahue.' huka kagu kagesafinaga nehane? Vaya'mona ayevataga ohunanagi Anumaya Koti ayevataga humainane.” huno nehie. <sup>5-6</sup> Higeno Ananaiyasi'a ani kea haviteno ailakatino fali-maine. Falige'ya neya'vemo'ya nago kena moli'ya ha'ya kitete'ya ali'ya komufi mo hevaitenae. Hevaitetage'ya ani kanoma fali-mainea kea muki'a vea'mo'ya havite'ya tusi'a lagi tagi'ya amake-mainae. <sup>7-8</sup> Haenaga'a tali'a (3) aova ha'noma nehiana a'amo'a ani fali-mainea kea ohavino egeno Pita'a agaife mage hie “Manima hanea monea mopaletila hai ani kano'a ali-maina'o?” huno higeno “Tamage ani kano'a al-imaino'e.” huno humaine. <sup>9</sup> Higeno Pita'a mage huno hie “Na'a higetana tanakaya tokaetana kea hutetana 'Alu Aotage Avamu'mona ayevataga hugahu'e.' hutana ha'ane? Agego anaukamoma ago'ma ali'ya mo hevaitaya vayala ete'ya fiate me heti-maine'ya kagai'enena falisanage'ya ali'ya mo hevaigategahae.” huno humaine. <sup>10</sup> Nehigeno aupa'a ani a'mo'a Pita aiyafi ailakatino ago'ya faiteno falige'ya neya'veyagamo'ya hai'ya mogayana ani ala ago fali-mainege'ya moli'ya anau'amoma hevaitale mo lokae'ya hevainatenae. <sup>11</sup> Hevainatage'ya Yisasina amaku'ama aminaya vea'ene muki'a ani kema haviya vea'mo'yaene tusi'a lagitagiyaya amake-maine.

*Tokiya avame ya'yaga alu ya alu ya humainae.*

<sup>12</sup> Aposolo vaya'mo'ya muki'a vea amu'nopi kasago'ya tokiya avame ya'yaga hage'ya age-

mainae. Agete'ya Yisasina amaku'ama aminaya vea'mo'ya nagoke amaku amakesale maine'ya ala mono nomo haupale yasi alisia ya ayekalo humalenea nomo agia Solomoni none ani nopi muki'a kanafina molitalu humai humai nehayane. <sup>13-14</sup> Nehage'ya nago'a vea'mo'ya kolima haya yafe amakai'enena mo lokae'ya uomainagi ani vea'mogami amaki alisaga humainae. Muki'a vea'mo'ya Yisasi kema havi'ya amakupi male'ya amametitia hute'ya amakai'ene mainae. <sup>15</sup> Tokiya avame'yama humainea yafe muki'a kalima hamaeya veala amavale'ya kate amate'ya hagifanale maine'ya mage hae “Pita'ma esiana agai amemo me halatu hamaesigeno kanale humategahie.” hu'ya kate momatenae. <sup>16</sup> Amatage'ya muki'a vea'mo'ya Yelusalemu aupate'ma hanea kuma'yagaleti kalima hamaeya vea'nene Satani avamu'mo'ma amakupi fale-mainea vea'nene amavale'ya ageno muki'a ago alino kanale humatene.

*Aposolo vayala amavale'ya kina nopi amatenageno ensole kanomo'a memavaleno kumatega amatene.*

<sup>17-18</sup> Mono note'ma hagote kava kanomo'ene agai'enema lokae'ya mainaya vaya'ene Satiusi vaya'mo'yaene amaipa haviya humatete'ya Aposolo vayala amatafa hu'ya amavale'ya kina nopi momatenae. <sup>19-20</sup> Amatenageno ani kegela Anumayamo ensole kanomo'a eno fita me yakino anifiti amavaleno kumatega ne'uno mage huno hie “Tamakaya utama ala mono nopi hetitama vea'mo'yama haegafa hu'ya agola maige maige

hisaya hamaimula alisaya kea hamapaiho” huno humaine. <sup>21</sup> Hige'ya havite'ya natekefafi het'iya u'ya ala mono nopi vea'mogamina mo hamanepaiye. Hamanepaigeno ala mono note hagote kava kanomo'ene agai'enema lokae'ya nemaiya vaya'ene ani kea ohavi'ya ne'atale'ya Kanisole vayafe'ene Isaleli nofi vayatamaenefe moge hage'ya ageno ati vayafe “Kinama humatenona vayala momavaletama eho.” hu'ya hamapaimainae. <sup>22-23</sup> Me hage'ya ati vayala kina nopi mogayana omaige'ya ne'atale'ya ete'ya mage mo hae “Tagaya mogonana fita tokiya'age alokileti hemalene'ya vayala kava yagai'ya kumate hetimainageta fita mo yakiteta kina nopima mogonana omainae.” hu'ya me humainae. <sup>24</sup> Mehage'ya ala mono note kava vaya'yagaene mono note ati kava kanoene mani kea havite'ya tusi'a amakesa havi havi hu'ya mage hae “Hana'a hu'ya kina nopitila fanane humainae? Hana'a humainea ya falote hugahie.” hu'ya hae. <sup>25</sup> Hageno nago kanomo'a mage huno me hamapaiye “Haviho kina nopima amataya vayala ala mono nopi het'iya maine'ya vea'mogamina humave-neliye.” huno me hie. <sup>26</sup> Me hige'ya mono note ati kava kanomo'ene ati vaya'aene u'ya “Havigu amakai kema havimainesaya vea'mo'ya yafateti tahaesageta falisunagi.” hu'ya amaikooti'ya ako hu'ya amavale'ya emainae.

*Aposolo vaya'mo'ya kolia ohu'ya kanisole vaya'mogami amaufina kea hufalote humainae.*

<sup>27</sup> Amavale'ya aya'amo'ya Kanisole vaya amu'nopi me hetimatetageno ala mono note hagote kava kanomo'a mage huno hie. <sup>28</sup> “Tagaya Yisasife nago'ene vea'mogamina hamapaitama humaveotiho” huta tamakaila tamaumonola ago malonanagi tamakaya muki'a Yelusalemu nemaiya vea'mogamina mani kea hamapaitama tagaifena ‘Ago Yisasina hae-malenaya vaya mainae.’ hutama hamapai-mainae.” huno hie. <sup>29</sup> Hianagi Pita'a nago'a Aposolo vaya'ene mage hu'ya nehae “Ma mopafi vaya'mogami kemona akave omalegahunagi tagaya Anumaya Koti kemo akave malegahune. <sup>30</sup> Tamakaya Yisasina nagoke yafaga yosale asai-malageno fali-maineanagi Tototimo Anumaya Koti'a fali-mainefiti ago ali hetitene. <sup>31</sup> Ali hetiteno avalesaga huno tamaga ayatega ategeno hagote kava kanoa tagu tamema aligatimainea kanoene mainea yafe tagaya Isaleli vea'mogata tagu'a aiyahae hisuna tagesa tamisigeta tagu'a aiyahae hisunageno aigetateno kefo yatia atalelategahie. <sup>32</sup> Tagaya mani kea hisuna vaya mainonageno Alu Aotage Avamu'mo'a ani'a huno mani kea humaine. Muki'a Anumaya Koti kema akave malenaya vea'mogamina Anumaya Koti'a Alu Aotage Avamula ago amamine.” huno hie. Kamalieli'a kanisole vaya'mofe mage huno hie “Aposolo vaya'mogamina ako hutama amateho.” huno humaine. <sup>33</sup> Hage'yama mani kema haviya yafe amaipa amakata ai'ya Aposolo vayala hamaesage'ya falisaya amakesa nehaviye. <sup>34</sup> Hamaegahayanagi nagola Falasia kanomo agia Kamalieli'e\* mono humave-nelia kanogino Yuta



vaya'mogami Kanisolefi mainege'ya muki'a vea'mo'ya agima alisaga nehaya kanogino ani kanomo'a hetino mage huno hie “Tahaote kea hugahunagi Aposolo vayala humatege'ya kumatega hati-lavisageta kea hisune.” huno hie. <sup>35</sup> Hige'ya hati-lavi'ya vageno mage huno Kanisole vaya'mogamife hie “Isaleli vaya'nimogatama mani vaya'mogamina nago yama humategahunema hinutama tamakesa havilama hutetama ani'a hiho. <sup>36</sup> Nayona nago kanomo agia Teutasi'e eva'yi huno ‘Nagaya tokiya'ni'a hanea kano mainoe.’ huno hige'ya fo hataleti'a (400) vaya'mo'ya akavela vayanagi kamani kava vayatimo'ya ago hayageno falige'ya akave'ma ne'vaya vayala atagufe'ya ute ete hageno ali'yama'amo'a afa ya kana humaine. <sup>37</sup> Agai akavelega amakima negayaya kanafina Yutasi'e Kalili kanomo'a eva'yi huno kea hamapaige'ya nago'a vayala akave ne'vageno kava vayatimo'ya Yutasina ago hayageno falige'ya akave'ma ne'vaya vayala atagufe'ya ute ete humainae. <sup>38-39</sup> Na'a humainaya yafe menia tamahapauve mani vayala amatalege'ya viho. Anima nehaya kea amakai'ami mopale vaya'mogami kema hanesigeno'a afa'a ha'no hugahianagi Anumaya Koti kema hanesigetama tamakayama ali haviyama hisaya amukotamia omalene. Havigu lamakaya Anumaya Kotina kame hutetama agai'ene tu hutesagi.” huno humaine. <sup>40</sup> Hige'ya Kamalieli ke havi'ya “Tamage hane.” hute'ya Aposolo vayafe ke hage'ya age'ya nofi ka'yoteti haifu amamite'ya amaumono nemale'ya mage hae “Yisasifena

nago'ene vea'mogamina hamaopaiho.” hu'ya humatete'ya amatalage'ya umainae. <sup>41</sup> Ani Kanisole vayala amatale'ya ne'u'ya “Anumaya Koti'a ago tamatea kava nehae.” huno tagaifena nehuno “Yisasi agima ne'ayaya yafe tamakaye hisifa kavala hisagetama amukotamia hanegahie.” huno humainea yafe tusi'a muse hume hume umainae. <sup>42</sup> Muki'a yupa ala mono nopi'ene vea'mogami nopi'ene muki'a vea'mogamina Yisasifena hamapai-mainae. “Yisasina Anumaya Koti'a taugafa aligatigahema hutenea kanoe.” hu'ya hamapai-mainae.

## 6

*Seveni'a (7) vayafe Aposolo vaya amaya hiho hu'ya humatenae.*

<sup>1</sup> Kasago'ya vea'mo'ya Yisasi kea havi'ya amakupi malene'ya amaku aminaya kanafina nago'a ani vea'mo'ya Kaliki ke havilinaya vea mainagi nago'a vea'mo'ya Hipalu ke havilinae. Kaliki kema havilinaya vea'mo'ya mage hae “Tagai megusa a'neyaga havi kava hutama osi kano'a kavela ne'amamiyanagi Hipalu amakema ne'aiya megusa a'neyaga kasago'ya kave ne'amamiye.” hu'ya amaipa haviya hu'ya ke vai-mainae. <sup>2-3</sup> Kema vaiya yafe Yisasina tuelufu'a (12) Aposolo anaga'amo'ya muki'a Yisasina amaku'ama aminaya veafe ke hage'ya age'ya mage hu'ya hae “Havigu tagaya Yisasi ke hamanepauna ali'yatia ataleta kave'ma fako faka hisunana haviya huyafenagi nafu'naganagatama tamakaitami

amu'notamifi atiyetama seveni'a (7) kanale amaku amakesaene vaya'ma, mainesigeno'ma Alu Aotage Avamu'mo'a amakupima hiya humainenage'ya vea'amimogami amaulagafima kanale kava'ma nehisaya vayafe atiyetama ani ali'yatela humatesune. <sup>4</sup> Humategahunanagi tagaya muki'a yupa nunamu huta havige havige nehuta Yisasi kea hamapaige hamapaige huta maigahune.” hu'ya humainae. <sup>5</sup> Hage'ya muki'a vea'mo'ya mani kea havite'ya muse nehu'ya ani vayala hapali'ya humataya vayala Sitiveni'a, Yisasi kea agu'afi tokiya'age huno malegeno Alu Aotage Avamu'mo'a agupina hiya humainea kanoene Filipi'ene Polokolasi'ene Nikana'ene Timoni'ene Pamenasi'ene Nikolasi'e. Nikolasi'a Atioku kanoa nayona Yuta nofi kanoa omaineanagi ea'yamo “Yuta vaya'mogami Anumaya Koti'amimo ke ali'na nagupi malegahue.” huno Isaleli nofi vayapi maineane. <sup>6</sup> Ani vayala amavalage'ya Aposolo vayatega age'ya ani vaya'mogami amanute amaya male'ya nunamuna humatenae. <sup>7</sup> Anumaya Koti kemo'a muki'a kotega ute ete hige'ya kasago'ya Yelusalemu nemaiya vea'mo'ya Yisasi kea havi'ya amakupina malenae. Kasago'ya mono note kava vaya'yagaene ani'a hu'ya Yisasi kea ali'ya amakupi male'ya amametiti humainae.

*Yuta vaya'mo'ya Sitivenina kaiyeke hutena.*

<sup>8</sup> Sitiveni'a tusi'a kanale kanogino kayone hisia ya'ene tokiya'aene agupina hiya humainegeni tusiya huno ani vayapina tokiya avame yana humaine. <sup>9</sup> Ani'a nehianagi nago'a vaya'mo'ya

hetilya Sitiveni'ene ke ne'vaiye. Ani vayala miya o'ali vaya maite'ya ete'ya afa'a maine'ya nago mono nopi ne'vaya vayale. Sailinia vaya'ene Alekasatalia vaya'ene nago'a vayala Silisia vaya'ene Esia vaya'ene Sitivenina ke vaitenae. <sup>10</sup> Kea vaitayanagi Alu Aotage Avamumo'a ha'maogeno kanale agu agesaene kanomo kea amigeno humane. Higeno amakai kemo'a Sitiveni kemona o'agasene. <sup>11</sup> O'agasege'ya nago'a vayafe "Sitivenifena havige hutesageta mone lamamigahune." hu'ya hage'ya ani vayala mage mo hae "Mani kanomo'a Mosesefe'ene Anumaya Kotife'ene tusiya huno hu-haviya hunategeta havimainone." hu'ya mo humane. <sup>12</sup> Mani kema haya yafe muki'a vaya'mo'yaene vayatamaene kahegi kema havilinaya anaga'mogamina amaku'amo'a haviya hige'ya Sitivenina motafa hu'ya Kanisole vayate avale'ya umainae. <sup>13</sup> Ute'ya nago'a havigema nehaya vayala amavale'ya hetimatage'ya ani vaya'mo'ya mage hae "Mani kanomo'a muki'a yupa tagaila alu aotage mono notiene kahegi kene huno haviya hie. <sup>14</sup> Higeta havunana Yisasi'a Nasaleti kanomo'a ma ala mono nona ali'na laga'ya vaine'atale'na 'Mosesema tahapai-mainea kahegi kea ataletama alu kava hiho.' huno higeta havimainone." hu'ya hae. <sup>15</sup> Nehage'ya muki'a Kanisolefi mainaya vaya'mo'ya Sitivenina aulu hayana augosamo'a alave alave nehuno ensole vaya'mogami amaugosamo'ma nehia kava hige'ya age-mainae.

## 7

*Sitiveni'a Kanisole vava'mogami amaufi kea huno falote humaine.*

<sup>1</sup> Ala mono note hagote kava kanomo'a Sitivenifena mage huno havige “Mani kema hugataya kea tamage nehao?” huno havige.

<sup>2</sup> Higeno Sitiveni'a mage huno humaine nenafagatamaene nagana'ni-mogatamaene haviho. Taginagomo'a Apalahamu'e yaufa Halani kotega o'uno Mesopotemia kotega mainegeni tokiya hale yama'aene Anumaya Koti'a Apalahamute efalote humaineane.

<sup>3</sup> Efalote huteno mage huno hapaiye “Kagaika mopaka'aene vayakamogami'enena ne'amataleka kavelisua mopalega vuo.” huno humaineane.

<sup>4</sup> Higeno Apalahamu'a anile Kalatia vava'mogami mopa ne'ataleno Halani kotega umaineno anilega nefa'a falitegeno Anumaya Koti'a eteno hutegeni tamakayama menima mainaya mopalela emaineane.

<sup>5</sup> Emaineanagi Anumaya Koti'a agai'a atafa hisia mopa nago atupa kano'a ani mopa nagoke aiya malesia mopa o'aminegi “Haenaga'a kamigahue. Ani mopa atafa hulinesanage'ya kagaipiti falote hisaya nafa'neyagamo'ya aligahae.” huno hianagi ani kanafina Apalahamu'a namo kano maineane.\*

<sup>6</sup> Maineanagino Anumaya Koti'a agai'fena mage humaineane “Kagaika'a kaginagomo'ya Isaleli nofi'ma omainaya vava'mogami mopale visage'ya ani vava'mo'ya amatafa hu'ya 'Ali'yatia aliho.’ hu'ya tusi yate ali haviya humatesage'ya ani mopalela fo

hataleti'a (400) kafu maigahae.\* <sup>7</sup> Maigahayanagi amatafama hu'yama 'Ali'yatima aliho.' hu'ya humainaya vaya'mogamina nagaya kaiyeke humatete'na ali'na haviya humatesuge'ya kagai kaginagomo'ya ani kotegatila ete'ya ma mopale emaine'ya nagai nagia alisaga hugahae.” huno humaineane. <sup>8</sup> Anumaya Koti'a mage huno humaine “Nagai anaga'ma maisaya yafe hagelafita maisuna kavala nafa'nekamogamina amakoya ano'ya taga huo.” huno higeno Apalahamu'a Aisakina nafa'ne'a ateteno napa eiti'a (8) kana maiteno agoya ano'ya taga humaineane. Haenaga'a Aisaki'a nafa'ne'a Yekopuna ategeno Yekopu'a haenaga'a tuelufu'a (12) nafa'neyaga tagai taginagomogamina amatene. <sup>9-10</sup> Ani Yosefena nepu'amo'ya Yosefefe tusi'a amaipa kafa hetete'ya avale'ya alu vaya'mogami ne'amami'ya mone alige'ya Isipi kotega avale'ya vayanagi Anumaya Koti'a agai'ene maineno kanama haiya yana alitaleno kanale agu agesa amigeno Isipi sauve kanoa, Felona, aulagale hetigeno Felo'a muse huno “Hagote kava kano maineka nagai no'yagaene muki'a Isipi kotega kava yagaigane.” huno hutene. <sup>11</sup> Hutetegenno mainegenno Isipi kotegaene Kenani kotegaene nagola tusi'a kafu haya kana efalote hige'ya tototimogamina kave'amia omalege'ya tusiya huno amakala lemmainae. <sup>12</sup> Amakala legeno Yekopu'a “Isipi kote'ma kavala hanema.” hu'ya haya kea haviteno nafa'neyaga'a hagoteno humatege'ya kave'ma hanelega umainae. <sup>13</sup> Haenaga'a ete'ya anile

vageno Yosefe'a "Nagayae tamakanatamimo'na mainoe." huno higeno Felo'a Yosefe afamofena havimaine. <sup>14-15</sup> Havitegeno Yosefe'a nefafena Yekopufe'ene muki'a anaga'a seveti faefu'a (75) anaga'aene ke hige'ya Isipi kotega umainageno Yekopu'a anile falige'ya nafa'neyaga'aene tototimo'ya fali-mainayane. <sup>16</sup> Falige'ya ete'ya ali'ya Sekemu kumala, Apalahamu'a moneleti Hamolo nafa'neyagamogami mopa miya higeno amigeno ali-mainea mopafi mo hevaitenae. <sup>17-18</sup> Anumaya Koti'a Apalahamufema hulokiya vai-malenea kemo'a fatago huno efalote hisia kanamo'a aupa hige'ya tagai taginagomo'ya Isipi kumatela falote hu'ya kasago humainageno alu sauve kanoa, Yosefefena o'agenea kanomo, eteno sauvea alino humaineane. <sup>19</sup> Falote huno maineno tagai nofi vayala ayemavataga huno huhaviya hune'amateno "Nafa'neya-gatamia hamaesunage'ya faligahae." huno tokiya'age ke humaineane. <sup>20</sup> Higeno ani kanafina Mosesena ita'amo'a atetegeni Anumaya Koti'a hau-mainea nafa'negino ita'amogani nefagania tali'a (3) ikana no'anifinaga kava hu'ana ata'ageno maina'e. <sup>21</sup> Kava hutete'ana kumate atena'ageno Felo muna'mo'a ani nafa'nea avaleno agai'a nafa'ne kana huno yagai-maine. <sup>22</sup> Yagaiteno avo nopi ategeni Isipi vaya'mo'yama havilinaya yana Mosesena huve-ligeno aliteno tusiya huno tokiya'a haneteno kanale kea nehuno nehia kano maine. <sup>23</sup> Maineanagino foti'a (40) kafu huteno mage hie "Isaleli vaya'nimogamina momakegahue." huno agesa havimaine. <sup>24</sup> Haviteno mogeana nago Isipi kote kanomo'a

Isaleli kanomona aiko-neligeno Mosese'a moli-ne'ataleno anona'a ani Isipi kote kanoa haegeno fali-maine. <sup>25</sup> Faligeno Mosese'a ma agesa havimaine “Vaya'nimo'ya mage hu'ya hugahae ‘Anumaya Koti'a Mosese ayapiti taugafa aligatigahie.’ hu'ya hugahae.” huno agesa havianagi vaya'amo'ya ani amakesa ohavinae. <sup>26</sup> Ohavigeno Mosese'a faeteno mogeana tole Isaleli kanolatana tu neha'ageno monaketeno moli-ne'anataleno mage huno hie “Nenafugatanae tanakaya nagoke konagalata maina'agi na'a higetana tua neha'e?” huno hie. <sup>27</sup> Higeno anima tuma aepa heno'ma agana'amoma aiko-lia kanomo'a Mosesena ayetu-nefeno mage huno hie “Kagaila tagaite kava kano maika kaiyeke fatago hu kano maiyo kea ta kahapaigeka ani'a nehane? <sup>28</sup> Kagayama egama Isipi kanoma hayana kava huka nahaegahe nehano?” huno hie. <sup>29</sup> Higeno ani kema hia kehe Mosese'a faleno Mitiani kotega mo maineno ala aliteteno maineno haenaga'a tole ne nafa'nelata anatene. <sup>30</sup> Anilegama maiyana foti'a (40) kafu maiteno Mosese'a ka'me kotega Sainai ago'yafi haino mainegenonago osi yosalela ala ata anefela nelea yapiti nago ensole kanomo'a eva'yi higeno age-maine. <sup>31-32</sup> Ageteno ama'yo ne'aino agelama hisue huno nehuno avate ne'egenon Anumayamo'a anileti age aino mage huno hie “Nagaya kaginagomogamina Anumaya Koti'ami mainoe. Apalahamu'agi Aisaki'agi Yekopugami Anumaya Koti'ami mainoe.” huno higeno Mosese'a atali talu huteno ani yama



nago'ene agesia yafena tusi koli huno o'agene.  
<sup>33</sup> Koli nehigeno Anumayamo'a mage huno hie  
“Mamona alu aotage mopa nagai'ni'a mopagika  
kaiya anona asagika maletekao. <sup>34</sup> Nagayama  
nagai nofi vaya'ma Isipi nemaiya vea'nimoga-  
mina ali haviyama humataya kavala ago age-  
mainoe. Avima atayana ago havimaine'na  
amaugafa aligatigahe emainogi. Kagaya eno  
Isipi kotega hugategahue.” huno Mosesefena  
hapai-mainea ke huno Sitiveni'a hamapai-mainae.

<sup>35</sup> Mani Mosesefena nayona mage hu'ya hu-  
mainae “Kagaila kava kano maineka kaiyekea  
ali fatago hugane hu'ya kea ta kahapaigeka  
ani'a nehane?” hu'ya amakave'no hutena.  
Anima amakave'no hutaya kanomona osi yos-  
ale'ma va'yima humainea ensole kanomo'a aya  
higeno Anumaya Koti'a kava humateno amau-  
gafama aligatisia yafe huteneane. <sup>36</sup> Hutegen  
Moses'e'a Isipi kotega umaineno ani kotegati  
amavaleno foti'a (40) kafu Isipi kumate'ene  
haesa tite'ene ka'me kotegaene kasago'ya tokiya  
avame ya'yaga humaineane. <sup>37</sup> Ani Moses'e'a  
Isaleli vea'mogamife mage huno hamapai-mainae  
“Anumaya Koti'a tamakai vayapiti nagayama  
hua'ya huno aune laga hisia kanoa avaleno  
hetitegahie.” huno hamapai-mainae. <sup>38</sup> Ani  
Moses'e'a ka'me kotega maineno mono kema hav-  
igahema melitalu humainaya taginagomo'yaene  
maiteno Sainai ago'yafi haitegeno nago en-  
sole kanomo'a eva'yi huno Anumaya Kotina  
tahaimu'ma lamisia mono kea Mosesena ha-  
paigeno Moses'e'a taginagomogamina hamapai-  
mainae.

39-40 Hamapai-mainegi taginagomo'ya “Mosese kea akave omalegahune.” hu'ya amakave'no hutete'ya Isipi kotega ete'ya visaya amakesa nehavi'ya Elonife mage hu'ya humainae “Kategama lavaleno visia yana Anumaya Kotitima maisia yana talo hulato. Mosese'a, Isipi kotegati'ma lavaleno'ma emainea kanoa hanatepi vigeta no'agone.” hu'ya humainae.

41 Mani kea hute'ya nagola pulamakamo nafa'nea amayateti talo humalet'e'ya “Anumaya Kotitia ma maine.” hu'ya anima amayateti'ma talo humalaya yafena tusi'a muse hu'ya afua he'ya kaete'ya ali'ya mominae. 42 Ani kava'ma haya yafena Anumaya Koti'a akave'no humateteno amatalege'ya yagama ka'nefi'ma ikama na'a yama hanea yate “Anumayati mainae.” hu'ya muse nehu'ya amaku'a amitafa hu'ya ani ya'ayagamogami amaki alisaga humainaya yafe Anumaya Kotina aune vaya'mo'ya kae-malenaya auta'mafina mage hu'ya humainae “Tamakaya Isaleli nofi vea'mogatama foti'a (40) kafu ka'me kotega umainetama pulamakaene sipi sipiene hetama kae sala'mana humainayanagi nagaifena muse hutama mani kavala nehafi alu kanomofe musena nehae? 43 Tama'a omalenea Anumayamona agi'a Molekifena tusi'a muse hutama agai agi alisaga hisaya nona kitetama alitama utama tama'a omalenea Anumayamona agia Lefanifena tusi'a muse hutama ka'nefi kana yana talo hutama ani augafa ya'yagale musena hutama tamakula amitafa hutama amakia alisaga nehae. Na'ama haya yafe kame

vaya'mo'ya humatesugetama kotamilegatila tamavale'ya Papiloni kola agasetama ame kaiyaga umaigahae.” huno humaineane.

<sup>44</sup> Taginagomo'ya ka'me kotegama mainageno'a Anumaya Koti'a “Ma kava huka talo huo.” huno'ma Mosesena huveli-mainea kavala huno mono nona kenaleti talo humaleteno kimalenegeno Anumaya Koti'a ani nopi eno amakai'ene me lokaeno kelamage kea hamapai-mainene. <sup>45</sup> Haenaga'a Mosese'a falitege'ya taginagomo'ya ani yuguleti'ma kimalenaya mono nona ali'ya Yosua'ene Yuta vea omainaya vea'nene tua hute'ya mopa'amia ali-mainae. Anumaya Koti'a taginagomogami amaulagafima Isaleli nofi'ma omainaya vea'mo'ya ani mopaletila amanatige'ya ani yuguleti'ma kimalenaya mono nona ali'ya ani mopafi e'ya me malageno anile hanegeni Teviti'a falote humaineane. <sup>46-47</sup> Anumaya Koti'a Tevitina kanale'ya huno ha'maegeni Teviti'a mage humainene “Yekopu Anumaya Kotiga kanale nona kigatesue.” huno hianagi ani nona okinegi haenaga'a nafa'ne'amo'a Solomoni ani nona kimaleneane. <sup>48</sup> Kianagi anale'ma mainea Anumaya Koti'a vea'mo'ya amayateti'ma kimalenaya nopina nomaiye. Na'ama humainea yafena nagola Anumaya Koti aune kanomo'a mage huno humaineane

<sup>49-50</sup> “Anumaya Koti'a mage hie 'Ikapinaga nagai'ni'a kava yagaisua sia'nia hanegi maifaluma hisua yafe naiya male'na maisua yana mopa hanegi hana augafa no kinategahae? Hana kumate maisue?

Nagaya muki'a yana ikapinagama hanea ya'ene ma mopale'ma hanea ya'ene talo humaleno'e.' huno humaine." huno humaineane.

<sup>51</sup> Tamakaya kea ohavi vea'ne mainetama tamaku tamakesafinaga "Anumaya Koti kea ohavigahune." hutama Alu Aotage Avamu'mona tamakave'no hutetetama tamakinagomo'ya nehaya kava'age nehae.

<sup>52</sup> Tamakinagomo'ya muki'a Anumaya Kotina amaune vaya'amogamina ali haviya humatena'e. "Kanale Fatago Kanoa egahie." hu'ya amaune vaya'mogamina tamakinagomo'ya ago hamayage'ya falimainayanagi tamakaya ani Kanale Fatago Kanomona ago agesi hutama hayageno fali-maine. <sup>53</sup> Ensole vaya'mo'ya aya'amo'ya kahegi kea ago tamahapaiyanagi tamakaya tamage hutama akavela nomalae. Mani kea Sitiveni'a huno humaine.

*Sitivenina yafa ka'yo'teti hayageno fali-maine.*

<sup>54</sup> Hige'ya anile'ma mainaya vea'mo'ya Sitiveni'ma hia kemona havite'ya amaipamo'a tusi amakata aiteni hamai-vaige'ya amavaya mumu mama humaina'e. <sup>55</sup> Na'a nehageno Sitiveni agupina Alu Aotage Avamu'mo'a hiya higeno ikapinaga aulu heno ageana Anumaya Kotina tokiya hale yama'aene Yisasi'a Kotina tamaga ayatega heti-mainegeni age-maine. <sup>56</sup> Ageteni mage huno hie "Agegeho nagaya agoana ikamo'a ago aihalegeni ikapinagati emainea kanoa vaya'mo atenea kanomo'a Anumaya Kotina tamaga ayatega heti-mainege'na nagaya ne'agoe." huno hie.

<sup>57</sup> Huno hianagi melitaluma humainaya vea'mo'ya agai kea ohavisaya yafe amayateti amakesa ailinele'ya ala kenake nehu'ya tusi'a ke ne'vai'ya aiko-ligahe motafa humainae. <sup>58</sup> Motafa hu'ya avayu hu'ya kumategati malaga haga'yu hutalene'ya yafa ka'yoteti haga'yu hu'ya aiko-neli'ya “Fatago kava nehune” hu'ya hisaya yafe siota'amia asagi'ya kava kanoa, Solo\* aiyafi mo-malena. <sup>59</sup> Malete'ya yafa ka'yoteti aikoneligeno Sitiveni'a Anumayamotega havigeno mage huno hie “Anumayani'amoga Yisasigae nagu namema'a kagai kayapi nemaloe.” huno hu-maine. <sup>60</sup> Mani kea nehuno ale'ya ayeno ala kegefafiti Anumayamotega mage huno hie “Anumayamogae mama kefo kava'ma nehaya ya'amimona anona'amia hu-o'ama-to.” huno nehuno anile fali-maine.

## 8

*Solo'a tusiya huno Yisasina amaku'ama aminaya veala alino haviya humatene.*

<sup>1-2</sup> Sitivenima hayageno falia yafena Solo'a “Kanale kava hae.” huno tusi'a muse humaineanagi nago'a vea'mo'ya Anumaya Koti kema nehaviya vea'mo'ya Sitivenifena tusi'a avi atete'ya ali'ya mo hevaitetage'ya ani kanaleti aepa he'ya Yisasi kema havi'ya amaku'ama aminaya vaya'mogamina Yelusalemuma nemaiya vea'mogamina ali'ya haviya humatage'ya ani vea'mo'ya fale'ya Yutia kotegaene Samelia kotegaene ute ete hage'ya Aposolo vayala amakai'amige Yelusalemua mainae. <sup>3</sup> Mainageno Solo'a Yisasi kema havi'ya

amakupi malenaya vea'mogamina alino haviya humateno amakai'ami no'yagafi haino muki'a veala amavaleno kina mo humatene.

*Filipi'a Yisasina kanale mono ke'a nago'a Samelia kumate mo huhaleno humaine.*

<sup>4</sup> Kinama humatage'ya nago'a umainaya vea'mo'ya alu kote kote fale'ya ute ete hu'ya Yisasina kanale mono ke'a hamapai-mainae.

<sup>5</sup> Filipi'a nagola Samelia hanea kumate tavino mage huno mo hamapaiye “Yisasina Anumaya Koti'a taugafa aligatigahema hutenea kano emaine.” huno hamanepaiye. <sup>6-7</sup> Hamapaige'ya muki'a vea'mo'ya agai kea havite'ya agai'ama humainea tokiya avame yamo'a Satani Avamu'yaga vea'mogami amakupitila ala amake ne'ai'ya hatilavi'ya ne'vageno amaiya amaya avayu hulavi-mainea vea'nene amaiya haviya humainea vea'nene alino kanale humatege'ya agete'ya nagoke amaku amakesa havi'ya ke'a ali'ya amakupi malenae. <sup>8</sup> Amakupi malete'ya ani kumate vea'mo'ya tusi'a muse humainae.

*Saimoni'a tokiya avame ya talo nehia kanoe.*

<sup>9</sup> Muse hayanagi ani kumatela nago kanomo agia Saimoni'e “Nagaya tusi'a ala kano mainoe.” huno tokiya avame yana hige'ya muki'a Samelia vea'mo'ya agete'ya tusi'a amama'yo ne'aiyane.

<sup>10</sup> Amama'yoa aite'ya ala amakima hanea vea'nene osi amakima hanea vea'nene agai kea havite'ya mage hu'ya humainae “Ma kanoa Anumaya Koti'a ala tokiya'a aminea kanoe.” hu'ya humainae. <sup>11</sup> Kasago'ya yupa tokiya avame yama hige'ya agaya yafe tusi'a amama'yo

aige'ya agai ke havimainae. <sup>12</sup> Haviyanagi Filipi'a anile eva'yi huno Anumaya Koti'ma kava yagaisia kanale kene “Yisasina Anumaya Koti'a taugafa aligatigahema hutenea kano emaine.” huno'ma hia kanale kene havite'ya Yisasina amaku'a amitafa hageno veala tina falematene. <sup>13</sup> Saimoni'enena Yisasina agu'a amitafa higeno tina faletetegenno Filipi'ene vaine'ayegenno Filipi'a tokiya avame yana higeno ageteno tusi'a ama'yo aimaine.

<sup>14</sup> “Samelia nemaiya vea'mo'ya Anumaya Koti kea havi'ya amakupi ali'ya malenae.” hu'ya haya kea Yelusalemuma nemaiya Aposolo vaya'mo'ya havite'ya Pita'ene Yoni'ene hunatage'ana ani kumatela elavi-maina'e. <sup>15</sup> Elavite'ana Anumaya Koti'ma ani vea'mogamima Alu Aotage Avamu'ama amamisia yafe Anumayamotega havige-maina'e. <sup>16-17</sup> Amakaya Yisasi agile ago tina falematayanagi Alu Aotage Avamu'mo'a amakaitela eotavine. Eotavinea yafe Pita'ene Yoni'ene anaya amaugafale avate hulina'age'ya Alu Aotage Avamula avale-mainae.

<sup>18-19</sup> Aposolo kanolatamogania anayama nemala'age'ya Alu Aotage Avamula avalageno Saimoni'a ageteno mage huno hie “Mone lanamisuetana tokiya yana nagaila namisa'age'na naya malesugenno vea'mo'ya Alu Aotage Avamula avalesae.” huno hanavige.

<sup>20</sup> Higeno Pita'a mage huno hapaiye “Kagaya Anumaya Koti'a afa'ama ne'amamia yafema miya hugahue hukama kagesa havina yamo'a monika'aene kagaika'aene Anumaya Koti'a alino haviya hugatesie. <sup>21</sup> Anumaya Koti aulagafina

kagai kagupina kanale ohunea yafe ani ali'yana kagai yana omaletafa huno omalene. <sup>22</sup> Menima kefo kava'ma hana yafena kagu'a aiyahae huka Anumayamotega havigesanageno ani kagu kagesafima havi kagesama havina yaka'a aigekateno kefo yaka'a atalegatesie. <sup>23</sup> Nagaya kagupima agoana kaipamo'a haviya humainea yafe atu'age nehigeno kefo yakamo'a nofi hugatene.” huno kenona'a hapaiye.

<sup>24</sup> Higeno Saimoni'a mage huno hapaiye “Nehana yamo'a nagai naugafalela falote ohisia yafe tanakaya nagaila nunamuna hunate'o.” huno hanapai-maine.

<sup>25</sup> Pita'ene Yoni'ene Anumayamo ke hamapai'ana mage hu'ana ha'e “Ta'agaya Yisasina ageteta'a agaifena ta'agupi maleno'e.” hu'ana hamapaite'ana ete'ana Yelusalemu ugahe kategama va'ana Samelia kola alu kumate kumate u'ana Yisasifena kanale mono ke'a hamapai-maina'e.

*Filipi'a nagola Itiopia kotega kanomona Yisasina kanale mono ke'a hapai-maine.*

<sup>26</sup> Nago ensole kanomo'a Filipifena mage huno me hapaiye “Hetika Yelusalemuti Kasa kumate'ma ne'vaya katega vuo.” huno hapaiyana ani kana ka'me kotega umainea kane. <sup>27-28</sup> Higeno Filipi'a hetino ani katega via'yamo mogeana nagola anupa kanoa Itiopia kotega kava kanoe muki'a ala sauve aala, Kanatesi'e hu'ya agia ne'ayaya a'mo, mone afeno'yate kava ne'yagaiyane. Ani kanoa Anumaya Koti agi alisaga hugahe Yelusalemu



uteno ani yupa eteno noma'alega ugahe hosi afumo'ma avayu huno ne'via kalefi haino maineno Anumaya Kotina aune kano'amo'a, Aisaiya, kae-malenea auta'mafi hapalime hapalime umaine. <sup>29</sup> Ne'vigeno Alu Aotage Avamu'mo'a Filipife mage huno hapaiye “Kagaya ani kalefi mo haisaga humaika agai'ene tokaeka vuo.” huno hapaiye. <sup>30</sup> Hapaigeno Filipi'a aiyayeno avate ne'uno mo haviana Aisaiya'ma kae-malenea auta'mafima hapalimema via kea mo haviteno mage huno hapaiye “Kagaya mani kemona aepa'a havilama nehano?” huno havige. <sup>31</sup> Havigeveno ani kanomo'a mage hie “Nago kanomo'ma naveotisiana hana'a hu'na havigahue?” huno huteno Filipifena “Nagaya mainole ehaika nagai'ene emaiyo.” huno hapaiye.

<sup>32</sup> Anima Anumaya Koti kema kae-malenea kema hapalia kemo'a mage huno humaine “Sipi sipi haegahema avale'ya ne'vageno'ma avovoma ohuno ako huno nemaiya avamete'ene sipi sipi nafa'neyagama ayolagefama laga hugahema hia kanomote mo heti'ya maine'ya avovoma ohunaya avamete kava huno ke ohuno ako huno maine. <sup>33</sup> Ani kanomofena ‘Afa kano mainane.’ hu'ya agaye hisifa kava hutete'ya fatagoma hia kaiyekea huo'atenagi afa'a hayageno fali-mainegeno agai'a nafa'nema omainea yafe nago'a vea'mo'ya avage'a ohugahae. Ma mopale'ma mainea kana'amo'a ago ha'no humaine.” huno kaemalenea ke hapalime

umaine.

<sup>34</sup> Hapaliteno ani kava kanomo'a Filipife mage huno havige “Ani aune kanomo'a tafe mani kea huno humaine? Agai'ahe humainefi nago kanomofe mani kea humaine?” huno havige.

<sup>35</sup> Havigegeno Filipi'a aepa heno mani kemo aepa'a hapaiteno Yisasina kanale mono ke'a hapaimaine. <sup>36</sup> Hapaime hapaime katega ne'u'ana nago tite uva'yi hute'ana ani kava kanomo'a mage huno hapaiye “Tina ma hanegi ago kanale mani lina falenategano?” huno havige.

<sup>37</sup> Havigegeno Filipi'a mage huno hapaiye “Mani kema havika kagupi malekama kametiti hisanana kanalelagi'na lina falegategahue.” huno higeno ani kanomo'a mage hie “Nagaya Yisasi Kalaisi'a Anumaya Koti nafa'ne maine. Tagai taugafa aligatigahe hutenea kano maine hu'na ali'na nagupi male'na nametiti nehue.” huno humaine.

<sup>38</sup> Nehuno hosi afumo'ma avayu nehia kalemo talaiva kanomofe “Male atafa huo.” huno hige'ana Filipi'ene ani kava kanoene tipi tavite'ana Filipi'a tina faletene. <sup>39</sup> Faletetege'ana tipiti'ma ehai'ageno'a Alu Aotage Avamumo'a aupa'a Filipina avaleno vigeno ani kava kanomo'a nago'ene Filipina o'ageanagi katega tusi'a muse hume hume umaine. <sup>40</sup> Utegeno Filipi'a Asotasi eva'yi huteno Yisasina kanale mono ke'a muki'a kumate vea'mogamina hamapaima hamapaima uno Sisalia uva'yi humaine.

## 9

### *Solo'a Yisasite agu'a aiyahae humaine.*

1-2 Ani kanafina Solo'a aipafinaga tusi'a hai-vaiteno tokiya'age ke huno “Anumayamo anaga'amogamina hamaesuge'ya falisae.” huno huteno ala mono note hagote kava kanomote uno mage huno havige “Museka'a nehugi nagaya Tamasigusi kumate u'na Yisasi anaga'amogamima amakenu'nahena amatafa hu'na kina humatete'na Yelusalemu amavale'na egahue. Ani kumate mono note kava vaya'mo'ya nayama hisaya yafe avona kaeka namio.” huno humaine. <sup>3</sup> Ani kotega Solo'a via'yamo Tamasigusi eva'yi hugahema nehiana aupa'a ikapinagatila tokiya'age hale yamo'a tusiya huno agaite meyevasa humaine. <sup>4</sup> Meyevasa higeno Solo'a mopafi asaga hulavino fae-maineno havigeno nagola ala kemo'a mage huno hie “Sologae Sologae na'a higeka nagaila ali haviya nehane?” huno humaine. <sup>5-6</sup> Higeno Solo'a mage hie “Alamogae kagaya lagae?” huno higeno mage hie “Nagaya Yisasi'nae kagayama nagai'ma ali haviya hunenatana kanomo'nagi hetika ala kumate ugeno'o. Nago kanomo'a ‘Na'a ma'a hugane.’ huno kahapaigahie.” huno hapai-mainae.

<sup>7</sup> Hapaige'ya Solo'enema vaiyaya vaya'mo'ya hetiya maine'ya anima agema aiya agea haviyanagi vaya'ma o'agaya yafena tusi'a amama'yo aite'ya nagokela kea ohunae. <sup>8</sup> Solona mopafiti avale'ya hetitageno aulagama agegali hiana aulagamo'a hani'ali ko'ali hige'ya ayate

ali'ya Tamasigusi avale'ya umainae. <sup>9</sup> Vageno Solo'a tali'a (3) kanama maiyana aulagamo'a ani'a huno asu humaigeno kave'ene ti'ene mosino afa'a oneno maine.

<sup>10</sup> Ani Tamasigusia nagola Yisasi anagapiti kanoa, Ananaiyasi'e nehaya kanoa maineanagino Anumayamo'a himonafi mage huno hapaiye “Ananaiyasigae mainano?” huno higeno “E, ma mainoe Anumaya ni'amogae.” huno humaine. <sup>11</sup> Higeno Anumayamo'a mage huno hapaiye “Hetika fatago kane hu'yama nehaya katega uteka Yutasi nopi ufalekama agesanana nagola Tasusi kanomona agia Solo'e nehaya kanoa anifi maineno Anumayamotega nunamu maino nehianagika mogegane. <sup>12</sup> Ani kanomo'a himonafima ageana nago kanomo'a eno aulagama agegali hisia yafe anute aya memalene. Anima himonafima agea kanoa kagayae. Kagaika'a Ananaiyasigae huno himonafina age-maine.” huno hapai-maine.

<sup>13</sup> Hapaiyanagi Ananaiyasi'a mage huno humaine “Anumayani'amogae ani kanomofena muki'a vea'mo'ya mage hu'ya hage'na nehavuane Yelusalemuma kagai anaga'ma mainaya vea'mogamina tusiya huno ali haviya hune'amate hu'ya hage'na havi-mainoe. <sup>14</sup> Ala mono note ala kava vaya'mo'ya avona amigeno male'ma kagai kagile'ma nunamu huta kahavinegona vea'nea kina hulategahe emaine.” huno hie.

<sup>15</sup> Nage hianagi Anumayamo'a mage huno hie “Afa'a agaitega vuo. Ani kanoa nagaya ago hapali'na hutenoa kanoe. Nagai kea alino

visia'yamo Yuta vea omainaya vea'mogami'ene sauve vaya'amienne Isaleli vea'mogami'ene nagai kea hamapaigahie. <sup>16</sup> Nagaifena huhaleno hamane painage'ya agata aisia ya'ene kanama haisia ya'ene eva'yi hutesia yafe aveligahue.” huno hapai-mainie.

<sup>17</sup> Hapaigeno Ananaiyasi'a via'amo ani nopi haino Solo anute aya maleno mage huno hie “Nagana'nimoga Sologae Yisasi'a Anumayati'amo'a emainana kate'ma eva'yima hu-mainiea kanomo'a kaulagama agegali hisana yafe'ene Alu Aotage Avamu'mo'a kagupima hiya kahaisia yafe'ene hunatege'na ne'oe.” huno hie. <sup>18</sup> Higeno aupa'a aulagaletila haleti'na kana yamo'a asaga hulavigeno aulaga agetegenono tina faletene. <sup>19</sup> Kavela netegenono augafamo'a tokiya vaigeno Tamasigusi Yisasi anaga'ma mainaya veapi uno nago'a kanafina amakai'ene mainie.

*Solo'a Tamasigusia Yisasifena kanale mono ke'a huhaleno humaine.*

<sup>20</sup> Tamasigusi maineno aupa'a muki'a monono'yagafi ute ete hia yamo mage huno hampaiye “Yisasi'a agai'age Anumaya Koti nafa'nea mainie.” huno humaine. <sup>21</sup> Mani kema haviya vea'mo'ya tusi'a amama'yo ne'ai'ya mage hu'ya hae “Mani kanomo'a Yelusalemu maineno Yisasi agile'ma nehaviya veala ago hamaeteno ma kumate eno ani'ama nehaya vea'ne kina humateno ala monono note kava vayate kaiyeke humatesia yafe amavalegahe emainea kanofi?” hu'ya hae.

<sup>22</sup> Hayanagi Solona hamapaisia tokiya'amo'a melino ala higeno “Yisasina Anumaya Koti'a

tagai taugafa aligatigahema hutenea kano emaine.” huno tusiya huno humavelia yafena anima Tamasagusi nemaiya Yuta vea'mo'ya alu amakesa alu amakesa havimainae.

*Yuta vaya'mo'ya Solona hae'ya faligahe hageno faleno umaine.*

<sup>23-24</sup> Amaipamo'a haviya hige'ya aya'aya kana maite'ya Yuta vaya'mo'ya “Hana'a huta Solona haesunageno falisie?” hu'ya hute'ya haesaya yafe nate'ene kege'ene ani kuma'mona fiatega yagai'ya maiyanagi Solo'a mani kea ago havi-maine. <sup>25</sup> Haviteno mainege'ya nago'a Yisasi anaga'mo'ya nago kegela Solona avale'ya yafateti humalenaya tafite haite'ya ala kamagupi Solona asaga hu'ya aite'ya ani kegi'yafiti malaga atalageno tavimaine.

*Solo'a Yelusalemu umaine.*

<sup>26</sup> Solo'a Yelusalemu umaineno Yisasi anagapi umaigahe hianagi agaifena koli'a nehu'ya Solofena “Yisasi kea nohavia kanoe.” hu'ya amametiti humainae. <sup>27</sup> Hyanagi Panapasi'a aya huno Aposolo anagate Solona avaleno via'amo kategama Anumayamona agegeno kema hapai-mainea yafe'ene Solo'a Tamasigusia kolima ohuno tokiya'age'ma huno Yisasi kema hamapai-mainea yafe'ene Panapasi'a hamapai-maine. <sup>28</sup> Hamapaige'ya havite'ya Solona avalageno amakai'ene Yelusalemu kumate vaiyatete huno maineno kolia ohuno Yisasi kea tokiya'age huno hamapai-maine. <sup>29</sup> Solo'a nago'a Kaliki kema nehaya Yuta vaya'enema tokiya'age kema vaiya

yafe ke ne'vai'ya haesageno'ma falisia kafe atiyemainae. <sup>30</sup> Ne'ayageno Yisasina amaku'ama aminaya vea'mo'ya ani kema haya kea havite'ya Solona Sisalia kumate avale'ya tavite'ya anileti hutageno kuma aepa'alega Tasusi umaine.

<sup>31</sup> Yutia'ene Kaliliene Samelia'enema Yisasifena havi'ya amakupi malenaya vea'mogamina amaipamo'a falu hinage'ya maine'ya kanale'ya hu'ya alitalu huge huge hu'ya amaku'a ali lokiya vai'ya nemaiye. Anumaya Kotima haiya kate'ma vaiyaya yafe Alu Aotage Avamu'mo'a amaya hige'ya kanale'ya hu'ya nemaige'ya kasago'ya vea'mo'ya ete ete hu'ya amakai'ene melitalu humainae.

*Pita'a Ainasina kali'a alino kanale hutene.*

<sup>32</sup> Pita'enena alu kumate kumate vaiyatete nehuno Lita kumatela Yisasifena havi'ya amakupi malenaya vea'nene maine. <sup>33</sup> Maineno ageana nago kanoa aiya ayamo'a avayu hulavigeno nemaiya kanoa eiti'a (8) kafufina kaana vai'o'ayeno sipale faeno nemaiya kanoa mogemaine. Ani kanomo agia Ainasia'e. <sup>34</sup> Pita'a mogeteno mage huno hapaiye “Ainasiga Yisasi'e, Anumayatimo'a, ago alino kanale hugategi hetika fae-nemaina sipaka'a alika hilato huo.” huno higeno aupa'a he'neligeno kanale hutene. <sup>35</sup> Kanale'ma hutegenomaiya yafe Lita vea'nene Saloni vea'nene ani kanomona agete'ya Yisasite amaku'a aiyahae humainae.

*Tapita'a fali-mainegenomaiya Pita'a alino hetitene.*

<sup>36</sup> Yopa kumatega Yisasifena havi'ya amakupi malenaya veapiti nago aala maine. Ani a'mo

agia Tapita'e. Kaliki kefina mage hu'ya ani a'mo agia ne'ayayane Tokasi'e hu'ya ne'ayaya a'mo'a tusiya huno kayone'age a maineno muki'a kanafina kave'amiene afeno'amienema omalenea veala amaya huno ne'amamia ale.

<sup>37</sup> Pita'a Lita mainegeni ani a'mo'a kali alino falige'ya ani a'mona augafa sese hutete'ya ali'ya hunalagi-malenaya note anale malenae.

<sup>38</sup> Malet'e'ya Yisasifema havi'ya amakupi malenaya anaga'mo'ya Pita'a Litama mainea kea havite'ya Lita kumala Yopa kuma'mona aupa'ale hanea yafe tole kanolatana hunatage'ana u'ana mage hu'ana mo-hapai'e "Museka'a nehu'agi aupa'a ta'agai'ene kumati'alega eno." hu'ana hapai'e.

<sup>39</sup> Hapai'ageno Pita'a anakai'ene via'amo uva'yi hige'ya anima hunalagi-malenaya nopima avale'ya haiyana kasago'ya megusa a'neyaga anile het'i'ya maine'ya avi ne'ate'ya amakai'amima fai-linaya kena'amia Tokasi'a amakai'enema afa'a mainea kanafi talo humalenea kena'amia Pitana aveli-mainae.

<sup>40</sup> Aveligeno Pita'a ageteno muki'ama mainaya vea'mogamifena "Ma nopinagatila hati-lavitama viho." huno hige'ya hati-lavi'ya vageno ale'ya aye-maineno nunamuna huteno ani a'ma malenalega augosa humaineno mage huno hie "Tapitagae hetio." huno higeno ani a'mo'a fali-mainefitila aulaga agegali huno Pitana ne'ageno hetino sipale maine.

<sup>41</sup> Sipale mainegeni Pita'a ayana amiteni avale hetiteteno Pita'a Yisasima amaku'ama aminaya veafe'ene megusa a'neyagaenefe ke hige'ya aageno fali-mainefitila hetino haegafa higeno avaleno amamine.



<sup>42</sup> Ani'ama hia kemo'a muki'a Yopa kumatela ute ete hige'ya kasago'ya vea'mo'ya havite'ya Yisasifena havi'ya amakupi male'ya amametiti humainae. <sup>43</sup> Pita'a muki'a yupa Yopa kumatela maineno nagola pulamakamo augafa taga huno talo nehia kanoene nemaiyane. Ani kanomo agia Saimoni'e.

## 10

*Nago ensole kanomo'a eno Koniliasina ke mehapai-mainie.*

<sup>1</sup> Nago kanoa Koniliasi'e ati kava kanoa Sisalia maineno Itali kumateti vani hataleti'a (100) ati vayate kava yagai-mainiane. <sup>2</sup> Ani kanoene anaga'aene Anumaya Koti kema nehavi'ya nemaiya yafe “Agayama haiya kava hugahune.” hute'ya afeno'amima omalenea veala monea amamite amamite nehu'ya muki'a kanafina nunamuna hu'ya muse hu'ya havinegayane. <sup>3-4</sup> Nago unena ani kanomo'a hetimaineno himona kana yana ageana nagola Anumaya Koti ensole kanomo'a agaite eva'yi huno mage huno humaine “Koniliasigae mainapio?” huno higeno Koniliasi'a aulu neheno tusi'a ama'yo ne'aino mage huno hie “Ala kanomogae na'a higeeka nehane?” huno higeno ensole kanomo'a mage huno hie “Kagayama Anumayamotega havinegana ya'ene afeno'amima omalenea veala hama'maeka amamite amamite hana ya'ene Anumaya Koti'a ageteno kagaifena agesa nehavie. <sup>5</sup> Kagaya menia nago'a vayala humatege'ya Yopa kumateti Saimoni Pitana

movale'ya eho. <sup>6</sup> Ani kanomo'a nago pula-makamo augafa laga huno talo nehia kanoene nemaiye. Ani kanomo agia Saimoni'e. Noma'a hagelimo agegayalega hane.” huno hapaiye.

<sup>7-8</sup> Ani kea hapaiteno ataleno vigeno Konil-iasi'a tole ali'ya kanolatama'aene nagola Anumaya Koti kema nehavia ati kano'amo'enefe ke hige'ya ageno ani ensole kanomo'ma eva'yi huno humainea kea hamapaiteno humatege'ya Yopa umainae.

*Pita'a himona kana ya age-maine.*

<sup>9</sup> Katega mo-faete'ya kotige'ya heti'ya Yopa eva'yi hugahe hageno yagemo'a amu'no-ka'no higeno Pita'a nunamu hugahe nomona amega agotofulega haino maine. <sup>10</sup> Mainegeno tusi'a agateanagi kavela yaufa talo tala nehageno nagola himona kana yana age-maine. <sup>11</sup> Ageana ikamo'a aihagalo higeno nagola tusi'a kena kana yana aluga aluga atupale nofi aye-malete'ya atalageno mopafi enelavigeno age-maine. <sup>12</sup> Ageana ani yapina muki'a yaka kafa afua osifa'vea nama vayupala yagaene mainageno elavi-maine. <sup>13</sup> Elavigeno Pita'a ne'agegeno nagola age aino mage huno hapaiye “Pitagae hetika ani memeyana heka no.” huno hie. <sup>14</sup> Higeno Pita'a mage huno hapaiye “A'ao, Alanimogae ma ma yaga kafa kagai kaufina oni'ya'age humainege'na nagaluma humalenana yamofe tamage hu'na onenoa ya'yaga hane.” huno humaine. <sup>15</sup> Higeno nago'ene agea aino mage huno humaine “Anumaya Koti'a ago alino sese humalenea yafena ‘Oni'ya'agela

ohunegi afa'a alika no.' huno humainea kavefena nago'ene 'Oni'ya'age humaineanagi'na onegahue.' huka ohuo.” <sup>16</sup> Ani kavala tali'a (3) yupa huteno aupa'a ani kenamo'a ikapinaga eteno haimaine.

<sup>17</sup> Haigeno Pita'a maineno anima agea himonamo aepa'ahe agesa havige havige huno nehavige'ya Koniliasi'ma humatege'ya aya vaya'mo'ya Saimoni nofe hamavige hamavige hume hume u'ya ani nona agete'ya fiate mehete'ya mainae. <sup>18</sup> Heti'ya maine'ya ke hu'ya mage hu'ya hae “Saimoni'a nago agia Pita'e kanoa mani nopina mainefi omaiye?” hu'ya hae. <sup>19</sup> Hageno Pita'a himonahe agesa havige havige huno mainegenon Avamu'mo'a mage huno hapaiye “Havio tali'a (3) vaya'mo'ya kagai'fe megatine'ayae. <sup>20</sup> Mekatine'ayagi hetika afepinaga lavika mogo. Nagaya humatoge'ya emainagi tole kagesa ohavika afa'a amakai'enena vuo.” huno humaine.

<sup>21</sup> Higeno Pita'a tavino mage huno hamapaiye “Atimaayaya kanoa nagayae. Na'a higetama ne'ae?” huno hama-vige. <sup>22</sup> Hamavigege'ya mage hu'ya hae “Nago kanoa Koniliasi'e ati vayate kava kanogino fatago kano maineanagino 'Anumaya Kotina haiya kava hugahue.' huno humainea kanomo'a hulategeta ne'onageno ani kanomo'a Yuta vea omainea kano maineanagi Yuta vea'mo'ya 'Kanale kano maine.' hu'ya hageno nemaiyane. Nago yupa nagola alu aotage ensole kanomo'a eva'yi huno mage huno hapaiye 'Saimoni Pitafe ke hugeno kagai nopina eno nagola kea kahapaisigeka havigane.' huno

higeno hulategeta ne'one” hu'ya hapai-mainae.  
<sup>23</sup> Hageno Pita'a kenona'amia mage huno hie  
 “Nopi ehaitama emaiho.” huno hige'ya hai'ya  
 mo faete'ya kotigeno Pita'a hetino amakai'ene  
 vige'ya nago'a Yopa kumateti Yisasife havi'ya  
 amakupi malenaya vaya'mo'ya amakai'ene  
 tokae'ya umainae.

*Pita'a Koniliasi notega umaine.*

<sup>24</sup> Katega nagoke no mo faete'ya ega Sisalia  
 kumate eva'yi hageno Koniliasi'a esayafene  
 huno amakava maineno agai'a nofi vaya'ene  
 anaga'amo'yaenefe ke hige'ya melitalu hu'ya  
 mainae. <sup>25</sup> Mainageno Pita'a ani nopi hai-  
 falegeno Koniliasi'a avate eno aiyafi ape  
 humaineno muse hutene. <sup>26</sup> Musena hutetegen  
 Pita'a ali hetiteno mage huno hie “Hetio  
 nagai'enena afa kano mainoe.” huno hie.  
<sup>27</sup> Pita'a mani kea nehuno Koniliasi'ene kea  
 kea hume nopinaga haino mogeana kasago'ya  
 vea'ne melitalu hu'ya mainae.

<sup>28-29</sup> Mainageno Pita'a mage huno hie  
 tamakaitamia ago havimainae Yuta vea'mo'ya  
 Isaleli vea omainaya vea'nene maine'ya kea  
 kea huyafena ago nagalu humalenaya kea ago  
 havimainae. Anumaya Koti'a nagaila navelino  
 mage hie “Nago kanohena ‘Oni'ya'age kano  
 mainane.’ huka ohuo.” huno navelige'na  
 agete'na nagai'fema ke hanage'na tole nagesa  
 ohavi'na aupa'a emainogi na'a hige'ka nagai'fena  
 kea hanage'na emainoe? huno havige.

<sup>30</sup> Havigegen Koniliasi'a mage huno hapaiye  
 “Tali'a (3) kana ago euno nagasege'na une

kanalega tali (3) kiloki noni'afi maine'na Anumayamotega nunamu hu'na havinegogeno aupa'a nago kanomona kena'amo'a efe'age nehuno alave alave nehigeno naule mehetige'na agoe. <sup>31</sup> Agogeno ani kanomo'a nagaifena mage huno nahapaiye 'Anumaya Koti'a haavigana kea ago haviteno kagayama afeno'amima omalenea veala hama'maeka amamite amamite hana yana ageteno kagaifena agesa nehavie. <sup>32</sup> Nehaviafe kagaya Saimoni Pitatega vayala humatesanage'ya Yopa visae. Ani kanomona hamo'amo'a Saimonile pulamakamo augafa taga huno talo nehia kanomo nona hageli agegayale hanegeni yoka unemaiye.' huno humaine. <sup>33</sup> Hige'na nagaya aupa'a kagaitega vayala alimataloge'ya vageka kanale'ya huka emainanageta Anumayamo'a 'Hamapaiyo.' huno'ma kahapai-mainea kea havigahune huta Anumaya Koti aulagafi melitalu humainone." huno humaine.

*Pita'a Koniliasi nopi Yisasi kea huhaleno humaine.*

<sup>34-35</sup> Pita'a hetino aepa heno mage huno hie "Tamage, havuana Anumaya Koti'a vaya'mo agi'ahepi nofi'ahepi agesa havino notamianagi muki'a nofi vaya'yagafitila nago'a vea'mo'ya Anumaya Kotina amaku'a amite'ya 'Agaila haiya kavala kanale kava humainaya vea'mo'ya Anumaya Koti'a ani veafe nahaiya vea'ne mainae.' huno hie." <sup>36</sup> Huteno Anumaya Koti'a Yisasi Kalaisina hutegeni kanale kea huno Anumaya Koti'ene alino nagoke taipa falu huta maisuna kea Isaleli vea'mogatina tahapaiya

kea havimainae. Ani Yisasi Kalaisi'a muki'a  
 vea'mogatina Anumayatimo maine. <sup>37</sup> Yoni'a  
 “Kefo yatamihena tamaku'a aiyahae hisage'na  
 tina falelamategahue.” huno hamapaitegeno  
 Yisasi'a Kaliliti aepa heno muki'a Yutia kotega  
 kema humainea kavafena tamakaya ago  
 havimainae. <sup>38</sup> Anumaya Kotina Alu Aotage  
 Avamu'amo'ene tokiya'aene Nasaleti Yisasina  
 amigeno Anumaya Koti'a agai'aene tokaeno  
 maineafene huno alu kumate kumate ute ete  
 hia'amo kanale kava huno Satani'ma amatafa  
 hige'ya kalima ali-mainaya vea'mogamina  
 alino kanale humatene. <sup>39</sup> Kanale humategeta  
 tagaya muki'a Yuta vea'ma mainalegaene  
 Yelusalemuene humainea kavala taulagafiti  
 age-mainona ke tamahanepaune. Ani kava  
 hige'ya yafaga yosale asaimalageno fali-maine.  
<sup>40</sup> Falianagi tole yupa maiteno nago kanalela  
 Anumaya Koti'a fali-mainefiti alino hetitegeno  
 vea'mogati taule mo laveli-maine. <sup>41</sup> Mo  
 lavelianagi muki'a vea'mo'ya agaila o'agenagi  
 tagaya vea'ma hamapaisunafene huno Anumaya  
 Koti'a tagaila ago hapalilategeta mainonafe  
 tagaya fali-mainefiti ali hetitenea kanafina  
 Yisasi'ene tokaeta maineta ti'ene kave'ene  
 nemainone. <sup>42</sup> Nemainonanagino Yisasi'a  
 vea'mogamina mage hutama hamapaiho huno  
 humaine “Nagaya fali-mainesaya vea'nene afa'a  
 mainesaya vea'nene kaiyeke humatesuafene  
 huno Anumaya Koti'a Yisasinia hunatege'na  
 emainoe.” hutama hamapaiho. huno  
 humaine. <sup>43</sup> Yisasifena muki'a Anumaya Koti  
 amaune vaya'mo'ya mage hu'ya humainayane

“Muki'a vea'mo'ya agaife havi'ya amakupi male'ya amametiti hisageno agai'a agileti kefo ya'amia aige'amateno alitalemategahie. hu'ya humainayane.” huno hie.

*Isaleli vea omainaya vea'mo'ya Alu Aotage Avamula ali-mainae.*

<sup>44</sup> Pita'a mani kea yaufa hamanepaigeno Alu Aotage Avamu'mo'a elavino muki'a mani kema mai'ya nehaviya vea'mogami amakupina efalemaine. <sup>45-46</sup> Amakupi efalege'ya amaku amakesafiti nohaviya kea alu ke alu kefiti Anumaya Koti agia alisaga nehae. Ani kava'ma haya yafe Pita'ene emainaya vea'mo'ya Yisasi kema havimainaya Isaleli vea'mo'ya havite'ya Anumaya Koti'a ago alu vea'mogamina Alu Aotage Avamu'ama amamia yafena tusi'a amama'yo aigeno Pita'a mage huno humaine. <sup>47</sup> “Anumaya Koti'a tagaila Alu Aotage Avamu'ama taminea kava huno mani vea'nene ago amamine. Tima falematesuna kaana ta nagalua hulategahie? Tina afa'a falemategahune.” huno humaine. <sup>48</sup> Huteno amakaife mage hie “Yisasi Kalaisi agile tina falelamatesue.” huno hamapaiteno tina falematetege'ya mage hu'ya hapaiye “Tagai'ene nago'a kana tagaya maigane.” hu'ya humainae.

## 11

*Pita'a Yelusalemu uno ali'yama'ahe hama-paimaine.*

<sup>1</sup> Aposolo vaya'ene Yutia maine'ya Yisasife havi'ya amakupi malenaya vaya'ene nago'a Isaleli vaya omainaya vea'mo'ya Anumaya Koti

kea havi'ya amakupi malenae hu'ya haya kea havimainae. <sup>2-3</sup> Havigeno Pita'a Yelusalemu haino mainege'ya “Amakoya ano'ya'a taga hisaya yana tusi'a tokiya yane.” hu'ya haya Yuta vaya'mo'ya Pitafena “Kagaya havi kava nehane.” hu'ya mage hu'ya humainae “Na'a higeka amakoya ano'ya lagama ohunaya vaya'yagaenena kavela mo nenane.” hu'ya humainae.

<sup>4-5</sup> Hageno Pita'a aepa heno muki'a yama falote'ma humainea yafena hufalote huno mage huno hie nagaya Yopa kumate maine'na nunamuna nehugeno nagu nagesamo'a aiyahae hige'na himonafi agoana nagola tusi'a kena kana yana aluga aluga atupale nofi aye-malete'ya atalageno nagaite mopafi elavige'na age-mainoe. <sup>6</sup> Agoana ani yapina muki'a yaga kafa afua osifa'vea nama vayupala yapavena anifi mainageno elavi-maine. <sup>7</sup> Elavige'na ne'agogeno nagola age aino mage huno nahapaiye “Pitagae hetika ani memeyana heka no.” huno hie. <sup>8</sup> Hige'na mage hu'na hue “A'ao, Alanimogae ma ma yaga kafa kagai kaufina oni'ya'age humainege'na nagaluma humalenana yamofe tamage hu'na onenoa ya'yaga hane.” hu'na hue. <sup>9</sup> Hugeno nago'ene agea aino mage huno humaine “Anumaya Koti'a ago alino sese humalenea yafena ‘Oni'ya'agela humaine.’ huka ohuka afa'a alika no.” huno humainea kavefena nago'ene “Oni'ya'age humaineanagi'na onegahue huka ohuo.” <sup>10</sup> Ani kavala tagufa (3) yupa huteno aupa'a ani kenamo'a ikapinaga eteno hai-maine. <sup>11</sup> Haitege'ya ani kana kano'ale



tagufa (3) vayala tagaya mainona note eva'yi humainae. Ani vaya'yaga Sisaliagati nagaitega humatege'ya emainae. <sup>12</sup> Emainageno Alu Aotage Avamu'mo'a nagaifena mage huno hie “Tole kagesa ohavika amakai'ene tokaeka vuo.” huno hige'na uanagi manile mainaya sikisi'a (6) nafu'naga'ya nakai'ene umainae. Uteta ani kanomo note uva'yi huta noma'afi hai-mainone. <sup>13-14</sup> Haunageno agaya mage huno tahapaiye noni'afima ensole kanomo'ma heti-mainege'na agoana ensole kanomo'a mage huno nahapaiye “Kagaya menia nago'a vayala humatege'ya Yopa kumateti Saimoni Pitana movale'ya eho. Ani kanoma esiana kagai'ene muki'a anagakaene Yisasi'a taugafa aligatisia kea tamahapaigahie.” huno hige'na havue huno tahapaiye. <sup>15</sup> Tahapaitege'na nagaya aepa he'na kea nehugenno Alu Aotage Avamu'mo'a hagoteno tagai'ma hulatenea kava huno elavino amakai amakupina falemaine. <sup>16</sup> Nefalegeno nagesamo'a hao hige'na Anumayatimo'a humainea kele nagesa havimainoe. Ani kea mage huno humaine “Yoni'a titafateti falemateneanagi haenaga'a Alu Aotage Avamuteti falelamatesigeno tamakupina faleno maigahie.” huno humaineane. <sup>17</sup> Tagayama Yisasi Kalaisife havita tagupi maleta tametiti humainona yupa Anumaya Koti'a Alu Aotage Avamula tamineanagino ani'a huno amakai'enena Alu Aotage Avamula amamianagi'na nagaya ta'na Anumaya Koti'ma ali'yama alia ali'yana tilesue? Nagaya maleli-

otegahue huno hu-maine. <sup>18</sup> Hige'ya havite'ya kea ohu'ya maine'ya Anumaya Koti agia alisaga nehu'ya mage hu'ya humainae “Tamage Anumaya Koti'a Isaleli vea omainaya vea'nenefe ‘Tamaipa aiyahae hisage'na agola maige maige hisaya tamahaimula tamamino.’ huno humaine.” hu'ya nehae.

*Atioku kumate vea'mo'ya Yisasi ke havi'ya amakupi male'ya amametiti humainae.*

<sup>19</sup> Sitivenina hayageno falitege'ya Yisasife havi'ya amakupi malenaya vea'mogamina ali-haviya humatage'ya fale'ya alu kote kote ute ete humainae. Nago'a veala fale'ya Fonisia umaige'ya nago'a veala fale'ya Saipalusi umaige'ya nago'a veala fale'ya Atioku kumate umaine'ya Anumayamo kea Yuta vea'mogamike hamapai-mainagi alu vea'mogamina hamaopainae.

<sup>20</sup> Hamaopaiyanagi amakai amu'nopitila nago'a vayala Saipalusiti'ene Sailiniti'ene eu'ya Atioku maine'ya Kaliki vea'mogamina Yisasi'a Anumayatimofena kanale kea mohamapai-mainae.

<sup>21</sup> Hamanepaigeno Anumayamo'a tokiya'aleti amaya hige'ya kasago'ya vea'mo'ya amaku'a aiyahae hu'ya Anumayamo ke havi'ya amakupi male'ya amametitia humainae.

<sup>22</sup> Amametitia hage'ya Yelusalemu maine'ya Yisasife havi'ya amakupi malenaya vea'mo'ya ani kea havite'ya Panapasina hutageno Atioku umaine. <sup>23</sup> Anile umaineno ageana Anumaya Koti'a kayone humatea yana ageteno muse huno mage huno hamapaiye “Tamaku tamakesamo'a

tokiya'age hinagetama efi efi hutama Anumay-atimo'ene tokaetama vaiyatete hiho.” huno hamapaige hamapaige huno maine. <sup>24</sup> Anima hamapaiya kanoa Panapasi'e. Ani kanoa kanale kanogino Yisasi kema havino agupi maleno ametiti higeno Alu Aotage Avamu'mo'a agupina hiya humainea kanogino Yisasifema hamane-paige'ya kasago'ya vea'mo'ya amaku'a Yisasina amitafa humainae.

<sup>25</sup> Amitafa hageno Panapasi'a Solofe atiyegahe Tasusi umaine. <sup>26</sup> Uno atiyeno ali-falote huteno Atioku avaleno haige'ana nago kafua Yisasi anaga'ene mo lokae'ana maine'ana kasago'ya vea'mogamina Yisasi kea hamapai'age'ya Atioku mainaya vea'mo'ya hagote kanafi Yisasi anagafe “Kalisiteni vea'mogatamae.” hu'ya amakia male-nae. Tagai kefitila ani amakimo'a Kalaisi akave malaya vea'mogatamae hu'ya humainae.

*Panapasi'ene Solo'ene hunatage'ana Yelusalemu elavi-maina'e.*

<sup>27</sup> Ani kanafina nago'a Anumaya Koti amaune vayala Yelusalemuti atale'ya Atiyoku hai-mainae. <sup>28</sup> Haigeno amakai amu'nopitila nago kanomo agia Agapusi'e heti-mainegeno Alu Aotage Avamu'mo'a hapaigeno aune laga huno mage huno humaine “Tusi'a kafu hisaya kana muki'a mopale eva'yi hugahie.” huno humainea kemo'a ani kafuma efalote'ma hia kanafina Kolotiusi'a sauve kano maine. <sup>29-30</sup> Ani aunema Agapusi'a laga hia kea havite'ya Yisasife havi'ya amakupi malenaya vea'mo'ya mage hae “Yutia mainaya tafu-taganagina amaya hisune. Muki'amogata moneti hanesimogata

monea alitalu hisune.” hu'ya hute'ya alitalu hute'ya ani monea ali'ya Yisasi anaga'mogamite kava vaya'mogamina amamigahe Panapasigani Sologani hunatage'ana ani monea ali'ana umaina'e.

## 12

*Heloti'a Yemesina haegen o faligeno Pitana nofi hutene.*

<sup>1</sup> Ani kanafina Heloti'a ala sauve kanogino nago'a Yisasife havi'ya amakupi malenaya veala alino haviya humatene. <sup>2</sup> Humateteno Yemesi'a Yonina nepu'amona aya'aya naepeleti age'ya fakaligeno fali-maine. <sup>3</sup> Falitegeno Heloti'a ageana ani'ama hia kavafena Yuta vea'mo'ya amaipa havi'ya kanale haya yafe Pitana haegahe atafa humaine. Hale oki kaihame maya imu kiya kanafi ani kavala humaine. <sup>4</sup> Heloti'a Pitana atafa huno kina huteteno sikisitini'a (16) ati vayamogamifena mage huno humaine “Fo'a (4) maite maite hutama tokiya'age hutama yagaiho.” huno humaine. Ala imua Anumaya Koti'ma amakinagomo amaugafama aligati-mainea yafe amakesa hao hisaya imu kitesageno vava amaufi avaleno kaiyekea huteteno haegahe humaine. <sup>5</sup> Pita'a kina nopi mainege'ya Yisasife havi'ya amakupi malenaya vea'mo'ya tusiya hu'ya Anumaya Koti'ma aya hisiafene hu'ya nunamupitila havigeminae.

*Nago ensole kanomo'a eno kina nopiti Pitana avalegeno umaine.*

6 Havinegageno Heloti'a "Ega avale'na kaiyekea hutegahue." huno nehigeno ani kegela Pitana tole ati kanolatamogani amu'nopi tole seni nofiteti aluga aluga ayatalapi ayete'ya tole ati kanolatamogani anayapi'ene aye-maletageno faeno mainege'ya nago'a ati vaya'mo'ya heti'ya ani kina nomo fiate yagai'ya mainae. 7 Yagai-mainageno nagola Anumayamo ensole kanomo'a eva'yi higeno ani kina nomo agupinaga tusiya huno aivasa higeno ani ensole kanomo'a Pitana haopale ka'yo ne'aino aligafa nehuno mage huno hapaiye "Aupa'a hetio." huno higeno hetigeno ayapiti seni nofi'mo'a atu'maelavimaine. 8 Atu'mae-lavigeno ani ensole kanomo'a mage huno hapaiye "Kenaka'a nefaika kaiya no'ene vaiyo." huno higeno Pita'a ani'a hutegenomage huno hapaiye "Siotaka ne'vaika nakave eno." huno hie. 9 Higeno ani kina nopitila Pita'a hati-lavino akave ne'uno tole agesa haviteno aneginagi huno mage hie "Ensole kanomo'ma hia kavala himona ne'agofi afa'a falotega ne'agoe?" huno humaine. 10 Anakaya va'ana hagoteno'ma yagai-mainea ati kanoa agase'ana u'ana nago ati kanomona mogase'ana u'ana ala kumate'ma ne'vaya fiate uva'yi ha'ana tokiya'age aenileti talo humalenaya fitagino kitalako humalenaya fitamo'a agai'a aiyaki-lavige'ana nago nona agase'ana osi kate va'afiti ensole kanomo'a motaleno fanane humaine.

11 Fanane higeno Pitana agu agesamo'a aikalo higeno mage huno hie "Menia nagaya havilama hu'na nehavue Anumayamo'a agai'a ensole kano'a hutegenomage Heloti ayapitila melinatale.

Yuta vaya'mo'ya nagaila nago'a kava hunategahe amakesa havi havi haya yapitilagi naugafa meligatie.” huno humaine. <sup>12</sup> Ani agesa havime havime Malia notega umaine. Ani Malia'a Yoni Makina ita'amo'e. Ani nopi muki'a veala melitalu hu'ya Anumayamotega havinege'ya mainae. <sup>13</sup> Mainageno Pita'a kumategati ani nomo fitale mekalu kalu nehuno ke higeno nagola ali'ya muna'mona agia Lota'e yakigahe emaine. <sup>14</sup> Emaineno haviana Pitana alenaga agele haviteno aipamo'a havino muse huteno ani fita o'yakino ataleno aiyayeno nopinaga haino mage huno vea'mogamina hamapaiye “Pita'a ago fiate me heti-maine.” huno hie. <sup>15</sup> Hige'ya “Aifo'nafo ke nehane.” hu'ya hageno “A'ao, tamage nehue.” huno hige'ya “Agaya omaigi ensole kano'a emainegi mogeho.” hu'ya humainae.

<sup>16</sup> Nehageno Pita'a fitale akalu kalu maino huge huge nehige'ya fita yaki'ya agayana hige'ya agete'ya tusiya hu'ya atali talua humainae. <sup>17</sup> Amama'yoa ne'aigeno Pita'a “Kea ohutama maiho.” huno hamapaisia yafe ayateti aigo-sigosi huteno Anumayamo'ma nofi nopiti avaleno emainea yafena hamapaiteno mage huno hamapaiye “Ani kea Yemesi'ene nago'a tafu-taganagamina hamapaiho.” huno hamapaiteno hati-lavino alu'alega umaine.

<sup>18</sup> Utegeno kola otinegeno yagea va'yima nehiana ati vaya'mo'ya atali talu hute'ya “Pita'a hana'a huno hanate tataleno vie?” hu'ya ala ke nehu'ya amama'yoa tusiya huno aimaine. <sup>19</sup> Heloti'a haviteno “Pitafe atiyeho.”

huno hige'ya ati ayayana ali falote ohageno ati vaya'mogamina kaiyeke hune'amateno “Hamaege'ya faliho.” huno humaine. Huteno Yutiati tavino Sisalia mo maine.

*Heloti'a ago falimaine.*

<sup>20</sup> Heloti'a kava yagai-mainea mopafiti kave'amia ne'aliya yafe Heloti'a Taiya nemaiya vea'nene Saitoni vea'nenefe tusiya huno aipa haviya humatege'ya nago amaku amakesa havite'ya alitalu hu'ya Helotina hagote ali'ya kano'amote Palasatusite mage hu'ya me hae “Falu huta maisuna yafe kagaya Helotina hapaiyo.” hu'ya hageno agaya nago aipa ani vea'nene huteno Helotite emainae.

<sup>21</sup> Ageno Heloti'a nago kana'a amamiteno ani yupa sauve konagali kena'a faiteno sauve kanomo siale maineno aya'aya ke hamapaiye.

<sup>22</sup> Hamanepaige'ya melitalu humainaya vea'mo'ya mage hu'ya nehae “Mopale kanomo hia augafa kea nohanagi Anumaya Koti'a kema nehia kava huka nehane.” hu'ya humainae.

<sup>23</sup> Nehageno “Havige nehae.” huno ohuno Anumaya Koti agima alisaga ohia yateti aupa'a Anumayamo ensole kanomo'a me aikolino kalia amigeno hagifa'yagamo'ya aipa laga hageno fali-maine.

<sup>24</sup> Falitegeno Anumaya Koti kemo'a tokiya'age huteno muki'a kumate ute ete humainege'ya kasago'ya vea'mo'ya havite'ya Yisasina amaku'a amitafa humainae.

<sup>25</sup> Panapasi'ene Solo'ene ani monea Yelusalemu kumate ali'ana momamite'ana Yoni Makina avale'ana Yelusalemuti Atioku kumate emainae.

# 13

*Panapasi'ene Solo'ene Anumayamo aliy'a al-isa'a yafe huyogi'ya hunatage'ana vaiye-maina'e.*

<sup>1</sup> Ani Atiokua Yisasi anagapiti nago'a maine'ya amaune laga hu'ya Yisasi ke hamanepaiya vayala mainae. Ani vaya'mogami amakia Panapasi'ene Simioni'e kanomona nago agia Naisa'e. Tagai kefina ani agimo'a “Anupa kanoe.” hu'ya ne'aya agie. Ani kanoene Lusiasi'a Sailini kanoene Solo'enena Manaini'e. Ani kanoa Heloti'a Kalili kava kanomona afalu'amo'e. <sup>2</sup> Nago yupa Yisasi anaga'mo'ya kavela mosi'ya maine'ya Anumayamo agia alisaga nehu'ya muse hu'ya havinegae. Havinegageno Alu Aotage Avamu'mo'a amakaifena mage huno humaine “Panapasigani Sologania anahaote ali'yate hunateho. Nagaya nago ali'yate ago hunatenoe.” huno humaine. <sup>3</sup> Hige'ya kave mosi'ya maine'ya Anumayamotega havinege'ya ananute amaya male'ya hunatage'ana umaina'e.

*Panapasigani Sologania Saipalusi kumate umaina'e.*

<sup>4</sup> Alu Aotage Avamu'mo'a hunatege'ana Selusia tavi'ana tipi kalefi haisaga humai'ana Saipalusi kotega umaina'e. <sup>5</sup> Salamisi va'yi hu'ana Yuta vaya'mogami mono nopi hai'ana Anumaya Koti kea hamapai-maina'e. Anakai'ene Yoni Maki'a monaya humaine. <sup>6</sup> Ani Saipalusia ti amulagoyafi hanea kuma'yagale ute ete hu'ya Pafosi eva'yi humainae. Ani kumatela nago Yuta kanomo'a havige huno “Anumaya Koti aune



kano mainoe.” huno nehia kanomo agia Payisasi'e nehaya kanoa maine. Ani kanomo'a tokiya'age kava'yaga talo huno vea'nea ayemavataga nehiane. <sup>7</sup> Ani kanomo'a muki'a kanafina kava kanomo agia Sesiusi Polusi'ene nemaiyane. Sesiusi Polusi'a kanale agu agesaene kanogino Anumaya Koti ke havigahe Panapasi-gani Sologanife ke hige'ana e'ana hapai-maina'e. <sup>8</sup> Hapai'ageno ani havige'age aune kanoma Payisasi'a tokiya'age kava'ma nehia kanomona nago agia Kaliki kefiti Elimasi'e mage huno nehie “Mani kea havika kagupi omalo.” huno hefalakimaine. <sup>9-10</sup> Hefalakeanagi Solo'a nago agia Polo'e agai'a agupina Alu Aotage Avamu'mo'a hiya higeno Elimasina aulagafi age-maineno mage huno hapaiye “Kagaya Satani nafa'nemogae fatago humainea yamona kame kano'a mainane. Savale savala ke'age kano mainananagino kagai kagupina havi ke'age yamo'a hiya humaine. Na'ama hana kanomoga Anumaya Koti kamo'a fatago humainea kama haneanagi kagaya ‘Kayagimainea ka hanegi o'viho.’ huka hamanepaine. Na yu ani havi kavaka'a atalegane? <sup>11</sup> O'atalenana anona'a menia havio Anumayamona tokiya'age ayatetila kahaesigeno kaulagamo'a osi kanagano'a asu hisigeka yagea o'agegane.” huno nehigeno aupa'a aulagamo'a anile asu higeno ayate ali'ya kama avelisaya kanohe atiyemaine. <sup>12</sup> Kava kanomo'a Sesiiasi Polasi'a na'ama hia kavala ageteno Yisasife hia kene tokiya'aenefe ageteno tusi'a ama'yo aigeno ani kea alino agu'afi maleno ametiti humaine.

*Nagola Pisitia kotega hanea kumala Atioku kumate u'ana Yisasi kea hamapai-maina'e.*

<sup>13</sup> Polo'enema va'a kanolatana Pafosi kumala atale'ya tipi kalefi haisaga humai'ya nagola Pamafilia hanea kumala Pega kumate eva'yi hute'ya Yoni Maki'a ne'anataleno Yelusalemu eteno lavi-maina. <sup>14</sup> Lavige'ana anakaya Pega kumala atale'ana nago Pisitia kotega kuma'mo agia Atioku kumate eva'yi hu'ana Sapati yupa Yuta vaya'mogami mono nopi hai'ana mopale maina'e. <sup>15</sup> Mopale maina'age'ya ani mono note soka vaya'mo'ya Mosese kae-malenea kene Anumaya Koti amaune vaya'mo'yama kae-malenaya kene hapalite'ya nago kanoa hutageno uno ani kanolatafe mage huno humaine “Nelafugatana tagu'amo'ma tokiya vaisia kea tanaku'afima hanesigetannahena huhale'ageta havimano.” huno humaine. <sup>16</sup> Higeno Polo'a hetino ayana alisaga huno ke ohutama maiho huno amaveliteno mage huno humaine ‘Isaleli vaya'mogatamaene nago'a Isaleli omainaya vayala Anumaya Kotina haiya kava haya vaya'mogatamaene haviho. <sup>17</sup> Isaleli vea'mogamina Anumaya Koti'amimo'a taginagomogamife agai'a vea'ne maisayafene huno hapalimatege'ya Isipi kotega yokala umaiyana Anumaya Koti'a amaya hige'ya tokiya'age vea'ne aitagufe'ya kasago hageno agai'a tokiya'aleti Isipi kotegatila amavalege'ya atale'ya umainae. <sup>18</sup> Amavaleno vige'ya foti'a (40) kafu amakai'ene ka'me kotega umaineno veganokano kava'ma haya kava'amihe mailama huno maineno yagaino maine. <sup>19</sup> Anumaya Koti'a

seveni'a (7) nofi vea'mo'ya Kenani nemaiya vea'mogamina hamae ha'no hige'ya faligeno amakai mopa Isaleli vea'mo'ya maisaya yafene huno alino amamine.

<sup>20</sup> Amamige'ya fo hataleti fifiti'a (450) kafu ani kumatela mainageno anile Anumaya Koti'a kasago'ya uhagotematesaya vayala amamige'ya amakaya maime maime nehaigeno haenaga'a nagola Anumaya Kotina aune kano'a Samueli'a eva'yi humaineane. <sup>21</sup> Eva'yi hige'ya “Ala sauve kanotia lamio.” hu'ya hageno Anumaya Koti'a Solona amamine. Ani kanomona nefa agia Kisi'e. Penisamini nofi kano maineanagino Solo'a foti'a (40) kafu kava yagaimateneane. <sup>22</sup> Kava yagaimateno maineanagino Anumaya Koti'a ne'ataleno Tevitina hutegenoa ala sauve kano'amia maineane. Anumaya Koti'a Tevitifena mage huno humaineane

“Yesi nafa'nea Tevitifena nagai'ene nagoke ta'agu ta'agesa haneanagino Teviti'a muki'a nagai'ma nahaiya kavala hugahie.” huno humaineane.

<sup>23</sup> Anumaya Koti'a nayona hulokiya vaino mage huno humaine “Tevitina aginagomopiti tamau-gafa aligatisia kanoa falote hugahie.” huno humaineaganino ani kanoa Yisasi'e taugafa aligatisia kano emaine.

<sup>24</sup> Yisasi'a falote ohunea kanafina Yoni'a Isaleli vea'mogamina “Kefo yatamihe tamaku'a aiya-hae hutama tina faleho.” huno hamapai-maine. <sup>25</sup> Yoni'a ali'yama'a alino avaya ayegahe nehuno mage huno humaine “Tamakaya nagai'fena ‘Anumaya Koti'a taugafa aligatigahe hutenea kano

emaine.' hutama nehayanagi nagaya ani kanoa omainogi ani kanoa aupa'a egahianagi'na nagaya afa kanogi'na agai aiyale ayesuana onategahie." huno humaine.

<sup>26</sup> Nafu-naganagatama Apalahamupiti anaga'mogatamaene nago'a Isaleli omainaya vayala Anumaya Kotina haiya kava haya vaya'mogatamaene Anumaya Koti'a tamaugafa aligatigahe humainea kea muki'amogatile eva'yi humaine. <sup>27</sup> Yelusalemu mainaya vea'mo'ya kava vaya'amiene Yisasina agelama ohunae. Muki'a sapati kanafina amaune vaya'mo'ya Yisasina kaiyeke hutete'ya haesaya yafema kaemalenaya kea hapaliyanagi aepa'a havilama hu'ya ohavinae. Yisasina kaiyekema hutenaya yafe humainaya kemo'a ago falote huno tamage humaine. <sup>28</sup> Kaiyekea hutete'ya haesageno falisia augafa kefo kavala ohuneanagi Pailatife "Afa'a haegeni falino." hu'ya humainae. <sup>29</sup> Muki'a amaune vaya'mo'ya agaifema humalenaya kemo'a falote huno ago tamage hige'ya yafaga yosaleti augafa'a ali'ya yafakapi mohevaitenae. <sup>30</sup> Mo hevaitayanagi Anumaya Koti'a fali-mainefiti alino hetitene. <sup>31</sup> Hetitegeno Yisasi'a agai'aenema Kaliliti Yelusalemu hai-mainaya anaga'amo'ya amaulagafiti kasago'ya yupa eva'yi hige'ya age-mainayanagi'ya menia agaifena muki'a Yuta vea'mogamina hamanepaiye. <sup>32</sup> Hamapai-mainaya yafe tagayaene Anumaya Koti'a tamakinagomogamina hulokiya vaino hamapai-mainea kemona kanale ke tamakaila tamahapaigahe emainone. <sup>33</sup> Ani kemo'a falote huno tamagema

hisiafene huno Anumaya Koti'a tagaila amakinagomogati taulagafi Yisasina ago alino hetitene. Mani kea Yagame Avopi tu (2) molia sapta mage hu'ya kae-malenaē

“Kagaya menia nafa'ne'nimoga mainane. Meni kano'a nagaya Negafa'na mainoe.” huno kae-maleneane.

<sup>34</sup> Yisasi'a fali-mainefiti ago ali hetiteneafe eteno falino komufinaga mo okasalisiafene huno nayona Anumaya Koti'a mage huno humaineane

“Tevitina ‘Ha'no ohu manua kanale manu kami-gahue.’ hu'na humainoa manua tamakaila tamamigahue” huno humaineane.

<sup>35</sup> Ani yafe nago kemo'a nago auta'mafina mage huno hu-maineane

“Kagaya kanale'ya huka huyogi-malenana ali'ya kanokamona Anumayamoga atalesanageno augafamo'a komufinaga okasaligahie.” huno humaineane.

<sup>36-37</sup> Mani kea Tevitifena ohune. Teviti'a ma mopale mainea kanafina Anumaya Kotina haiya kava humaineaganino falige'ya toto'amogami hevaimatenaya matimatipi augafamo'a kasali-maineanagi Anumaya Koti'a Yisasina fali-mainefiti ali hetitenea kanomo augafamo'a okasaline. <sup>38</sup> Ani yafe nafu'naganagatama havilama hutama haviho ani kanomo'ma hulatenea kavafe Anumaya Koti'a kefo yatamia aigetamateno atalelamatene huta tamahanepaune. <sup>39</sup> Mosese'ma kahegi malenea kemonā akave malesunageno Anumaya Koti'a kefo yatia aigetatenō atalelategahie hutama tamametiti hisayana aigetamateno

ataleotamategahigi Yisasife havitama tamakupi maletama tamametiti hisageno Yisasi'ma fali-mainea yateti Anumaya Koti'a muki'a kefo yatamia aigetamateno atale-lamategahie. <sup>40-41</sup> Amaune vaya'mo'ya mage hu'ya kae-malenaē

“Tamakaya kamuge hatagetama vaine'amataya vea'mogatama tamakaya mainaya kanafina nagaya Anumaya Koti'na tusiya hu'na tokiya'age avame yana hugahue. Ani yafe vea'mo'ya tamahapaisagetama ‘Tamage nehae.’ hutama ohugahae ani yafe tamama'yoa ainagetama faligahae.” hu'ya kae-malenayane. Mani amaune vaya'ma kae-malenaya kea tamakaite eva'yi hugahigi ka'ye ho. huno humaine.

<sup>42</sup> Polo'a mani kea huteno Panapasi'ene hati-lavi'ana ugahe neha'age'ya alitalu humainaya vea'mo'ya mage hae “Nago Sapati yupa ani monola nago'ene me lahapai'o.” hu'ya humainae. <sup>43</sup> Nehu'ya monola ha'no hige'ya hati-lavi'ya muki'a Yuta vaya'ene Anumaya Koti kema nehaviya anagala Yuta vea omainaya vea'nene Pologani Panapasigania anakave ne'vage'ana mage hu'ana hamapai'e “Tokiya'age hutama Anumaya Koti'a kayone hulamatesia yama tamaminea yapi maiho.” hu'ana humaina'e.

<sup>44</sup> Nago Sapati yupa muki'a ani kumate vea'mo'ya Anumayamo ke havigahe melitalu humainae. <sup>45</sup> Melitalu hu'ya mainage'ya Yuta vaya'mo'ya agete'ya amaipamo'a haviya hige'ya Polo'ma hia kehena “Havige nehie.” hu'ya hu-haviya hutenaē. <sup>46</sup> Hu-haviya hunatayanagi

Pologani Panapasigania tokiya'age kea mage hu'ana ha'e "Tamakaya Yuta vea'mogatamina hagoteta'a Anumaya Koti kea tamahapaigahe hu'anagi mani kemona tamakave'no hutetama 'Agola maige maige hisuna tahaimu alisuna yafena notahaiyanagita o'aligahune.' hutama haya yafe tamakaila tamataleta'a Isaleli vea omainaya vea'mogamina mo-hama-paigahu'e. <sup>47</sup> Na'a hisu'afene huno Anumayamo'a mage huno lahapai-mainene

'Isaleli vea omainaya vea'mogamina aye-halematesayafene hu'na ago hulamatenoe. Muki'a mopaene mopaene mainaya vea'mogamina amaku amamena aligatisuafene hutama hamapaigahae.' huno humaineane." hu'ana humaina'e.

<sup>48</sup> Neha'age'ya Isaleli vea omainaya vea'mo'ya mani kea havite'ya tusi'a muse hu'ya Anumayamo kea alisaga humainae. Na'a nehuya Anumaya Kotina haigeno'ma "Agola maige maige hisaya tamahaimula aligahae." huno hapali-malenea vea'mo'ya mani kea havite'ya ali'ya amakupi male'ya amametiti humainae. <sup>49</sup> Amametiti hageno Anumayamo kemo'a muki'a kotega ute ete humaine. <sup>50</sup> Ute ete humaineanagi Yuta vaya'mo'ya ala amakima hanea a'neyaga mono kema nehaviya a'neyagamogami amaipaene kava vaya'mogami amaipaene hu'ya ali hetige'ya aepa he'ya Pologani Panapasiganina ali haviya-hunatete'ya ani kumategati ananati-talena. <sup>51</sup> Ananati-talage'ana anakaya "Mani kavala havi kava nehae." hu'ana ani kumapiti kugukege yana

anaiyafitila aifopo hune'atalete'ana Aikoniamu umaina'e. <sup>52</sup> Va'anagi Yisasi kema havi'ya amakupi malenaya vea'mo'ya tusi'a muse hageno Alu Aotage Avamu'mo'a amakupina hiya humaine.

## 14

*Pologani Panapasigania Aikoniamu u'ana Yisasi mono kea hamapai-maina'e.*

<sup>1</sup> Pologani Panapasigania Aikoniamu elavi-va'yi hu'ana Yuta vea'mogami mono nopi hai'ana kanale mono ke hamapai'age'ya kasago'ya Yuta vea'mo'yaene Kaliki vea'mo'yaene havi'ya amakupi male'ya amametiti humainae. <sup>2</sup> Na'a ha'anagi nago'a Yuta vea'mo'ya “Yisasi kelefena tametiti ohugahune.” hu'ya nehaya Yuta vea'mo'ya havige hu'ya Isaleli vea omainaya vea'mogamina Yisasi anagafe “Kefo kava nehae.” hu'ya hu-atile-male hu'ya amaipa kafa hematenae. <sup>3</sup> Na'a hayanagi Pologani Panapasigania aya'aya kana anile maine'ana tokiya'age hu'ana Anumayamo kea huhala'ageno Anumayamo'a anaya huno agai'a kayone humatesia kea havisayafene huno tokiya'a anamige'ana tokiya'age avame ya'yaga humaina'e. <sup>4</sup> Ani kava ha'age'ya ani kumate vea'mo'ya tolefi ali'ya fako hu'ya nago'a vea'mo'ya mage hae “Yuta vaya'mo'ya tamage nehae.” hu'ya hayanagi nago'a vea'mo'ya mage hae “A'ao, Aposolo vaya'mo'ya tamagea nehae.” hu'ya humainae.



5 Hute'ya Yuta vaya'ene Isaleli vea omainaya vaya'ene kava vaya'amiene mage hae “Pologani Panapasiganina ali haviya hunateteta yafa ka'yoteti hanaesunage'ana faliga'e.” hu'ya humainae. 6-7 Hage'ana mani kea havite'ana fale'ana Likonia kotega hanea kumatalate Lisitala kumate'ene Tepe kumate'ene u'ana anilega hanea kuma'yagalega umaine'ana Yisasifena kanale mono kea hamapai-maina'e.

8 Lisitala kumatela nago kanoa maine. Ani kanoa atenelegati aiya avayu humai kanoa vaiyatete nohia kanoa anile mopale maine. 9-10 Mopale maineno Polo'ma hia kea maino nehavigeno Polo'a aulu heno ageana ani kanomo'a Yisasifema havino agupi maleno ametiti hia tokiya'a hanegenno Polo'a agupinaga havia kea ago haviteno ala kegefafiti mage huno hie “Kaiya ayepi huka hetika maiyo.” huno higeno aupa'a halelako humaino hetino ute ete humaine.

11 Ute ete hige'ya alitalu humainaya vea'mo'ya Polo'ma hutea kavala agete'ya ala kefiti ailalupe'ya Likonia vea'mogami kefiti mage hu'ya hae “Tagai anumayatia vaya kana hu'ya tagaitela elavi-mainae.” hu'ya humainae. 12 Nehu'ya Panapasife “Nago anumayati maine. Agia Susi maine.” hu'ya nehu'ya Polo'a kasago'ya kema hia yafe “Nago anumayati maine. Agia Hemesi emaine.” hu'ya humainae. 13 Susi agima alisaga nehaya nona ani kuma'mo agegayalega hanegenno ani note kava kanomo'a ve pulumakaene ta'mu vailinea ause'aene ani kuma'mo hi'onale alino muki'a vea'nene ani

tole kanomofe pulamaka he'ya kae-salamana hunategahe humainae.

14-15 Hunategahe nehage'ana Aposolo kanolatamogania Pologani Panapasigania mani kea havite'ana “Havi kava hugahe nehae.” hu'ana kena'ania ali hatata hutale'ana anima alitalu humainaya vea'mogami amu'nopi anaiyaye'ana va'a'yamogani ala kefiti mage ha'e “Nela'afugatamae na'a higetama mani kavala nehae? Ta'agaya vayatafa maino'agi tamakai kana huta'a mopale vaya maino'e. Kanale mono kea tamahapaigahe ta'agaya emaino'e. Afa kava hutama haimula omale mani'mo agi alisaga nehagi ani kavala ne'ataletama tamaku'a aiyahae hutama Anumaya Kotina tamaku'a amitafa hiho. Ani Anumaya Koti'a ofalisia kano maine. Ika'ene mopaene hageli'ene talo humalene. Muki'a ani lipi mainaya kafayagaene ikatega mainaya namaene mopale mainaya afuene vea'nene talo humaleneane.

16 Nayo kanafina alu nofi alu nofi vea'nemo'ya amakai'ami hamaiya kate vaiyatete mai'ya hageno Anumaya Koti'a kahegi o'amatene

17 Kahegi o'amateneanagi ‘Nagaya ma mainoe.’ huno amaveligahe huno kanale kavala humateno ikapinatigatila kola lamamino hoyafina kanale kavala lamamino tamaku tamamemo'a muse hisia yana male hiya hulamatene.” hu'ana neha'e.

18 Mani kea ha'anagi ani vea'mo'ya anakaila afu he'ya kae-salamana henategahe nehage'ana “A'ao.” hu'ana tokiya'age ke ha'a yafe atalena.

19 Nago'a Yuta vaya'mo'ya Atiokuti'ene

Aikoniamuti'ene anile eva'yi hu'ya alitalu humainaya vaya'mogami amaipamona hu'ya ali hetimatage'ya yafa ka'yoteti Polona haete'ya agayana hige'ya “Ago fali-maine.” hu'ya amakesa havite'ya kuma'mona malaga avayu hu'ya mo talenae. <sup>20</sup> Mo talayanagi Yisasife haviya amakupi malenaya vaya'mo'ya aya'amo'ya me maigagitageno anileti hetino kumatega mo faeteno kotigeno Panapasi'ene Tepe kumala ne'atale'ana umaina'e.

<sup>21-22</sup> Va'a'yamogani ani kumate vaya'mogamina Yisasi mono kea hamapai'age'ya kasago'ya vea'mo'ya Yisasife havi'ya amakupi male'ya amametiti hage'ana ete'ana Lisitala kumate haite'ana Aikoniamu hai'ana Atioku kumate eva'ana anile maine'ya Yisasife havi'ya amakupi male'ya amametiti humainaya vea'mogami amaku amamema ali lokiya vaisaya kea mage hu'ana hamapai'e “Tokiya'age hutama tamaku'a Yisasina amitafa haya yana muki'a kanafina ani kateke'ya vaiyatete hiho. Anumaya Kotife ‘Kava yagailato.’ hu'ya nehaya vea'mo'ya ma mopale mainageno kana ya'yagamo'a amaugafale falote hisianagi haenaga'a kanale kumatela ugahae.” hu'ana hamapai'e. <sup>23</sup> Alu mono note alu mono note ute ete hu'ana kave mosi'ya Anumayamotega havige'ya Yisasina amaku'ama aminaya vayapiti kava yagaisaya soka vayala hapali'ana “Kagayae kagayae.” hu'ana humatete'ana mage ha'e “Tamaku'ama amitafa haya Anumayamo ayapi tamaya hisia yafe nelamato'e.” humatete'ana amatete'ana umaina'e.

*Polo'ene Panapasi'ene ete'ana Silia kotega hanea kumala Atioku kumate elavi-maina'e.*

<sup>24</sup> Elavi'ana Pisitia kola mogase'ana nago Pamafilia hanea kumala Pega kumate eva'yi humaina'e. <sup>25</sup> Pega kumate vea'mogamina Yisasi mono kea hamapaite'ana anileti ne'amatale'ana Atalia kumate tavi-maina'e. <sup>26</sup> Anileti tipi kalefi haisaga humai'ageno anavaleno vige'ana Atioku kumate ete'ana hai-maina'e. Nayona ani kumate maine'ya Yisasina amaku'a aminaya vea'mo'ya “Anumaya Koti'a tanaya hisigetana agai kea mohamapai'o.” hu'ya hunatenaya kumatelagi'ana ani ali'yana ali-vayayete'ana ete'ana umaina'e.

<sup>27</sup> Ago eva'yi hu'ana Yisasi anagafe “Melitalu hiho.” ha'age'ya age'ana Anumaya Koti'a anakai'ene tokaeno mainege'ana muki'ama humaina'a kavafena hamapaite'ana Isaleli omainaya vea'nene Yisasife havi'ya amakupi male'ya amametiti haya yafe Anumaya Koti'a fita ago yakimatene hu'ana hamapai'e. <sup>28</sup> Ani Atioku kumatela Yisasi kema nehaviya vea'nenena aya'aya kanagefa anilega maina'e.

## 15

*Kasago'ya vea'mo'ya Yisasina amaku'a aminaya vea'mo'ya Yelusalemu melitalu humainae.*

<sup>1</sup> Polo'ene Panapasi'ene Atioku kumate Yisasi anaga'ene maina'age'ya nago'a vaya'mo'ya Yutiati elavi'ya mage hu'ya hamapaiye “Mosese'ma ‘Tamakoya ano'ya taga hiho.’ huno humainea kea akave omalesayana Anumaya Koti'a tamaku tamamena aliokatigahie.” hu'ya

humainae. <sup>2</sup> Hage'ana Polo'ene Panapasi'ene “A'ao, tamakaya havige nehae.” hu'ana amakai'ene tusi'a ke vaite'ya ani kema fatago hisaya yafe Polo'ene Panapasi'ene nago'a vaya'ene mo hamavigegahe Aposolo vayategaene mono note kava vayategaene humatage'ya Yelusalemu haimainae.

<sup>3</sup> Yisasi anaga'mo'ya humatage'ya katega vayana Fonisia kotegaene Samelia kotegaene alu kumate kumate ute ete hu'ya Isaleli vea'ne omainaya vea'mo'ya amaku'a aiyahae hu'ya Yisasina amaku'a aminaya kea amafu'amakanagamina hamapaige'ya havite'ya tusi'a muse humainae. <sup>4</sup> Muse hage'ya Yelusalemu uva'yi hage'ya alitaluma humainaya Yisasi anaga'mo'yaene Aposolo vaya'ene soka vaya'yagaene falu fala humatage'ya muki'a Anumaya Koti'a anakai'ene tokaeno humainea kavafena hamapai-maina'e. <sup>5</sup> Hamapai'age'ya nago'a Falasia vayala Yisasina amaku'a aminaya vaya'mo'ya mage hu'ya humainae “Isaleli vea'ne omainaya vea'mo'ya Yisasina amaku'ama aminesayana ani'a hutama amakoya ano'ya taga hiho. Mosese kahegi kemo akave maleho huta kahegi malesune.” hu'ya humainae.

<sup>6</sup> Hage'ya ani kema humainaya ke fako hugahe Aposolo vaya'ene soka vaya'mo'yaene melitalu humainae. <sup>7</sup> Melitalu humaletе'ya kasago'ya ke-yeso mai'ya hutageno Pita'a hetino mage huno humaine nafu'naganagatama tamakaya havimainae nayona Anumaya Koti'a tamakaip-iti nagaifena “Kagayae.” huno “Isaleli vea'ne omainaya vea'mogamina Yisasi kanale mono

kea hamapaisanage'ya havite'ya ali'ya amakupi male'ya amametiti hugahae.” huno humaineane. <sup>8</sup> Anumaya Koti'a tagu'afina ago agelama huno agemainea kanogino ageana “Ani vea'mo'ya amaku'a ago namitafa hageno tagai'ma Alu Aotage Avamu'mo'ma taminea kava huno ani veala amamine. <sup>9</sup> Nago'ke avamete huno Alu Aotage Avamula amamine. Yisasifenema hu'ya havi'ya amakupi malenayafene huno amakupima hanea kefo ya'amia ago aye ha'mi-talene. <sup>10</sup> Ago aye ha'mi-talenegi na'a higetama Anumaya Koti'ma humainea kavafena ‘Afa ya kana yane.’ hutama tusi'a kana'age yana alitama Yisasina amaku'a aminaya veatela malegahe nehae. Nayona tagi-nagomo'ya Mosesel'ma taminea kea akavela omalenayane tagayaenena menia akave malesuna tagamula omalene. <sup>11</sup> Omaleneanagi ‘Anumayatimo'a Yisasi ali kayone hulateno kefo yatihe huno faliteno tagu tamena aligatimaine.’ huta tametiti nehunanagi ani yateti Isaleli vea'ne omainaya vea'mogami amaku amamena ago aligatimaine.” huno humaine.

<sup>12</sup> Pita'a mani kea hianagi muki'ama alitalu humainaya vaya'mo'ya nago ke kano'a ohunae. Ohage'ana Panapasi'ene Polo'ene Isaleli vea'ne omainaya vea'mogami amu'nopi Anumaya Koti'ma anakai anayapima tokiya'age avame yama humainea yafena hamapai'a'age'ya havimainae. <sup>13</sup> Nehavigeno Yemesi'a hetino mage huno humaine “Nafu'naganagatama nagai kea haviho. <sup>14-15</sup> Anumaya Koti'a ehe kanafima Isaleli vea'ne omainaya veala amaya hugahe

via'yamo ani veapitila agai'a vea'ne maisaya yafene huno amavale-maine. Saimoni Pita'a ago tahapaigeta havimainonagi ani kea Anumaya Koti amaune vaya'mo'ya mage hu'ya nayona kae-malenayane

16 'Mani kanamo'a ha'no hisige'na nagaya Anumaya Koti'na Teviti nofi anagala nago no kana hu-mainayanagi'ya tagapema ailavisayana nagaya ete'na ali'na hetigahue. Ali-haviya hutalenaya nona ete'na kigahue. <sup>17-18</sup> Alisaga hugahuanagi muki'a vea'nemo'ya nagaifena natiyegahae. Isaleli vea'ne omainaya vea'nemogamina nagaya ago hapali-malenoa vea'mo'ya nagaife havi'ya nati-yegahae. Nagaya Anumaya Koti'na ago nayona tamahapaugetama havimainaya kavafe mani kea nehue.' huno aune kano'amo'a kae-maleneane.

19 Ani yafe nagayama havua nagesamo'a mage nehie Isaleli vea'ne omainaya vayapiti Yisasina amaku'a amitafa humainaya vea'mogamina kana yana o'amamisune. <sup>20</sup> Avo kaeta 'Mage hutama hiho.' huta hamapaisune 'Fali-mainaya veafe 'Anumayati mainae.' hu'ya amakisana ne'vai'ya malenesaya kavala onesae. A'ne muna'ne amavayu nehisaya kavala ataleho. Kollamo'a agusafinaga hanesia afuene kola'enena oneho.' huta hamapaisune. <sup>21</sup> Nayona aepa he'ya muki'a kotega Yuta vaya'mogami mono nopina muki'a Sapati yupa Moses kea hapali'ya nehaviyane. Nehaviyanagi havite'ya akave'ma

malenu'yahena akave malegahae.” huno humaineane.

*Isaleli vea'ne omainaya vayapiti Yisasina amaku'a aminaya vea'nefi mani avona kae'ya amaminae.*

<sup>22</sup> Aposolo vaya'ene soka vaya'ene Yisasi anaga'aene muki'a alitalu humaine'ya kea havite'ya “Kanalele.” hu'ya amakaipiti tole kanolatana hesaga hute'ya hunatage'ana Polo'ene Panapasi'ene Atioku kumate umainae. Anima hunataya kanolatana kava kanolata'ami maina'e. Anakia Yutasi Pasapasi'ene Sailasi'ene hunatage'ana umaina'e. <sup>23</sup> Avona kaete'ya ani kanolatamogani anayapina malete'ya mage hu'ya kae-malena.

Tagaya Aposolo vaya'ene soka vaya'ene mani avona kaeta Isaleli vea'ne omainaya vayapiti'ma Yisasife havitama tamakupi maletama tamametiti nehaya tafu-taganagatama Atioku kotegaene Silia kotegaene Silisia kotegaene mainaya vea'mogatama “Felugae.” huta avona kaeta nelamamune. <sup>24</sup> Tagayama havunana nago'a vaya'mo'ya tagaipitila nago'a tamakesa ku'mo hutama tole lamakesa havisaya augafa kea mo lamahapaiyanagi tagaya “Ani kea hiho.” huta hu-o'ama-tenone. <sup>25-26</sup> Hu-o'amatennonafene huta melitalu hagea kea huta ha'ya kiteta tole kanolatana tagaipitila tahau tayamopafi nelahaiya kanolata hunatonage'ana Anumayatimo'a, Yisasi Kalaisina agai ke hamane'paila yateti hanaesage'ana falisa'a yafena anama'yoa o'ai kanolatane, Panapasi'ene Polo'ene tamakaitega ugahe neha'e. <sup>27</sup> Yutasi'ene



Sailasi'ene hunatesunage'ana tamakaitega humainona kea anavayafiti mo lamahapaiga'e. <sup>28-29</sup> Alu Aotage Avamu'mo'a tagai'ene mainegeta kea kea huteta “Kanalele nago'a kana yana amayo'nalela omalegahunagi ma yama'age akave malesae. Fali-mainaya veafe amakisana vai'ya atupa kave alisaga hu'ya malesaya kavela oneho. Kolamo'a agusafinaga hanesia afuene kola'enena onesae. A'ne muna'ne amavayu nehisaya kavala ohisae. Ani kava'ma ohisayana kanale'ya hu'ya maigahae. Ketia male me ha'no hie.” hu'ya kae-malena.

<sup>30-31</sup> Kae-malete'ya humatage'ya Atioku lavi'ya Yisasi anaga'mogamina molitalu humatete'ya mani avona amamige'ya hapali'ya havite'ya humainaya kehena tusi'a muse humainae. <sup>32</sup> Muse hage'ana Yutasi'ene Sailasi'ene Anumayamo aune kanolata maine'ana aya'aya kea amaku amamema alilokiya vaisaya kea hamapai-maina'e. <sup>33-34</sup> Ani kea hute'ana aya'aya kanagefa amakai'enena maite'ana ete'ana va'age'ya ali falu fala hunatetage'ana hunatenaya vayatega ete'ana umaina'e.

<sup>35</sup> Vage'ana Polo'ene Panapasi'ene Atioku maine'ana nago'a vea'nene ailokae'ana Yisasi kea hamapai'ana maina'e.

*Polo'ene Panapasi'enena nagoke anaipalela omaina'e.*

<sup>36</sup> Nago'a kana maite'ana Polo'a Panapasifena mage huno humaine “Eteta'a muki'a kumate Yisasi mono ke hamapai-maino'a kumate ute ete huta'a tafu-tagana'ya kanale'ya hu'ya

mainafi haviya hu'ya mainafi uta'a mogesu'e." huno humaine. <sup>37-38</sup> Higeno Panapasi'a "Yoni Maki avale-lineta'a ugahu'e." huno hianagi Polo'a mage hie "A'ao, ani kanomo'a hagoteno ta'agai'enema viana Pamafilia kumate mo nela'ataleno ali'yana o'alino umaineane." huno humaine. <sup>39</sup> Hige'ana ani yateti tolefi ali'ana fako hu'ana anahaote anahaote umaina'e. Panapasi'a Makina ne'avaleno tipi kalefi haisaga humai'ageno Saipalusi anavaleno umaine. <sup>40</sup> Va'ageno Polo'a anona'a Sailasina avalege'ya afu'agana'ya Anumayamotega havige'ya mage hae "Kategama visa'ana Anumayamo'a kayone hulanateteno tanaya hisie." hu'ya hage'ana umaina'e. <sup>41</sup> Silia kotegaene Silisia kotegaene ute ete hu'ana Yisasi anaga'mogamina amaku amamena ali lokiya vaimate'ana amaya humaina'e.

## 16

*Timoti'a aepa heno Polo'ene Sailasi'ene tokae'ya vaiye-mainae.*

<sup>1</sup> Polo'a Tepi kumate uno Lisitala kumate umaine. Ani kumatela nagola Yisasife havino agupi malenea kanoa maine. Agia Timoti'e. Ani kanomo'a Yuta a'mo nafa'ne mainegi nefa'a Isaleli kanoa omainegi, Kaliki kano mainegeni, ita'amo'a Yisasina agu'a amitafa humainea alagino maine. <sup>2</sup> Ani Lisatalaene Aikoniamuenema maine'ya Yisasi anaga'mo'ya Timotifena "Kanale kano maine." hu'ya humainae. <sup>3</sup> Hageno Polo'a Timotifena mage hie "Ta'agai'ene tokaeta vaiyesune." Visuna kotega

mainaya Isaleli vea'mo'ya kagaila negafa'a Isaleli kanoa omainegi, Kaliki kano maine, hu'ya ago havimainagi havigu ani yafe amaipa haviya huyafene huno nehuno Timotina avaleno Mosese kemo akave maleno agoya ano'ya laga humaine. <sup>4</sup> Na'a hute'ya alu kumate kumate ne'u'ya Yelusalemu mainaya Aposolo vaya'ene soka vaya'ene humalenaya kema akave malesaya yafe hamapai-mainae. <sup>5</sup> Hamapaige'ya Yisasi anaga'mogamina amametiti humainaya yamona tokiya'age hige'ya muki'a yupa nago'a vea'nea ete ete hu'ya egasago hage'ya amakai'enena tokae'ya mainae.

*Polo'a himonafi nago Masetonia kanoa age-mainae.*

<sup>6</sup> Alu Aotage Avamu'mo'a “Esia kotega\* nagai ke hamaopaigahae.” huno nagalu humateneanagi'ya Polo'agi Sailasi'agi Timotigamina Faligia kotegaene Kalesia kotegaene umainae. <sup>7</sup> Misia kotega uva'yi hu'ya Pitinia haigahe hayanagi Yisasi Avamu'mo'a “O'viho.” huno nagalu humatene. <sup>8</sup> Nagalu humatege'ya Misia kola agase'ya Taloasi kumate elavi-mainae. <sup>9-10</sup> Ani kegela Polo'a nagola himona kana ya ageana nagola Masetonia kotega kanomo'a hetino maineno ke huno mage huno humaine “Kagaya hagelina lakaeka Masetonia me laha'mao.” huno higeno Polo'a agetegeta Anumaya Koti'a tagaife “Ani kotega utama vea'mogamina Yisasife kanale mono ke mo hamapaiho.” huno humaineanagita tagaya aupa'a Masetonia visuna kafe atine'ayone.

*Litia'a Anumayamote agu'a aiyahae humaine.*

11-12 Taloasiti tipi kalefi haisaga humaunageno tavaleteno aiyayeno fatago huno Samotalesia ti amu'nopi hanea kumate euva'yi higeta mo faeteta natena ufatago huno haigeta Neapolisi hai va'yi huteta mopafi euta Filipai kumate euva'yi humainone. Filipai kumala Masetonia vea'mogamina ala kuma'amie. Nayona Lomu vea'nea e'ya mainaya kumale. Tagaya ani kumate euva'yi huta nago'a kana mainone. <sup>13</sup> Maineta Sapati yupa ani kuma'mona kegi'yamo hi'yenale uteta titega lavita anilega Anumayamotega havinegaya kumala hane huta lavunanagi nago'a a'neyaga alitalu hu'ya mainageta Yisasi kea mo hamapai-mainone. <sup>14</sup> Hamanepaunageno nagola ani kema maino havia a'mo agia Litia'e. Tayataila kumateti alagino haesate oko kena talo huno mone ali'ya ne'alia alagi Isaleli vea'ne omainaya veapiti a maineanagi aluya huno Anumaya Koti agia alisaga nehia alagino ani a'mo'a Polo'ma hia ke maino nehavigeno Anumaya Koti'a agu'a alino aiyahae huteno havisia agu agesa amine. <sup>15</sup> Amigeno haviteno haenaga'a muki'a agai'a anaga'aene tina fale-matenae. Tina fale-matetageno tagaila mage huno lahapaiye “Musetami nehue nagaifema ‘Yisasina agu'a amitafa hia a maine.’ hutama hinutamahena nagaila noni'afi emaiho.” huno tokiya'age ke higeta agayama hia kea akave malenone.

*Polo'ene Sailasi'ene Filipai kumate nofi humaina'e.*

16 Nago yupa Anumayamotega havinegona kumate ugahe katega ne'unageno nago nofipi maineno miya no'alia ali'ya ne'alia munala katega fotu hunanagi Kefo Avamu'mo'a agu'afi mainegenon aune laga huno haenagama va'yi hisia yafema havigageno'a hufalote huno hamaneapaiya munalagi'ya kava vaya'amo'ya humainea keletila tusi'a mone ne'aliyane.

17 Ani muna'mo'a Polo'ene tagai'ene takave ne'eno keha keha huno mage hie “Ma vayala anafinaga mainea Anumaya Kotina ali'ya vaya'amo'ya. Anumaya Koti'ma tamaku tamamema aligatisiafe kanale kate kea tamahanepaiye.” huno humaine. 18 Nehuno muki'a yupa ani kege'ya maino higeno Polona aipamo'a haviya higeno maiyaha'e huno ani Kefo Avamu'mofe mage huno humaine “Yisasi Kalaisina agai agileti kahanepauve ani muna'mo agupitila hati-lavika vuo.” huno higeno aupa'a ani Kefo Avamu'mo'a ataleno umaine.

19 Vige'ya ani muna'mo kava vaya'amo'ya agayana hige'ya monema ne'aliya kamo'a ti-lege'ya aepa'a agete'ya Pologani Sailasiganina anatafa hute'ya anavayu hu'ya vea atagu nefaya kumapi kaiyeke hunatesaya vayate anavale'ya umainae. 20 Yasi vayate anavale'ya mage hu'ya mo hamapaiye “Ma kanolatana Yuta kanolatnagi'ana tagai kuma alihaviya neha'e. 21 Vea'ne amavaya hu'ana ‘Ma'a hiho.’ hu'ana hulaveli-neli'ageta tagaya Lomu vea'mogata ani kava'ma hisunana tusiya huno haviya hugahie.” hu'ya humainae. 22 Hage'ya melitalu humainaya vea'mo'ya “Tamage nehae.” hu'ya hage'ya Yasi

vaya'mo'ya mage hae “Kena'ania ali hatata hutal-enetama hegi ka'yoteti hanaeho.” hu'ya hage'ya hanae-mainae. <sup>23</sup> Hegi ka'yoteti tusiya hu'ya anamulo-nalo hu'ya hanaete'ya kina nopi nofi hunatete'ya ani kina nopi kava kanomofe mage hu'ya hapaiye “Ma kanolatatela tokiya'age huka yagaiyo.” hu'ya humainae. <sup>24</sup> Na ke hageno haviteno kava ne'yagaiya kanomo'a anavaleno tole ayenalagi-male nopinaga anateneno anaiya nago yosa amu'nopi vaiteno aitalako hunatene.

<sup>25</sup> Hunatayanagi anakaya ani kege amu'nona yagame nehu'ana Anumayamotega nunamu hu'ana havinega'age'ya kina nopi mainaya vaya'mo'ya havi'ya mainae. <sup>26</sup> Mainageno anile aup'a'a tusi'a imi ne'alino ani kina note ayevasaga hu'ya kimalenaya yosa ali kanage kanagu higeno muki'a fitayagamo'a aiyaki-lavige'ya muki'a kina nopi mainaya vaya'mogami amayakopitila nofi'yagamo'a kaluhelavi-mainae. <sup>27</sup> Aikaluhelavigeno kina vayate kava kanomo'a faeno maineleti hetino mogeteno muki'a fitayagamo'a ago yaki-mainegenome mage huno agesa havimaine “Muki'a kina vaya'mo'ya ago falae.” huno aya'aya naepe ka'yona alisagino agai'a age'ya fakaligahe humaine. <sup>28</sup> Nehigeno Polo'a ala kefiti mage huno humaine “Kagaika'a kaugafa ali haviya ohuo. Tagaya muki'amogata afa'a mainone.” huno humaine. <sup>29</sup> Higeno ani kava kanomo'a vayafe “Ka'nila alitama eho.” huno hunemaleno aiyayeno ani nopinaga hafaleno monaketeno kolia huno atali nehuno Pologani Sailasiganina anavate eno anaiyafi

mesaga hulavi-maine. <sup>30</sup> Hu-laviteno ani nofipiti anavaleno kumatega via'yamo anakaife mage huno hanavige “Musetani nehugi na'a hisugeno Anumaya Koti'a nagu namena aligatigahie?” huno hanavige-maine.

<sup>31</sup> Hige'ana mage hu'ana hapai'e “Anumayati Yisasife havika kagupi maleka kametiti hisanageno Anumaya Koti'a kagu kamena ali-negatino anagakamogamiene ali-gatisigetama agai anaga maigahae.” hu'ana hapai-maina'e.

<sup>32-33</sup> Hute'ana ani kanoene muki'a agai'a anaga'aene Yisasi mono kea huhale'ana hamapai-maina'e. Hamapaita'ageno ani kegeke'ya anavaleno amuna sese hunatete'ya anile aupa'a ani kanoene agai'a anaga'aene tina fale-matena'e. <sup>34</sup> Tina falemateta'ageno anavaleno noma'afinaga umaineno kavela anamiteno tusiya huno agai'aene agai'a anaga'aene Anumaya Kotina amaku'a amite'ya amametiti haya yafe tusi'a muse humainae.

<sup>35</sup> Muse hayanagi kotigeno Yasi kanomo'a ati vaya humatege'ya e'ya mage me hae “Ani kanolatana afa'a anatalege'ana vi'o.” hu'ya humainae. <sup>36</sup> Hageno kina vayate kava kanomo'a ani kea mage huno Polona hapaiye “Yasi vaya'mo'ya nago'a vaya humatage'ya e'ya tanakaife mage hae tanakaya kina nopitila ne'ataletana tanaipamo'a kanale nehinagetana afa'a vi'o.” hu'ya me hanapaiye.

<sup>37</sup> Higeno Polo'a ati vayafe mage huno hamapaiye. “Ta'agaya Lomu kanolata\* maino'agi haviya hula'ate'ya ta'agai kaiyekea

havite'ya fatago hu'ya kaiyekea huota'ate'ya vea amaulagafina hegi ka'yoteti tusiya hu'ya ta'amulonalo hute'ya nofila hula'atenagi menia na'a hige'ya falaki'ya ta'atalegahe nehae? Tamagelafa huta'a kesila o'ugahu'agi amakaya amakai'ami male e'ya 'Kina nopitila ataletana vi'o.' hu'ya hula'atesae." huno humaine.

<sup>38</sup> Hage'ya ati vaya'mo'ya ani kea ali'ya Yasi vaya'mogami mo hamapage'ya "Lomu kanolata maino'e." hu'ana ha'a ke havite'ya tusi'a koli humainae. <sup>39</sup> Koli hute'ya kina nopi u'ya amahau ke mo hunatete'ya "Havi kava hunagetana ha'e." hu'ya kina nopitila anavale ne'anatale'ya mage hae "Musetani nehune mani no kumala ne'ataletana vi'o." hu'ya humainae. <sup>40</sup> Hage'ana kina nopitila atale'ana Litia nopi moga'ana anafu'anakanagamina amakete'ana amaku amamena ali lokiya vaisaya kea hamapaite'ana ani kumala ataletana umaina'e.

## 17

*Tesalonaika vaya'mo'ya Polo'ene Sailasi'ene hanaegahe humainae.*

<sup>1</sup> Polo'ene anaga'amo'yaene Amifipolisi kumala mogase'ya Apolonia kumala mogase'ya Tesalonaika kumate uva'yi humainae. Ani kumatela nagola Yuta vaya'mogami mono nona hane. <sup>2-3</sup> Haneanagino Polo'a muki'a kanafima nehia kava huno tagufa (3) Sapati yupa ani mono nopina haino Anumaya Koti kema kae-malenaya auta'mafitila aepa'a hugafino mage huno hampaiye "Anumaya Koti'ma taugafa aligatigahema



hutenea kanomo'a tusi'a agata aigeno fali-maine. Fali-mainefitila eteno heti-maine. Ani Yisasina Anumaya Koti'a taugafa aligatigahema hutenea kanomofe tamahanepauve.” huno humaine.  
<sup>4</sup> Hige'ya nago'a Yuta vaya'mo'yaene kasago'ya Anumaya Koti agima alisaga nehaya Kaliki vaya'ene amakima hanea a'neyagaene Yisasife havi'ya amakupi male'ya amametiti hute'ya Polo'ene Sailasigani anakave tokae'ya umainae.

<sup>5</sup> Tokae'ya umainaya yateti Yuta vaya'mogami amaipamo'a haviya nehae. Hige'ya kefo kava nehu'ya felu mailite'ya nehaya vayalagi'ya vava atagu nefaya kumapi mainae. Maine'ya vava'yaga amavale'ya melitalu humalet'e'ya ani kumate vava'mogamina amaku amakesa hu'ya ali hetige'ya Yesoni note u'ya noma'a moyenafa hu'ya Pologani Sailasiganina anavale'ya alitalu humainaya vea'mogami amayapi anategahe haimainae. <sup>6</sup> Haite'ya atiyeketayana hige'ya o'anake'ya Yesoni'ene nago'a Yisasi anaga'ene amavayu hu'ya ani kumate kava vayate amavale'ya uva'yi hu'ya mage hu'ya hae “Mani vava'mo'ya muki'a kotega ute ete hu'ya vea'mogamina mono kea ali haviya hume hume menia tagai kumate emainae. <sup>7</sup> Emainageno Yesoni'a noma'afi amavaleno amatege'ya maine'ya ala sauve kanotimo'a, Sisa'ma humainea kea ali haviya nehu'ya mage hae ‘Alu sauve kanoti maine. Ani kanomo agia Yisasi'e.’ hu'ya humainae.” hu'ya humainae. <sup>8-9</sup> Hage'ya melitaluma humainaya vea'mo'yaene ani kumate kava vava'mo'yaene ani kea havite'ya amakesa ku'mo hute'ya “Kina nopima

o'visayafena monea tamitetama ugahae.” hu'ya hage'ya Yesoni'ene nago'a vaya'ene monea hage'ya amamitage'ya amatalage'ya umainae.

*Pologani Sailasigania Pelia kumate u'ana Yisasi mono kea hamapai-maina'e.*

<sup>10</sup> Aupa'a ani kege kano'a Yisasi anaga'mo'ya Pologani Sailasiganina hunatage'ana Pelia kumate va'a'yamogani Yuta vaya'mogami mono nopi mo haifale-maina'e. <sup>11</sup> Pelia mainaya vea'mo'ya Tesalonaika kumate mainaya veala amakase'ya kanale amaku amakesaene vea'ne mainageno Polo'a Yisasi kea hamapaige'ya havite'ya aluya huno nehamaiye. Havi'ya amakupi malete'ya muki'a kanafina “Tamage nehifi havige nehie?” hu'ya Anumaya Koti kema kae-malenaya kefina hapali'ya ati ayemainae. <sup>12</sup> Na'a nehu'ya kasago'ya Yuta vaya'mo'yaene kasago'ya Kaliki a'neyaga amakima hanea a'neyagaene kasago'ya Kaliki vaya'yagaene Yisasifena havi'ya amakupi male'ya amametiti humainae. <sup>13</sup> Amametiti hayanagi Tesalonaika mainaya Yuta vea'mo'ya haviyana “Polo'ma Anumaya Koti kema Pelia kumate vea'ma hamapaiye.” hu'ya haya kea havite'ya anile eva'yi hu'ya alitalu humainaya vea'mogami amaku amakesa meli haviya humainae. <sup>14</sup> Ali haviya hage'ya Yisasi anaga'mo'ya aupa'a Polona hutageno hageli kahaepatega tavige'ana Sailasigani Timotigania anile Pelia maina'e. <sup>15</sup> Maina'age'ya avagi hu'ya umainaya vaya'mo'ya Polona Atenisi avale'ya umainageno Polo'a mage huno hamapaiye “Sailasigani

Timotiganife ‘Tanakaya aupa'a hutana nagaitega e'o.' hutama hanapaiho.” huno hamapaige'ya atale'ya umainae.

*Polo'a Atenisi kumate mono ke huhaleno humane.*

<sup>16</sup> Vageno Polo'a anakava maineno ageana Atenisi kumatela kasago'ya yafateti talo humalenaya afa anumayayaga malenageno mogeteno aipamo'a tusi'a haviya humane.

<sup>17</sup> Aipamo'a haviya higeno Yuta vaya'mogami mono nopi haino Yuta vea'nene Anumaya Koti agi alisaga nehaya Yuta vea omainaya vea'nene Anumaya Koti kea huhaleno amakai'ene huge havige humane. Muki'a kanafina vea'ne atagu nefaya kumapi maineno anifima mainaya vea'mogamina Anumaya Koti mono kea hamanepaino huge havige humainae.

<sup>18</sup> Hamanepaige'ya nago'a Epikuliaene\* Sitoikiene\* ala havi havi'ya alilinaya vaya'amimo'yaene ke o'vai o'vai nehage'ya alitalu humainaya vea'mo'ya havite'ya nago'amo'ya Polofe mage hu'ya hae “Ma kanomo'a na ke huliteno nehie?” hu'ya nehage'ya nago'amo'ya Polo'ma Yisasife'ene fali-mainefiti hetimainea kanale mono kema hamapaiya kehe mage hu'ya humainae “Alu kumate anumayahe nehifi?” hu'ya humainae.

<sup>19</sup> Hute'ya agai ke havigahe Aleopagusi Kanisole vayate avale'ya ute'ya Polofe mage hu'ya havigae “Kagayama haegafa kema hamapaina kea havigahe nehunagi tahapaiyo. <sup>20</sup> Keka'ama havunana alu'a augafa kema hanageta havuna kemo aepa'a havisune huta nehune.” hu'ya

humainae. <sup>21</sup> Muki'a Atenisi mainaya vaya'ene yoka emainaya vaya'ene muki'a kanafina haegafa kema hisaya ke havisaya yafena tusiya huno nehamaiya vayalagi'ya alu kavala ohisaya amakesa nehae. <sup>22</sup> Hageno Polo'a Aleopagusi kanisole vaya'mogami amu'nopi hetino mage huno humaine Atenisi mainaya vaya'mogatama nagaya agoana tamakaya aluya hutama afa anumayamo mono kea tokiya'age hutama nehaya vaya mainae. <sup>23</sup> Mainage'na nagaya vaiyatete nehu'na agoana yafateti talo humalenaya afa anumayamogami amakima alisaga nehaya afa anumayatamimona agete'na nago yafa folamole mogoana ani yafatela mage hutama kae-malenae “O'agenona anumayamogae.” hutama kae-malene'na agoa kanomofe “O'agenona kanomo agima alisaga nehune.” hutama kae-malenaya kanomofe aepa'a hugafi'na tamahapaigahugi haviho. <sup>24</sup> Anumaya Koti'a ma mopaene muki'a mopafima hanea ya'ene talo humalenea kanogino muki'a ikapinaga ya'ene mopafi ya'ene kava yagai-mainea kanogino vea'mo'ya amayateti kimalenaya nopina nomaiyane. <sup>25</sup> Tagaya tayapitila nago yana ha'omaegahune. Agai'a muki'a vea'mogami hamaimu'ene muki'a yama amaminea kanogita hana'a huno nago yama'a omaleneanagita aya hugahune? <sup>26</sup> Anumaya Koti'a nagoke tototimona hagoteno talo humaleteno ani kanofiti muki'a ma mopale mainaya nofi veala ali falote humatene. Humateteno “Ma kote kote maiho.” huno amateteno kasago'ya vaya maisaya kana'amiene

agai'a humatene. <sup>27</sup> Amakaya Anumaya Kotina amaku amigahena ati yege yege hu'ya Anumaya Koti aepa'a havisae huno ani kavala humaineane. Tamage agaya alulega omaigi tagai'ene nagoke nagoke'mogatiene tokaeno maine. <sup>28</sup> Maineanagita agai'age tahaimula tamigeta vaiyatete huta mainone. Ani kehe nago'a tamakai avoma agelinaya vaya'mo'ya mage hu'ya humainae “Tagai'enena agai'a lategeta nafa'neyaga'a mainone.” hu'ya humainayane. <sup>29</sup> Higeta tagaya agai'a latenea nafa'neyaga mainone. Havigu lagaya ma lagesa havisunagi “Anumaya Koti aepa'a tagesafitila yafateti'ene kapaleti'ene kanileta yafateti'ene kanale'ya huta talo humalenaya augafa canoe.” huta ohisune. <sup>30</sup> Nayona Anumaya Koti aepa'a muki'a vea'mo'ya ohavinayanagino Anumaya Koti'a kasago'ya kea ohuneane. Nagi menia muki'a ma mopale veafena tokiya'age ke huno mage hie “Tamaku'a aiyahae hutama nagaitega eho.” huno humaine. <sup>31</sup> Anumaya Koti'a muki'a ma mopale vea'mogamina fatago huno kaiyekema humatesia kanafina ago hapalino ani kaiyekele'ma yagaisia vemona ago ali hetitene. Ani vemofe “Vea'mo'ya havilama hu'ya havisae.” huno fali-mainefitila ali hetitene huno humaine. <sup>32</sup> Hige'ya “Fali-mainefiti ago ali hetitenema.” hia kea havite'ya nago'a vea'mo'ya kigi hu'ya akaya atage'ya nago'a vea'mo'ya mage hae “Nago'ene mani kea hugeta havimano.” hu'ya humainae. <sup>33-34</sup> Nehageno Polo'a ne'amataleno umaineanagi nago'a vea'mo'ya agai akave ne'u'ya Yisasife havi'ya amakupi male'ya amametiti hu-mainae.

Amametiti humainaya veapitila nago kanomo agia Tionisiusi'e Aleopagusi kanisole kano maineane. Nago a'mo agia Tamalisi'ene nago'a vea'nene amametitia humainae.

## 18

*Polo'a Kolini kumate Yisasi mono kea huhaleno humaine.*

<sup>1</sup> Haenaga'a Polo'a Atenisi kumala ataleno Kolini kumate umaine. <sup>2</sup> Anile maineno nago Yuta kanoa age-maine. Ani kanomo agia Akuila'e. Kuma aepa'a Potusi hanegi ani kanafina Palisila'a a'amo'ene Itali kumateti emaina'e. Itali kumate kava kanomo'a Kolotiusi'a mage huno kahegi malene “Muki'a Yuta vea'mogatama Itali vea'mogami ala kuma'amia, Lomua, ne'ataletama viho.” huno humainea kehe Akuila'agi Palisila'agia atale'ana Kolini umaina'ageno Polo'a anakaitega umaine.

<sup>3</sup> Uno monakeana nagoke ali'yake hanegeno kena noma faka'ni'ya mone ne'aliya ali'ya ne'ali'ageno monaketeno anakai'ene tokaeno maineno ani ali'yana ali-mainae. <sup>4</sup> Polo'a muki'a Sapatu yupa Yuta vaya'mogami mono nopi haino tokiya'age kea huno Yuta vaya'ene Kaliki vaya'ene Yisasife amakupi malesayafe hamapai-maine.

<sup>5</sup> Haenaga'a Sailasi'ene Timoti'ene Masetoniati eva'yi neha'ana Polo'a alu ali'ya o'alino muki'a yupa Yuta veafena “Yisasi'e Anumaya Koti'a lamaugafa aligatigahe hutenea kano maine.” huno hamapai-maine. <sup>6</sup> Hamanepaige'ya agai kea hefalaki'ya hu-haviya havaya hutageno

Polo'a "Kefo kava nehae." huno kena'ale hanea kugukege ya'yaga aifopo hune'ataleno mage huno hamapaiye "Tamakaya Anumaya Kotitegati fananema hisayana tamakaitami yanagi nagai yana omalene. Menia nagaya tamatale'na Isaleli vea'ne omainaya veapi mo hamapaigahue." huno humaine. <sup>7</sup> Huteno amataleno nago kanoa Anumaya Koti agi alisaga nehia kanomo nopi uno maine. Ani kanomo agia Titiusi Yasatusi'e. Ani kanomo nona Yuta vava mono nomo avate hane. <sup>8</sup> Ani mono note soka kanomo'a Kalisipusi'ene muki'a agai'a anaga'aene Anumayamofe havi'ya amakupi malage'ya kasago'ya Kolini mainaya vea'mogamina Polo'a hamapaige'ya Yisasife havi'ya amakupi male'ya amametiti hutageno tina fale-matene.

<sup>9-10</sup> Nago kegela Anumayamo'a himonafi eva'yi huno Polofena mage huno hapaimaine "Kolia ohuka tokiya'age huka kea hamanepaika o'atalo. Nagaya kagai'ene mainoe. Maigahuanagino nago kanomo'a hetino ali haviya huokatega-hayanagi'ya nagai'ni veala kasago'ya mani kumatela mainae." huno humaine. <sup>11</sup> Higeno Polo'a ani kumatela nago kafugi sikisi'a (6) ikanagi huno ani vayapi maineno Anumaya Koti kea hamapai-maine.

<sup>12-13</sup> Hamapaiyanagi Kalio'a "Kaliki kumate kava yagaiyo." hu'ya Lomu kava vava'mo'ya hutageno kava yagaino mainea kanafina Yuta vava'mo'ya alitalu hu'ya Polona atafa hu'ya Yasi kanomote avale'ya mage hu'ya mo hae "Ma kanomo'a tagaila Lomu vava'mogami kahegi kea atagaeno veafe mage huno nehie 'Ma'a

hutama Anumaya Koti agia alisaga hiho.' huno humave-nelie." hu'ya hae. <sup>14-15</sup> Hageno Polo'a kenona'amia hamapaigahe hianagi Kalio'a mage huno hamapaiye "Yuta vaya'mogatama ani kanomo'a tusi'a kefo kava hile'asina kanale hu'na namena mailava hu'na maine'na havule'asinagi tamakaya havige havage nehatagetama agilefe nehagi tamakaitami kahegi kehe nahavinegayanagi ani kea ohavigahue tamakaitami fako hiho. Nagaya na'a augafa kema haviyafena nonahaiye" huno humaine. <sup>16</sup> Ani kea huteno kaiyeke havi nopitila hemanati-talene. <sup>17</sup> Hemanati-talege'ya Yuta vaya'mogami mono note soka kanomona Sosenesina atafa hu'ya kaiyeke havi kuma'mo avate aiko-neliyana Kalio'a "Aote'yama'ae." nehuno o'agene.

*Polo'a eteno Silia kotega hanea kumala Atioku umaine.*

<sup>18</sup> Na'ama nehayana Polo'a muki'a kanafima nemaiya afu'aganagamina amataleno Palisila'ene Akuila'ene anavaleno tipi kalefi haisaga humai'ya Senikalia ute'ya Silia ene'u'ya Polo'a Anumaya Koti aufima hulokiya vaino kema humainea yafe aiyolagefa laga humaine. <sup>19-21</sup> Huteno Efesusi uva'yi hute'ya Polo'a Yuta vaya'mogami mono nopi hai-faleno Yuta vaya'ene huge havige nehige'ya mage hae "Mani kumatela aya'aya kana maisane." hu'ya hayanagi "A'ao." nehuno amataleno ugahe mage huno hie "Anumaya Koti'a haisige'nahena haenaga'a ete'na tamakaitega egahue." huno humateteno Palisila'ene Akuila'ene ne'anataleno Efesusiti tipi kalefi asaga humaino elavi-maine.



<sup>22</sup> Sisalia elavi-va'yi huteno Yelusalemu haino Yisasi vea'ne moli falu fala hune'amateno Atioku lavi-mainene.

<sup>23</sup> Anile aya'aya kana maiteno ne'amataleno Yisasi vea'ne ali lokiya vaimatetele huno alu kumate kumate vaiyatete huno muki'a Kalesia kumate'ene Faligia kumate'ene ute ete humaine.

*Apolosi'a Efesusi kumate mono ke huhaleno humaine.*

<sup>24</sup> Nagola Yuta kanomo agia Apolosi'e kuma aepa'a Alekasatalia kanogino Efesusi uva'yi humaine. Ani kanoa kanale'ya huno kea nehavia kanogino maineno Anumaya Koti auta'mafi hanea kea havilama huno havilinea kanoe. <sup>25</sup> Apolosi'a Anumayamo kea havilama hulineno aya mukiki huno kanale kava'age nehuno Yisasifena hamapaiyanagi Yoni'a tima falematenea yafeke havilinegi Yisasi agile ti falemate kavafena ohavine. <sup>26</sup> Yuta vava'mogami mono nopi haino tokiya'age kea hamapaige'ana Palisila'ene Akuila'ene havite'ana avale'ana va'a'yamogani Anumaya Koti au'ava yafena moli fatago hu'ana aveli-maina'e. <sup>27</sup> Aveli'ageno Apolosi'a Akaiya ugahe Yisasi anaga'amo'ya aya hu'ya Akaiya maine'ya Yisasi kema nehaviya veate avona kae'ya mage hae “Apolosina avaletama falu fala huteho.” hu'ya kae-malageno anile alino uva'yi hige'ya Anumaya Koti kayone yama'aleti Yisasife havi'ya amakupi male'ya amametiti humainaya vea'mogamina amaya humaine. <sup>28</sup> Muki'a vea amaufina tokiya'age kea huno Yuta vea'mo'ya havilama ohunayafene huno Anumaya Koti auta'mafiti kea hapalino

hamapaino “Yisasi'a Anumaya Koti'ma taugafa aligatigahe hutenea kano maine.” huno avopitila hapalino hamapaimaine.

## 19

*Polo'a Efesusi maineno Yoni kema nehaviya vea'mogamina Yisasi kea hamapai-maine.*

<sup>1</sup> Apolosi'a Kolini mainegeni Polo'a ago'yalega hanea kuma'yagale vaiyatete huno Efesusi uva'yi huno nago'a Yisasina amaku'a amitafa humainaya vea'nea amake-maine. <sup>2</sup> Amaketeno mage huno hamavike “Yisasife havitama tamakupi maletama tamametiti nehaya kanafina Alu Aotage Avamula ali-mainafi o'alinae?” huno hamavigege'ya “A'ao, ‘Alu Aotage Avamula maine.’ hu'ya haya kea ohavinone.” hu'ya hae. <sup>3</sup> Hageno Polo'a mage huno hamavige “Hana'a li falelamatenae?” huno hamavigege'ya mage hae “Yoni ti falelatenae.” hu'ya humainae. <sup>4</sup> Hageno Polo'a mage huno hie “Yoni'a mage nehuno tina falematene ‘Kefo yatamihena tamaku'a aiyahae hisage'na tina fale-lamategahue.’ huno nehuno veala mage huno hamapai-maine ‘Nagai nakavelaga esia kanomofe, havitama tamakupi maletama tametiti hiho.’ huno humaineana Yisasife huno humaineane.” <sup>5</sup> Huno hige'ya ani kea haviyanagino Efesusi vea'mogamina Anumayatimo'a Yisasi agile tina falematene. <sup>6</sup> Fale-mateteno Polo'a ayana amanute malegeno Alu Aotage Avamula amakaite elavino ege'ya amaku amakesafiti nohaviya kea, alu amake alu amake ai'ya Anumayamo avayafiti hamapaiya

kea hufalote humainae. <sup>7</sup> Ani vayala tuelufu'a (12) vaya mainae.

<sup>8</sup> Polo'a tagufa (3) ikana Yuta vea'mogami mono nopi ute ete huno tokiya'age kea huno Anumaya Koti kava yagaisia yafe amaku'a ali hetino hamapai-mainae. <sup>9</sup> Hamanepaiyanagi nago'a vaya'mo'ya amaku amakesa ailinele'ya tokiya'age ke hu'ya “Havige nehananagita tagupina ali omalegahune.” hu'ya muki'a vea amaufi Yisasi kea hu-haviya hutageno Polo'a ne'amataleno Yisasife havi'ya amakupi malenaya veala amavaleno muki'a kanafina efi efi huno Tilanusi humavenelia nopi mo huhaleno hamapai-mainae. <sup>10</sup> Tole kafu ani'a huno hamanepaige'ya muki'a Esia mainaya vea'nea Yuta vea'nene Kaliki vea'nene Anumayamo kea havimainae.

*Sekeva ne nafa'neyagamo'ya kefo avamu anati-talegahe humainae.*

<sup>11</sup> Anumaya Koti'a Polo ayapi tokiya avame yana humaine. <sup>12</sup> Nehige'ya vea'mo'ya akasipiene kenaene Polo augafale akasasete'ya kali vayate ali'ya vageno kali'amimo'a kanale humategeno amakusafiti Kefo Avamu'yaga hati-lavi'ya umainae. <sup>13</sup> Nago'a Yuta vaya'mo'ya Kefo Avamula vea'mogami amakusafinagati amanati ne'atalaya vaya'mo'ya Kefo Avamula amakusafima mainea veate Yisasi agi ne'aye'ya mage hu'ya humainae “Polo'ma tahanepaiya kanoa, Yisasi, agile Kefo Avamu'moga amakusafinagatila hati-lavika evuo hu'na kahanepauve.” hu'ya humainae. <sup>14</sup> Ani kava'ma

nehaya vayala seveni'a (7) ne nafa'neyaga ala mono nopi kava yagai-mainea kanomo nafa'neyaga Sikeva nafa'neyagamo'ya ani kavala humainae. <sup>15</sup> Nago yupa ani kava nehageno Kefo Avamu'mo'a mage huno kenona'amia humaine “Yisasina ago agete'na Polona age-mainogi tamakaya tagatamae?” huno humaine. <sup>16</sup> Higeno Kefo Avamu'ma agusafinaga mainea kanomo'a ani seveni'a (7) vaya'mogamite haiteno asaga hunelavino amakaseno nehamaeno amaugafa tusiya huno alihaviya humateteno kena'amienne ali hatata hutalege'ya amaugafa alapa'age ani nopitila hati-lavi'ya falemainae. <sup>17</sup> Mani kea Efesusi mainaya veala Yuta vea'nene Kaliki vea'nene havite'ya koli nehu'ya Anumayatimona Yisasi agia tusiya hu'ya alisaga humainae. <sup>18</sup> Hage'ya kasago'yamo'ya Yisasifena havi'ya amakupi male'ya amametiti nehu'ya kefo kava'ma haya kavafena hufalote humainae. <sup>19</sup> Hufalote hute'ya sesefe ya'amienne tusa hune'amataya ya'amienne analisa ya'amienne ani ya'yagahema kae-malenaya avo'yaga muki'a vea amaufi atafi kaesagali-talenae. Kae-mainaya avoma miya humainaya monema hapaliyana fifti tauseni'a (50,000) kina hapali-mainae. <sup>20</sup> Anima tokiya'age kava'ma humainea kavafena muki'a kotega mo hamanepai'ya Anumayamofena havi'ya amakupi malageno tokiya'age humaine.

*Efesusi vea'mo'ya Polona haesaya ke humainae.*

<sup>21</sup> Ani ya'yagamo'a ha'no hutegeno Alu Aotage Avamu'mo'a Polona visia agu agesa amigeno mage huno hie “Masetonia umaige'na Akaiya ete'na Yelusalemu uva'yi hisua'amo'na Lomu visua nagesa nehavue.” huno humaine. <sup>22</sup> Huteno tole ha'nemaya'a kanolatana Timoti'ene Elatasusi'ene hunatege'ana Masetonia va'ageno Polo'a agai'age anile nago'ene Esia kotega maine.

<sup>23</sup> Ani kanafina Yisasi kea nohaviya vea'mo'ya Yisasi akave nemalaya kekena tusiya hu'ya hetiya ke vai'ya amako'ya ke humainae.

<sup>24</sup> Ani kotega vaya'mo'ya yafateti nago akefa amayateti talo hu'ya “Anumayati maine.” hute'ya agia Atemisi'e hu'ya nehae. Hu'ya hageno nago kanomo agia Temitiliusi'e efe mone atafi kaeteno ani moneleti ani akefamo agima alisaga nehaya nona, osi osi nona talo hige'ya vea'mo'ya miya hage'ya taloma nehaya vaya'mo'ya tusi'a mone ne'aliyane.

<sup>25</sup> Ne'aliyanagino Temitiliusi'a muki'a agai'a ali'ya vaya'ene muki'a osi osi Atemisina noma'a taloma nehaya vaya'ene ke hige'ya melitalu hageno mage huno hama-paiye “Vemogatama tamakaya havimainae ani ali'yateti kanale monetia ne'alune. <sup>26</sup> Ne'alunanagi ani kanoa, Polo'e, muki'a Efesusi nemaiya vea'nene muki'a

Esia kotega nemaiya vea'nenefe ‘Amayateti taloma haya anumaya afa yatafa hanegi Anumaya omainae.’ huno hige'ya muki'a vea'mo'ya ‘Tamage nehane.’ hu'ya akave malaya kea ago havitama age-mainae. <sup>27</sup> Polo'ma hia kemo'a tagai ali'yatimo agia alino haviya havaya hutege'ya Esia nemaiya vea'nene alu mopalega

vea'nene agima alisaga nehaya Atemisina atalesageno lavisige'ya vea'mo'ya 'Anumayati maine.' hu'ya agia alisaga ohisageno Atemisi agima alisaga nehaya nofena 'Afa yatafa hane.' hu'ya hugahae.” huno humaine.

<sup>28</sup> Hige'ya alitalu humainaya vea'mo'ya ani kea havigeno amaipamo'a tusiya huno ata lege'ya mage hu'ya hae “Atemisi'a Efesusi mainona vaya'mogatina tusi'a ala anumayati maine.” hu'ya humainae. <sup>29</sup> Hage'ya muki'a ani kumate vea'mo'ya ala kenake nehu'ya Polo'enema vaiyatete neha'a kanolatana tolea Masetoniati kanolatane Kaiyusi'ene Alisatakusi'ene anavayu hu'ya alitaluma nehaya kumapi anavale'ya amaiyaye'ya umainae. <sup>30</sup> Vageno Polo'a “Amu'no'amifi kaiyeke mo hisue.” huno hianagi afu'agana'ya “O'ugane.” hu'ya atafa humainae. <sup>31</sup> Atafa hage'ya nago'a Polona kanapa'amo'ya ani Esia kumate Lomu kava vaya'mo'ya ani'a hu'ya agaitega kea atalageno ege'ya mage hu'ya tokiya'age kea hae “Kagaya vea'ma alitalu haya kumapina o'vuo.” hu'ya humainae. <sup>32</sup> Hage'ya alitalu humainaya vea'mo'ya amaku amakesamo'a yagalege'ya nago'a vea'mo'ya nago kea hage'ya nago'a vea'mo'ya alu kea hage'ya tusiya hu'ya ala kenakea hage'ya kasago'ya vea'nema alitalu humainaya yamona aepa'a ohavinae. <sup>33</sup> Ohavige'ya nago'a Yuta vea'mo'ya “Mage huka huo.” hu'ya Alekasatana ayetufageno amu'no'amifi mo hetino ani kemo aepa'a hamapaigahe “Afa'a maiho.” huno ayana aligosi-gosi humaine. <sup>34</sup> Aligosi-gosi hianagi Yuta

kanoma mainea yafe agelama hute'ya nagoke amavayage ailalupe'ya mage hae “Atemisi'a Efesusi mainona vaya'mogatina tusi'a ala anumayati maine.” hu'yama mai'ya hayana tole yagemo kanafi ani ke'age'yana mai'ya humainae.

<sup>35</sup> Nehageno haenaga'a ani kumate avo kae ali'yate kanomo'a alitalu humainaya vaya'mogamina ali haka'yufeno mage hie “Efesusi vaya'mogatama Atemisina anumayatimo agima alisaga nehaya nona Efesusi kumate'ma kanale'ya huno kava ne'yagaiya yafena hana vea'mo'ya ohavinae? Ikapinagati elavi-mainea yafana nagaluma humalenaya yafafena kanale'ya huta kava yagai-mainonagi hana vea'mo'ya ohavinae? Muki'amo'ya ago havimainae. <sup>36</sup> Havimainayanagi'ya mani kea hefala okigahagi tamakaya afa'a maiho. Nagola aifo'nafo kavala ohiho. <sup>37</sup> Anavaletama aya kanolatamogania Atemisi agima alisaga nehuna nopitila nagaluma humalenona yana musufa yana ohuna'e. Tagaiti anumayatimona Atemisife huhaviyana hu-o'atena'e. <sup>38</sup> Ala kaiyeke havisia kanomo'a nago'a kanafi kaiyeke havi nopi maineno kaiyekea havigahigi Timitiliasi'ene agai'ene ali'ya ne'aliya vaya'mo'ya ‘Kema hane.’ hinu'yahena ani kanomote visae. <sup>39</sup> Ugahagi alu yafema hinutamahena kamani vaya'mo'yama alitalu hisagetamahena ani kea fatago hiho. <sup>40</sup> Ma yagefima hu-mainona yafena kamani vaya'mo'ya ‘Tu nehae.’ hu'ya tahavigesagetahena hana kanomo hetino anima keha keha nehaya yamona aepa'a

hamapaigahie?” huno humaine. <sup>41</sup> Avo kae ali'yate kanomo'a mani kea huteno “Notamilega ataletama viho.” huno hemanatige'ya umainae.

## 20

### *Polo'a Masetonia'ene Kalikiene umaine.*

<sup>1</sup> Kema ayeso haya kemo'a ha'no hutegeno Polo'a Yisasina amaku'a amitafa humainaya veafe ke hige'ya agaite ageno tokiya'age hu'ya maisaya amaku amakesa alino hapaiteno hu falu fala humateteno amataleno Masetonia haigahe haimaine. <sup>2</sup> Ani kotega vai ne'ayeno muki'a kanafina tokiya'age hu'ya maisaya kea hama-paiteno Kaliki kotega elavi-mainae. <sup>3</sup> Elavino tagufa (3) ika emaiteno Silia eugahe “Tipi kale alisue.” huno hiana Yuta vaya'mo'ya agaila hae-saya kema haya kea hageno haviteno agesa aiya-hae huno tipi kalea ne'ataleno “Ete'na mopafi Masetonia kotega agase'na haigahue.” huno humaine. <sup>4</sup> Agai'enema tokae'ya haiya vay-ala Pilusi nafa'nemo agia Sopata'e Pelia kumate kanoene Tesalonaikati Alisatakusi'agi Seku-tasigani Tepi kumateti kanoa Kaiyusi'ene Tim-oti'ene Esia kanolatana Tikikusigani Talofimusi-ganie na'a vaya'yaga Polo'ene hai-mainae. <sup>5</sup> Ani vaya'yaga euhagote'ya Taloasi kumate tagava maigahe eumainae. <sup>6</sup> Eu'ya mainageta tagaya Filipai maineta hale oki kaihame nenaya imu ki'ya naya kanamo'a ha'no hutegeta tipi kalefi haisaga humaita faefu'a (5) tau faeta tina lakaeta amakaitega Taloasi euva'yi huta seveni'a (7) yupa ani kumatela mainone.



*Yutikusi'a asaga hulavino haegeni Polo'a ali hetitene.*

<sup>7</sup> Sota yupa Anumayamo agile kave negahe alitalu humainonageno Polo'a egama visia yafe huhaleno mono kea tahapaino hume hume ne'vigeno kege amu'nokefa maino humaine. <sup>8</sup> Maino'ma hiana anafi kikalo humalenaya nopi maunanagino kasago'ya ka'ni'yaga ayevasa humalageta mainone. <sup>9</sup> Mainonageno nago neyana Yutikusi'e akalogate mopale mainegeni Polo'a mono kea aya'ayate maino hume hume vigeno Yutikusina aukalo kalo higeno aula faeno fae latapalino fae-mainefiti anale tagufa (3) ayekalo hu'ya kimalenaya nopitilagino ani akalogapiti asaga hulavino mopafi tavino haegeni falige'ya molisaga hu'ya agayana ago fali-maine. <sup>10</sup> Fali-maigeni Polo'enena lavino mo anu-kilineni mage hie “Atali talua ohiho. Ago fali-maineanagi eteni haimula ne'alie.” huno humaine. <sup>11</sup> Huteno ani nopinaga eteni haino maineni kaihame maya kolino hige'ya nenageni ani kavela neteni aya'aya mono ke amakai'ene huge huge nehigeni kola ali halegeni ne'amataleni umaine. <sup>12</sup> Vigeni ani neyana eteni haegafa huno maige'ya avale'ya notega ne'u'ya tusi'a muse nehu'ya amaipamo'a kanale humaine.

*Polo'a Taloasia ne'ataleni Miletusi umaine.*

<sup>13</sup> Tagaya uhagoteta tipi kale alitonageni Polo'a “Mopafi Asosi utesugetama anileti tipi kalefina navalegahae.” huno higeta tipi kalefi Asosi mogava mainone. <sup>14</sup> Asosi agava maineta Polona

avaleta tipi kalefi asaga humaita Mitilini kumate umainone. <sup>15</sup> Uteta anileti tipi kalefi mo faeteta Kiosi kumate uva'yi huta ani lipi kalefi faeteta Samosi mo faeteta Miletusi eva'yi humainone. <sup>16</sup> Polo'a “Afulea kanahe muse hisaya imu kisaya kana Yelusalemu eva'yi hisuafene.” huno aya'aya kana Esia kotega omaisia agesa haviteno “Efesusia ago agase'na ugahue.” huno humaine.

*Polo'a Efesusi soka vayafe maiho huno hu falu fala humateteno agola amataleno umaine.*

<sup>17-18</sup> Polo'a Miletusiti vava humateno “Efesusi utama soka vayafe nagaitega esaya ke hamapaiho.” huno hige'ya u'ya mo hamapaige'ya agaitega ageno mage huno hamapaiye tamakaya ago agemainae nagaya hagote'na Esia kotega eva'yima humainoa kanafina aepa he'na humainoa kavala ago agemainae. <sup>19</sup> Naugafa ali'na ohainogi Anumayamo ali'ya ne'aluge'ya Yuta vava'mo'ya muki'a kanafina hu-haviya hunatage'na tusi'a avite-mainoe. <sup>20</sup> Avia atoanagi atalia ohu'na muki'a lamaku tamamema ali lokiya vaisaya kea atalutamifi'ene notamifi notamifi'ene Anumaya Koti kea huhale'na tamahapai-mainoe. <sup>21</sup> Tamahapai'na Yuta vea'nene Kaliki vava'nene “Kefo yatamihe tamaku'a aiyahae hutama Anumayatimona Yisasife havitama lamakupi maletama tametiti hiho.” hu'na huhale'na tamaha-pai-mainoe. <sup>22</sup> Tamahapai-mainogi menia agegeho Alu Aotage Avamu'mo'a “Yelusalemu haiyo.” huno nahapaiyanagi'na

anilega visuge'yama vaya'mo'ya hunatesaya kavala nagaya ohavinoe. <sup>23</sup> Ohavinogi muki'ama umainoa kumatela Alu Aotage Avamu'mo'a mage huno nahapai-maine “Tusi'a kana'age yama hugatesaya yana falote hugateno nofipina kategahae.” huno nahapai-maine. <sup>24</sup> Nahapai-maineanagi nagaya falisufi afa'a maisufi afa yatafa hane hu'na nagesa nehavugi Anumayatimo'a Yisasi naminea ali'yama, veafe Anumaya Koti'a tusi'a kayone hulatenea kanale mono kea huhale'na hamapaisua ali'yana ali ha'no hisua nagesa nehavue.

<sup>25</sup> Tamakai amu'nopina vaiyatete hu'na Anumaya Koti kava yagai-lamatesia kea tamahanepauvanagi'na menia lamahanepaugi haviho nagaya havimainoe haenaga'a nagaila naukipalela nago'ene onagegahae. <sup>26-27</sup> Ani yafe menia tamagelafa hu'na tamahanepauve nagaya kolia ohu'na muki'a Anumaya Koti agu agesafima hanea kea ago tamahapai-mainoafe nago kanomoga Anumaya Kotitegati fananema hisanana tamakaitami yane. Ani kemo'a nagaipina omegahie. <sup>28</sup> Omegahigi tamakaya tamaugafa ka'yetama maiho. Alu Aotage Avamu'mo'a “Kava yagai-mateho.” huno lamaminea vayala, Anumayamo'a agai'a kolama'aleti miya humalenea sipi sipilelela kava yagaiho. <sup>29</sup> Nagaya nehavue tamatale'nama visuana nago'a vayala, kave'age afela kalamo nehia kava hu'ya tamakai amu'nopi esaya'amo'ya Yisasife havi'ya amakupi malenaya sipi sipiyaga ali haviya hugahae.

<sup>30</sup> Ali haviya hugahagi tamakai amu'nopitila nago'a vaya'mo'ya heti'ya havigea mohu haviya mehu haviya nehu'ya Yisasife havi'ya amakupi malenaya veala “Tagai takave eho.” hu'ya amavayu hugahae. <sup>31</sup> Ani kava'ma hisaya yafena ka'yeho. Nagaya tagufa (3) kafufina felugaene kege'ene kasalo'nahae hu'na maifalua ohunoe. Avia ne'ate'na muki'amogatamina tamaku tamakesa nagoke nagokemogatamina tamaumonola malogetama havimainagi ani yafe tamakesa ali hao hutama haviho.

<sup>32</sup> Menia Anumaya Koti ayapi tamatogeno agai'a kayone hulamatesia ke'amo'a tamakaila alino tokiya'age hulamateteno muki'a agai'a alu aotage vea'ne'amogamima ne'amatea kanale yana tamamigahie. <sup>33</sup> Nagaya nago'a vaya'mogatama mone afenotamile'ene kukenatamile'ene age'na naha'yea nohuane. <sup>34</sup> Tamakaitamia agayana nayapiti ali'yana ali'na nesua ya'ene nagai'enema lokae'ya nemaiya vaya'mo'ya nesaya ya'ene ali falote hugetama age-mainae. <sup>35</sup> Na'a nehu'na muki'a yana tamaveli'na mage hu'na humainoe “Ali'ya alitetama kalima ne'aliya vayala amaya hiho.” Anumayatimo'a Yisasi humainea kea mage humaine “Vea'mo'ya nago yama alisayana muse hugahagi afu'aganana nago yana amisiana tusiya huno musena hugahie. Amineya yamo muse yamo'a ali-mainea muse yana agase-mainae.” huno humainea kea tamakesa havi havi hutama maiho huno humaine.

<sup>36</sup> Mani kea huteno soka vaya'ene Polo'a ale'ya ayeno Anumayamotega ke huno havige-mainae.

37-38 Havigetege'ya muki'a soka vaya'mo'ya tusi'a avi ne'ate'ya Polona anuki'ya atako ataka nehu'ya haenaga'ama agai aukipale'ma nago'ene o'agesaya yafe hamaumana halege'ya avia atete'ya tipi kale hanelega avale'ya umainae.

## 21

*Polo'a tipi kalefi via'amo Yelusalemu ugahe humaine.*

<sup>1</sup> Amataleta tipi kalefi una'amogata Kosi kumate mo faeteta lina takaeta Lotesi uva'yi huta mo faeteta lina lakaeta Patala uva'yi humainone. <sup>2</sup> Uva'yi huta nagola hagelipi kalea agonana Fonisia kotega ugahe nehigeta ani lipi kalefi haisaga humaita umainone. <sup>3</sup> Ne'uta Saipalusi mogonana haoga laya kaiyaga hanegeta ne'ataleta Silia uta tipi kalemola afeno'yaga atalegahe higeta Taiya limo agegayalega lavi-mainone. <sup>4</sup> Anile tatalegeta Yisasife havi'ya amakupi malenaya anagafe momatiyeta ali falote huteta amakai'ene seveni'a (7) kana mainonageno Alu Aotage Avamu'mo'a hamapaige'ya havite'ya Polofena “Yelusalemua o'vuo.” hu'ya hapai-mainae. <sup>5</sup> Hapaitageta amakai'enema mauna kanamo'a ha'noma nehiana katega ugahe nehunage'ya muki'amo'ya a'ne'amiene nafa'ne'amiene tavale'ya kumala atale'ya vageta ti agegayalega hanea kahaepate mo latalegahe hageta tale'ya moyeta nunamu humainone. <sup>6</sup> Nunamuna huteta hufalu fala humateta “Maiho.” humateteta tipi kalefi haisaga humaunage'ya ete'ya no'amilega emainae.

*Sisalia kumategati nagola aune kanoa Agapusi'a Polona ke hapai-maina*

<sup>7</sup> Taili kumala ataleta Tolemesi uva'yi huta Yisasife havi'ya amakupi malenaya anagala hu falu fala hune'amateta amakai'enena nagoke kana kano'a mainone. <sup>8</sup> Maita faeteta amataleta Sisalia uva'yi huta Filipi nopi umainone. Ani Filipi'e kanomo'a Yisasi ke hamanepaiya kanogino Yelusalemu kave amamite amamite hisaya yafe hapali'ya humatenaya seveni'a (7) vayapiti kanogita ani kanoene umainone. <sup>9</sup> Umainonageno ani kanomo'a fo'a (4) vele omainaya muna'ne'a mainayanagino Anumaya Koti'a avayafiti hamapaiya kea hu'ya amaune laga nehaya muna'neyaga mainae. <sup>10</sup> Mainageta lagaya anile tole lagufa kana mainonageno nagola Anumaya Koti aune kanoa Agapusi'e nehaya kanoa Yutiati elavi-va'yi humaine. <sup>11</sup> Takaite eva'yi huno Polo amu'nofila melino agai'a aiya ayate kisalu negino mage huno hie “Alu Aotage Avamu'mo'a mage huno nahapaiye Yelusalemu mainaya Yuta vaya'mo'ya ma kava hu'ya mani amu'nofi'mona nefana aiya ayate kisalu kite'ya vaya'mo'ya haesageno falisiafe Yuta vea'ne omainaya vaya'mogami amayapi ategahae.’ huno hike'na havite'na mani kavala me nehue.” huno humaine. <sup>12</sup> Higeta anima hia kea haviteta tagai'ene ani kumate vea'nene mage huta hapaune “Pologa museka nehunagi Yelusalemua ohaiyo.” huta hutene. <sup>13</sup> Nehunana Polo'a mage huno humaine “Na'a higetama avia ne'atetama nagu nagesa ali haviya nehae? Nagaya Anumayanima Yisasi nagu'a

amitafa humainoafe nagaya nagesa talo tala hu'na Yelusalemu haisuge'ya natafa hu'ya nofipi natete'ya nahaesage'nama falisuana kanalele hu'na nehue.” huno humaine. <sup>14</sup> Higeta haviteta kenona'a ha'opaita mage huta humainone “Anumayatimo'a havimaineaganino haisia kavala hisie.” huta humainone.

<sup>15</sup> Ani kea huteta lagaya ali lalo tala nehuta Yelusalemu haimainone. <sup>16</sup> Haunana nago'a Sisalia lafu-tagana'ya tagai'ene haigeta Yelusalemua hai va'yi hunage'ya nagola Saipalusi kanomo agia Nasoni'e agai notega tavale'ya vageta umainone. Nasoni'a nayona Yisasi anagapi maineane.

*Polo'a Yelusalemu hai va'yi humaine.*

<sup>17</sup> Yelusalemua hai va'yi hunage'ya tafu-tagana'ya tusi muse hu'ya ali falu fala hulate'ya lavale-mainae. <sup>18</sup> Lavale'ya vageta mo faeteta Polo'a tagai'ene Yemesi agegahe ne'unage'ya muki'a soka vaya'yaga anile emainae. <sup>19</sup> Ageno Polo'a “Mainafio.” huno hu falu fala hune'amateno Anumaya Koti'ma aya higeno Yuta vea omainaya vea'mogami amu'nopi ali-mainea ali'yafe hamapailama huno hamapaiye.

*Kava vaya'mo'ya Polofe “Ala mono nopi vuo.” hu'ya hapai-mainae.*

<sup>20</sup> Polo'ma hia kea havite'ya Anumaya Koti agia alisaga hu'ya Polofe mage hu'ya hae “Kasago'ya tauseni'a vea'mo'ya Yisasife havi'ya amakupi male'ya amametiti nehaya Yuta veapiti Yelusalemu mainaya vea'mo'ya

Mosese kahegi kema akave malesaya amaku amakesa humainae. <sup>21</sup> Nehu'ya kagayama muki'a Yuta vea omainaya veapi mainaya Yuta vaya'mogamife 'Mosese kahegi kea ne'ataletama nafa'netamimogami amakoya ano'ya laga ohutama nayoma Yuta vaya'mo'ya mainaya au'ava yana atale ho.' huka humainana kehena hamapaige'ya ago havimainae. <sup>22</sup> Havimainagi kagayama eva'yi humainana kema havinu'ya hisageta na kava hugahune? <sup>23</sup> Nago yafe kahapaigahe hunagi kahapaisuna kavala akave huo. Fo'a (4) vayala Anumaya Koti aulagafina hulokiya vai'ya kea humalenaya vayala manile mainae. <sup>24</sup> Mainayanagika muki'a vaya'mo'ya kagaifema ago'ma havimainaya kehema 'Havige nehae.' hu'ya hisayafena kagaife 'Anumaya Koti kahegi kemo akave nemale.' hu'ya hugasayafena ani fo'a (4) vayala amavaleka amakai'enena Anumaya Koti aulagafina oni'ya'age yama omaleisia kavala huka kagaika'a monea miya hisanage'ya amayolagefa laga humatesae. <sup>25</sup> Yuta vea omainaya vea'ma Yisasife havi'ya amakupi male'ya amametiti nehaya vea'mogamife tagaya nayona avona kaeta huhu'ya gi-malenona kea mage huta humainone 'Fali-mainaya veafe amakisana vai'ya atupa kave alisaga hu'ya malesaya kavala oneho. Kolamo'a agusafinaga hanesia afuene kola'enena oneho. A'ne muna'ne amavayu nehisaya yana ataleho.' huta ago avona kaeta hamapai-mainone." hu'ya humainae. <sup>26</sup> Hageno Polo'a faeteno ani fo'a (4) vayala amavalete'ya amaugafaene amaku'aene



sese nehaya kava hute'ya ala mono nopi haigeno Polo'a mono nopi mainaya kava vayafe mage huno humaine “Laugafaene tagu'aene Anumaya Koti aulagafina oni'ya'age otahaisia kava huta sese huteta maineta ma yupa eta tahaote tahaote Anumaya Kotina sipi sipia heta amigahune.” huno humaine.

*Yuta vaya'mo'ya Polona mono nopi atafa humainae.*

<sup>27</sup> Ani seveni'a (7) kanamo'a ha'no hugahe nehige'ya nago'a Esiati Yuta vayala elaviya'amo'ya Polo'a ala mono nopi mainege'ya megete'ya muki'a alitalu humainaya vea'mogami amaipa ali haviya hu'ya ali hetimatete'ya Polona atafa humainae. <sup>28</sup> Atafa hute'ya mage hae “Isaleli vaya'mogata laya hiho. Ma kanomo'a muki'a kumate vaya'mogamina mage huno humave-nelie ‘Isaleli vaya'ene Mosese kahegi kene mono no'amienne afa ya'yaga hane.’ huno nehuno nago'a Yuta vea omainaya vayala Kaliki kotegati vayala ma ma nagalu humalenea nopina amavaleno ege'ya mani nona ali haviya nehageno oni'ya'age nehie.” hu'ya humainae. <sup>29</sup> Na'afene nago yupa Polo'a Talofimusi'ene ala kumapi vaiyateti neha'age'ya age-mainayanagi'ya Talofimusi'a Efesusiti kano maineanagi'ya amakesafinaga havige nehu'ya “Polo'a ani Yuta vea omainea kanoa tagaila ala mono notifi avaleno haimaine.” hu'ya havige humainae. <sup>30</sup> Hage'ya muki'a ani kumate vea'mo'ya ani kema haviya kemo'a amaipa ali hetige'ya amaiyaye'ya molitalu hute'ya Polona atafa hu'ya mono nopinagatila avayu

vaye nehage'ya ani mono nomo fitayaga muki'a ali'ya kimainae.

*Lomu ati vaya'mo'ya Polona Yuta vaya'mogami amayapiti movale'ya emainae.*

<sup>31</sup> Polona ago mai'ya nehayageno Lomu ati vayate kava kanomo'a muki'a Yelusalemu vea'moya ke vai'ya tusi'a lu mai'ya nehae hu'ya haya kea havimaine. <sup>32</sup> Haviteno ati kava vaya'aene ati vaya'yagaene amavalege'ya amaiyaye'ya amakaite elavi'ya age'ya ani vaya'mo'ya ala kava kanoene ati vaya'aene age'ya agete'ya Polona nago'ene ohae'ya atale'ya mainae. <sup>33</sup> Atale'ya mainageno ati vayate kava kanomo'a Polona metafa huno “Tole seni nofiteti aiya ayate kisalu kiho.” huno nehuno alitalu humainaya vayafe mage huno hamavige “Mani kanoa ta'e? Hana augafa havi kava higetama ani kavala nehae?” huno hamavige-maine. <sup>34</sup> Hamavigege'ya nago'a vaya'mo'ya nago'a kea nehage'ya nago'a vaya'mo'ya alu kea nehage'ya mai'ya tusi'a keyeso haya kemono aepa'a havilama ohuno ati vaya'mogamife mage hie “Lagaiti lokiya'age nopinaga avaletama viho.” huno humaine. <sup>35-36</sup> Hige'ya muki'a vea'mo'ya amakave keyeso hume hume ne'u'ya mage hae “Haesageno falisie.” hu'ya hume hume ne'vage'ya ani nomo fiata avale'ya vage'ya muki'a vaya'mo'ya tusiya hu'ya tu hisaya kava hayakehe ati vaya'mo'ya Polona avalesaga hu'ya anale avaleli'ya umainae.

*Polo'a agai'a ametiti yamo aepa'a hu falote huno hamapaimaine.*

37 Ati vaya'mo'ya tokiya'age nopinaga avale'ya haigahe nehageno Polo'a ati vayate kava kanomofe mage huno humaine “Nago kea kahapaigahe nehuana kanalepio?” huno havigegeni ati vayate kava kanomo'a mage hie “Kagaya Kaliki kea havilinano? 38 Kagaya Isipiti kanogika muki'a vayafena ‘Kamani vaya'ene tu hugahune.’ huka huteka tu huge huge nehaya vayala fo tauseni'a (4,000) vayala ka'me kotega amavaleka umainana kano mainane hu'na nagesa nehavugi kagaya ani kano mainapio?” huno havige. 39 Higeno Polo'a mage huno humaine “Nagaya Yuta kano mainoe. Silisia kotega agi hanea kumala Tasusie kuma aepa'nia hane. Museka nehugi nagaya alitalu humainaya vea'mogamina nago kea hamapaisufio?” huno havige-maine. 40 Havigegeni “Kanalelagi hamapaiyo.” huno higeno Polo'a ani nomo fiate heti-maineno kema aepa hegahena “Afa'a maiho.” huno ayana alisaga hige'ya alitalu humainaya vaya'mo'ya kea ohu'ya mainageno Polo'a amakai'ami kea Hipalu kefiti Yuta vaya'mogamina hamapai-maine.

## 22

1 Polo'a ati vaya'mogami tokiya nomo fiate heti-maineno mage huno hamapaiye “Nafu'naganagatamaene nenafagatamaene haviho nagaya havi kavala ohunoa ke lamahapaigahe hugi haviho.” huno hie. 2 Hige'ya Yuta vaya'mo'ya amakai'ami kea Hipalu kefiti hia kea havite'ya ke ohu'ya mainageno hamapaiye.

<sup>3</sup> Nagaya Yuta kano mainoe. Ita'nimo'a natenea kumala ala kola Silisiae osi kuma'nia Tasusie nateneanagi'na manima mainona kumate Yelusalemu emaine'na ala hu'na Kamalieli'a muki'a taginago-vanagomogami kahegi kemo aepa'a hu-navelige'na havimainoanagitama tamakaya meni kanafima Anumaya Koti kema akave malaya kava hu'na tusiya hu'na nagula amitafa humainoane. <sup>4</sup> Nagaya nayona Yisasi akave nehaya veala tusiya hu'na ali haviya humatete'na hamae'na fali-mategahe vene'nene a'nene amatafa hu'na nofiteti kimalu kimatete'na nofipi amavale'na amatenoane. <sup>5</sup> Ani kava'ma humainoa kea ala mono nopi uhagote mainea kava kanoene Kanisole vaya'ene age-mainayanagi'ya tamahapaigahae. Ani vaya'mo'ya nago auta'ma kae'ya namite'ya “Tamasigusi mainaya tafu-taganagamitega alika vuo.” hu'ya hage'na ali'na mage hu'na hue “Yisasi akave ne'vaya vayala Tamasigusi momatafa hu'na nofiteti kimalu kimatete'na amakata aisia ya alisaya yafe Yelusalemu amavale'na egahue.” hu'na humainoane.

*Polo'a agai'ama Yisasina agu'a aminea yamo aepa'a hamapai-maine.*

<sup>6</sup> Yagemo'a amu'noka'no hige'na Tamasigusi uva'yi hugahe hugeno aupa'a ikapinagatila tusi'a hale yamo nagaitela meyevasa humaine. <sup>7</sup> Meyevasa hige'na mopafi asaga hu-lavite'na havugeno nagola ala kefiti mage huno hie “Sologae Sologae na'a higeke nagaila ali haviya hunenatane?” huno humaine. <sup>8</sup> Hige'na

kenona'a mage hu'na hue “Alamogae kagaya tagae?” hu'na hugeno nagaifena mage hie “Nagaya Nasaleti Yisasi'nae. Nagaila maika ali haviya hunenatane.” huno humaine.  
<sup>9</sup> Hige'ya nagai'enema mainaya vaya'mo'ya hale yama'a agayanagi nagaila kema nahapaiya agea ohavinae.

<sup>10</sup> Ohavinagi nagaya mage hue “Alamogae na'a hisue?” hu'na havigogeno mage huno hie “Hetika Tamasigusi ugeno'o. Visanageno'a muki'a ali'yama alisana kea nago kanomo'a kahapaigahie.” huno nahapaiye.  
<sup>11</sup> Nahapaige'na nehavugeno hale yama'amo'a tusiya huno aye vasa higeno'agino naulaga o'agoge'ya nagai'enema umainona vaya'mo'ya nayate aligeta Tamasigusia umainone.  
<sup>12</sup> Unana nago kanomo agia Ananaiyasi'e anile nemaiyanagino tusiya huno Anumaya Koti kahegi kea akave nemalea kanogi'ya muki'a ani kumate'ma mainaya Yuta vea'mo'ya “Kanale kano maine.” hu'ya agia alisaga nehaiya kanoe. <sup>13</sup> Ani kanoa Ananaiyasi'e nagaila navate me heti-maineno mage huno humaine “Pologa nenafugae kaulagamo'a eteno aigali hisie.” huno higeno naulagamo'a aigali hige'na anile aup'a'a ani kanoa age-mainoe. <sup>14</sup> Ne'agogeno Ananaiyasi'a nagaifena mage huno nahapaiye “Taginagomo'ya agima alisaga humainaya Anumaya Koti'a agai'a haiya yafema havisana yafe'ene Fatagoma Humainea Kanomoma ageteka agai avayafiti kema havisanafene huno kagaila hapali-

maine. <sup>15</sup> Hapali-maineanagika agaifena huhaleka hamanepaika age-mainana yafe'ene havimainana yafe'ene muki'a vaya'mogamina hamapaigane. <sup>16</sup> Na'a hige'ka agava mainane? Hetika uge'ya Yisasi agile tina falegatesageno Anumaya Koti'a kefo yaka'a aye ha'mi-taleno." huno humaine.

*Anumayamo'a Polona Yuta vea omainaya veapi mono kea mo huhalesiafene huno hutene.*

<sup>17</sup> Hige'na nagaya ete'na Yelusalemu emaine'na ala mono nopi hai'na Anumayamotega havinege'na nagola himona kana yana age-mainoe. <sup>18</sup> Agoana Yisasina agogeno nagaifena mage huno humaine "Male mainaya vea'mo'ya nagaifema hisana kehena 'Tamage nehane.' hu'ya ohavigahagi Yelusalemua ne'ataleka kaiyayeka alu kumate vuo." huno humaine. <sup>19</sup> Hige'na nagaya mage hue "Anumayanimogae nagaya muki'a Yuta vea'mogami mono nopi falege falege hu'na kagaifema havi'ya amakupi malenaya veala amavale'na kina nopi mo humatete'na ka'yona ne'amami'na humainoa kea mani vaya'mo'ya ago havilinae. <sup>20</sup> Havilinagi Sitiveni'a kagaifema hamanepaiya kanoma hayageno'ma falige'na nagaya avate heti-maine'na 'Kanale kava nehae.' hu'na hayaya vaya'mogamina kena'amile yagai'na mainoge'ya hayageno fali-maine." huno hamapaiye. <sup>21</sup> Hige'ya Anumayamo'a nagaifena mage huno humaine "Hetika vuo. Nagaya hugatesugeka aya'aya kotega Yuta vea'ne

omainaya veapi hugategahue.” huno hige'na havimainoe huno humaine.

*Polo'a “Nagaya Lomu kano mainoe.” huno ati vayala hamapaimaine.*

<sup>22</sup> “Yuta vea omainaya veapi ugahuema.” hia keleti amaipa haviya nehu'ya ala kegefafiti Polofena mage hu'ya hae “Haegenofalino. Na'a augafa kanomo'a afa'a omaigahigi ago haegenofalino.” hu'ya humainae. <sup>23-24</sup> Ala kenake nehu'ya siota'amia asagi ne'atale'ya kugukege'ya kate'ya haga'yu hu ne'atageno ati vayate ala kava kanomo'a mage hie “Hailagi ataleho.” ne-huno ati vayahogamife “Tokiya notifi Polona avaletama haiho. Vayahagamoya ala kefiti'ma Polona ‘Haegenofalino.’ hu'ya haya kemona aepa'ama havisuafe hegi ka'yoteti Polona aikolisageno ani kemona aepa'a tahapaisie.” huno humaine. <sup>25</sup> Hige'ya avale'ya hegi ka'yoteti haegahe nofiteti kine'atageno Polo'a ani aliyate kava ne'yagaiya ati kanomofena mage huno havige “Lomu kahegi kemo'a ‘Kanalelagi Lomu nofi kanomona\* kaiyeke'a havitama fatago hutama kaiyekea huo'atenetama hegi ka'yotetila haeho.’ huno humainefi?” huno hamavige-maine.

<sup>26</sup> Higeno ati vayate'ma kava ne'yagaiya kanomo'a anima hia kea haviteno anile ataleneno ala kava kanomote mage huno mo hie “Kagaya hana'a hugane? Mani kanoa fatago huno Lomu nofi kano\* maine.” huno hapaiye. <sup>27</sup> Higeno ati vayate ala kava kanomo'a Poloteno mage huno havige “Kagaya Lomu nofi kano mainano?” huno havigegenofalo'a “E.”

huno humaine. <sup>28</sup> Higeno ati vayate ala kava kanomo'a mage hie “Nagaya kamani vayala kasago'ya mone'ni'a miyana amamite'na Lomu nofi kano hapae-mainoe.” huno higeno Polo'a mage hie “Kagaya ani'a humainanagi nagaya ita'ni'mo'a natege'na Lomu nofi kano fatago hu'na mainoe.” huno humaine. <sup>29</sup> Hige'ya hegi ka'yoteti amigahema haya vaya'mo'ya ani kea havite'ya anile aup'a ne'atale'ya vageno ati vayate ala kava kanomo'a havigeno “Polo'a Lomu nofi kano fatago huno mainege'na nofila huteno.” huno tusi yate kolia humaine.

*Polo'a Yuta kanisole vaya'mogami amaulagale kaiyekea huhaleno humaine.*

<sup>30</sup> Kolia nehuno mo faeteno egamaga Yuta vaya'mo'yama Polofe “Ma kava humaine.” hu'ya humainaya kemona aepa'a havigahe ayapiti nofila kalu hene'ateno ala mono note kava vaya'ene muki'a Yuta vaya'mogami Kanisole vaya'enefe “Melitalu hiho.” huno hige'ya melitalu humaletageno Polona avaleno elavino amu'no'amifi me hetitene.

## 23

<sup>1</sup> Polo'a Kanisole vaya amaulagafi agesagali-maineno mage huno humaine “Nafu'naganagatamae nagaya kanale ka vai ne'aye'na muki'a kanafi'ene meni kanafi'ene Anumaya Koti aulagafina nagu'amo'a nagola havi kavala ohune hu'na nehue.” huno humaine. <sup>2</sup> Higeno mono note'ma uhagote mainea kava kanomo'ya agia Ananaiyasi'e avate'ma heti'ya maiya vayafena mage hie “Avayale



ka'yo aikoliho.” huno humaine. <sup>3</sup> Higeno Polo'a agaifena mage huno hapaiye “Kagaya nagaifena ‘Haeho.’ huka nehananagi Anumaya Koti'a kagaila kahaegahie. Kagaya haviya hia kegi'yamo agupile efe peni fale-malenea kana augafa kava nehuka kagu'afina havi omaleka amegati savale kanomogae. Kagaya kahegi kefiti kaiyeke hunategahe nehuka ‘Haeho’ huka nehananagi ani kea ali ne'atagayane.” huno humaine. <sup>4</sup> Huno hige'ya Polo avate het'i'ya mainaya vaya'mo'ya mage hae “Kagaya Anumaya Koti mono note uhagote mainea kava kanomofena kanale ohunea kea nehano?” hu'ya humainae. <sup>5</sup> Hageno Polo'a mage hie “Nafu'naganagatama musetami nehugi nagaya havi kava hue. Agayama mono note hagote kava kano maine kema havimainole'asina mani kea ohule'asinagi. Anumaya Koti auta'mafina mage huno kae-maleneane ‘Kava kanotamimofena kanale ohunesia kea ohiho.’ hu'ya kae-malენage'na age-mainoane.” huno nehie.

<sup>6</sup> Huteno Polo'a haviana nago'a Kanisole vayala Satiusi\* vayalagi nago'a Kanisole vayala Falasia vayalagi hu'ya mainageno haviafene huno mage huno hamapaiye “Nagaya Falasia kanogi'na nenafa'a Falasia kanomo nateneanagi'na nagaya ‘Fali-mainaya vayala hetigahae.’ hu'na nametiti nehua yateti kaiyekea hunategahe nehae.” huno humaine. <sup>7</sup> Mani kema hige'ya havite'ya Falasia vaya'ene Satiusi vaya'ene amu'no'amifi tusi'a ke vaite'ya ani Kanisolefitila tolefi ali fako faka humainae. <sup>8</sup> Na'afene? Satiusi vaya'mo'ya mage hu'ya nehae “Vaya'yagama fali-mainesafitila

he'otigahae.” hu'ya nehuya “Ensole vayahene avamu'ene omainae.” hu'ya nehayangiya Falasia vayahemo'ya ani yayagahena “Lamage mainae.” hu'ya nehayane. <sup>9</sup> Anileti ala kefiti tusi'a ke ne'vai'ya nago'a Falasia vayapiti nago'a kahegi kema havilinaya vayahemo'ya heti'ya mage hae “Ma kanoma agonana havi kava'ma nehia yana omalene. Ensole kanofi avamu'mo'afi hapai-mainesia kea havigu Anumaya Koti'ene tu huyafenagita afa'a atalesune.” hu'ya humainae.

<sup>10</sup> Nehage'ya kasago'ya kema vaiya yateti ati vayate ala kava kanomo'a Polona aluga alugati avayu hisalega amu'nopiti aiya aya ali akalupeyafene huno ati vayahemogamife “Lavitama amu'no'amifiti Polona avalesaga hutama tokiya'age notifinaga avaletama moteho.” huno hige'ya movale'ya umainae.

<sup>11</sup> Ani kegela Anumayamo'a Polo avate me hetimaineno Polofe mage huno hapaiye “Kolia ohuka kagu kamena ali lokiya vaika maiyo. Kagaya Yelusalemuma maineka nagai'fema hamapai-mainana kava huka Lomua mo huhaleka hama-paigane.” huno humaine.

*Yuta vayahemo'ya ke huha'yagi'ya “Polona haesunageno faligahie.” hu'ya humainae.*

<sup>12</sup> Faete'ya ko'ma neliana nago'a Yuta vayahemo'ya alitalu hu'ya mage hae “Polona haesunageno falisie. Anumaya Koti aulagafina tamagelafa nehune menia ti'ene kave'ene mosita maineta falisia yupa hataka huta negahune. Haesunageno'ma ofalisiana Anumaya Koti'a ali-haviya hulatesie hu'ya hulokiya vai-mainae.”

13 Ani kema hulokiya vai-mainaya vayala foti'a (40) vaya'mo'ya humainae. 14 Ani vaya'yagamo'ya mono note kava vayate'ene soka vayate'ene u'ya mage hu'ya mo hamapaiye “Lagaya Polona haesunageno falisie huta menia ti'ene kave'ene mosita maineta falisia yupa hataka huta negahune huta Anumaya Koti aufina hulokiya ne'vaune. 15 Ne'vaunafe menia tamakayaene Kanisole vaya'ene ati vayate kava kanomofe ke hutama mage hutama hiho ‘Kaiyeke hutegahunagi Polona tagaite avaletama eho.’ hutama hige'ya yaufa tamakaitega eva'yi ohune'ya katega avale'ya ne'esageta hayamano.” hu'ya humainae.

16 Hageno Polona asa'amo nafa'nemo'a ani kea haviteno ati vaya'mogami nopinaga haino Polona hapai-mainae. 17 Hapaigeno Polo'a nago'a ati vayate kava kanomofena ke higeno egeno mage huno hapaiye “Ma nafa'nea muki'a ati vayate kava kanomotega avaleka visanageno nago ke hapaisie hu'na nehue.” huno humaine. 18 Hapaigeno muki'a ati vayate kava kanomote avaleno vigeno mage huno mo hie “Nofipi kanoa, Polo'a, ke hige'na ugeno ‘Ma nafa'nehe nago ke kahapaigahigi kagaitefe avaleka vuo.’ huno hige'na avale'na ene'oe.” huno hapai-mainae. 19 Hapaigeno muki'a ati vayate kava kanomo'a ani nafa'nea ayate alilino avaleno agegayalega anakai'anige umaine'ana mage huno havige “Na'ane ke nahapaigahe emainane?” huno havige. 20 Havigegeni ani nafa'nemo'a mage huno hapaiye “Yuta vaya'mo'ya ke hu'ya ha'ya

kite'ya kagaifena mage hu'ya kahavi-gegahe nehæ 'Ega Polona Kanisolete avaleka esanageta nago'ene kemo aepa'a havisune.' hu'ya kahavi-gegahe nehæ. <sup>21</sup> Hu'ya hugahagi amakai kea havika akave omalo. Ani vayapiti foti'a (40) vaya'ene nago'a vaya'ene Polona haekaha kafo malene'ya mage hu'ya hæ 'Menia ti'ene kave'ene mosita maineta falisia yupa hataka huta negahune. Haesunageno ofalisigeno'a Anumaya Koti'a ali-haviya hulatesie.' hu'ya Anumaya Koti aulagafina hulokiya vaite'ya menima kagaya avalekama visanafene hu'ya kagava mainae." huno humaine. <sup>22</sup> Higeno muki'a ati vayate kava kanomo'a ani nafa'nemofena mage huno hapaiye "Manima nagai'ma hufalote huka nahapaina kea nago'a vayala hama'opaiyo. Nagi kagaya nagaitegatila ago vuo." huno hutegenomaine.

*Polona hutegenomaine ala kava kanoa Filikisitegamaine.*

<sup>23</sup> Tole kanolatana ati vayate kava yagaimaina'a kanolatafe ke hige'ana a'ageno mage huno hanapaiye "Talo tala hutana meni kegela naeni (9) kiloki tu hataleti'a (200) ati vaya'ene seveti'a (70) hosi agupifi ne'vaya ati vaya'ene tu hataleti'a (200) keve nehaya ati vaya'ene Sisalia ugahæ. <sup>24</sup> Polo'ma maino visia hosi afuene talo tala hutetana aluya hutana kava yagaitana Polona fatago hutana avaletana ala Kamani kava kanomo ayapi mote'o. Ani kanomo agia Filikisi'e." huno humaine.

<sup>25-26</sup> Huteno avona kaeno mage huno humaine "Nagaila nagia Kolotiusi Lisiasi'nae tusi

kanale Kamani kava kanomoga Filikisigale mani avona kae'na hu falu fala hunegatoe. <sup>27</sup> Yuta vaya'mo'ya mani kanomona atafa hu'ya hae falisaya kava hayanagi agaya Lomu kanoma mainea ke havite'na ati vaya'niene ani vaya'mogami amayapitila mo-vale-mainoe. <sup>28</sup> Kaiyeke hutesaya kemo aepa'a havigahe Kanisole vaya'amile avale'na lavimainoe. <sup>29</sup> Avale'na lavi-maine'na havuana amakai'ami 'Kahegi kea atagae-maine.' hu'ya hayanagi falisia augafa havi kavala ohune. Nofi hutesua augafa kefo ya'enena tamage huno ohune. <sup>30</sup> Ohunegi nago kema havuana nago'a vaya'mo'ya 'Kesi falakita haesunageno falisie.' hu'ya haya ke me nahapaige'na havite'na aupa'a kagaitega hutogeno vie. Vigi kaiyekema hutesaya vaya'mo'ya kagaitega mo hufalote hu'ya hu fatago hisageka havisane hu'na hamapauge'ya ne'vae. Ke'nia male ha'no hie nagai'ni nagia Kolotiusi Lisiasi'nae." huno avopina kae-malene.

<sup>31</sup> Ati vaya'mo'ya kava kanomo ke akave male'ya kege Polona avale'ya Atipatalisi kumate umainae. <sup>32</sup> Mo faete'ya nago'a ati vaya'mo'ya ete'ya age'ya hosimo agupifi nemaiya ati vaya'mo'ya Polona avale'ya umainae. <sup>33</sup> Sisalia uva'yi hu'ya ani avona ala Kamani kava kanomona mo-mite'ya Polona agai aule avale'ya mo hetitenae. <sup>34</sup> Mo heti-mainegenon ala Kamani kava kanomo'a ani auta'ma alino hapalino haviteno Polona mage huno havige "Kagaya hana kotega kano mainane?" huno higeno "Silisia kano mainoe." huno humaine. <sup>35</sup> Higeno haviteno mage huno hie "Kaiyekema hugatesaya vaya'ma eva'yi hisage'na kaiyekeka'a hav-

igahue.” huno nehuno ati vayafe “Heloti'ma kimalenea Kamani nopi avaletama kava mo ya-gaitegenono maino.” huno humaine.

## 24

*Yuta kava vava'mo'ya Filikisi aule Polona kaiyeke hutena.*

<sup>1</sup> Faefu'a (5) kanamo'a ha'no hige'ya mono nopi hagote kava kanomo'a Ananaiyasi'ene nago'a vayatamaene nagola ke havino fatago nehia kanoa Tetulusi'ene Sisalia elavi'ya emaine'ya Polona kaiyekema hutegahe haya kea ala Kamani kava kanomona hapaimainae. <sup>2-3</sup> Hapaigeno haviteno Polofe ke higeno egeno Tetulusi'a aepa heno Polona kaiyekea hune'ateno mage huno hie “Kanale Kamani kava kanomoga Filikisigae kagayama kava yagai-mainanafena tagaya kanale'ya huta yuna heta mainonageka kasago'ya kanale kavake'ya huka kasago'ya kumate'ma laya hisana kea hanageta aluya huta museka'a humainonane. <sup>4</sup> Nago'a kene hugahe huanagi amuseka'a nehunagi menima kahapaisuna kea osi kea haviio. <sup>5</sup> Tagayama agonana ma kanoa Polo'e tusi'a havi kava'yaga nehuno muki'a kumate Yuta vea'mogami amu'no'amifina hetino ke vaino tu hisaya ke hamane'paina Nasaleti Yisasi kema nehaviya vea'mogami ala kano'ami maine. <sup>6-7</sup> Maineno tagaiti ala mono nopi hilato ohunea kava hugahe hianagi mo-tafa huta tagaiti kahegi keleti kaiyekea hutegahe hunanagi ati vayate ala kava kanoa Lisiasi'a eno tokiya'aleti tayapiti mevaleno

umaine. <sup>8</sup> Avaleno emainegi kagaya havigeteka kaiyekema hutesanana muki'ama humainona kea agai'a avayafiti aepa'a hinageka havigane.” huno humaine. <sup>9</sup> Hige'ya Yuta vaya'mo'yaenena “Tamage nehie.” hu'ya nago'ene Polona kaiyekea hutenaē.

*Polo'a Filikisitela kea huhaleno humaine.*

<sup>10</sup> Ala Kamani kava kanomo'a Polofe “Kaiyeke huo.” huno ayateti avame'name higeno Polo'a mage huno humaine kagaya aya'aya kafufima ani nofi vayatela kaiyekema humatenana yafena havi'na kolia nohue. Naipa kanale yapiti kenonakalela kahapaisue. <sup>11</sup> Hamavigesanana kahapaisageka havigane nagaya aya'aya kanagefa Yelusalemua hai'na omainogi tuelufu'a (12) kana kano'a Anumaya Koti agi alisaga hugahe Yelusalemua hai'na mainoe. <sup>12</sup> Hai'nama mauvana nagaya ala mono nopi maine'na nago'a vaya'enena kea o'vainoe. “Nagaitela veala melitalu hiho.” hu'na ohunoe. Mono no'yagafi'ene ala kumapi'enena ani kavala huge'ya onagenae. <sup>13</sup> Onagenagi menia kaiyekema hunenataya kemona ma vaya'mo'ya “Tamage nehune. Age-mainonanagita aepa'a kahapaigahune.” hu'ya hisaya ke'amia omalege'ya nehae. <sup>14</sup> Nehagi nago yafe kea hu-falote hu'na kahapaisue. Amakayama “Alu kategae.” hu'ya nehaya kama, Yisasi kema nehaviya vea'mo'ya akave nehaya kana, taginagomo'ya ne'vaya kate ne'u'na Anumaya Koti agia alisaga nehu'na muki'a kahegi kene Anumaya Koti amaune vaya'mogami kene

havi'na nagupi malenoe. <sup>15</sup> Nagupi malenogi amakayama haya kea “Anumaya Koti'a fatago hu'ya maine'ya fali-mainesaya vea'nene kefo kava hute'ya fali-mainesaya vea'nene ali hetimategahie.” hu'na nametitia nehue. <sup>16</sup> Ani yafe Anumaya Koti aulagale'ene vea'mogami amaulagale'ene hilato ohunea kavala ohu'na fatago hu'na maisua yafe kava yagai'na nemauvane.

<sup>17</sup> Mainoanagi'na aya'aya kafua alule mainoanagi menia Yuta nafu'naganagamina nago'a mone amamisuafene hu'na Anumaya Koti muse ya'ene amigahe Yelusalemua hai-mainoe. <sup>18</sup> Naugafaene nagu'aene sese hute'na ala mono nopi hai'na amite'na mainoge'ya nage-mainae. Nagai'enena nago'a vayala me-litalu hu'ya keyesoa ohage'na mainoe. <sup>19</sup> Mauvanagi nago'a Esiati Yuta vaya'mo'ya e'ya me nage-mainae. Amakayake nagai'fena “Havi kava nehie.” hu'ya humainaya ke kagai kaulagale me hunateho. <sup>20</sup> Omesage'yahena ma ma mainaya vaya'mo'ya nagayama Kanisole vaya amaule'ma heti-mainoa yupa “Havi kava humaine.” hu'ya humainesaya yafena me kahapaiho. <sup>21</sup> Kahapaigahagi nagaya ma yama'age amakai amu'no'amifina heti'na humainoe “Vea'ma fali-mainesafitila hetigahae.” hu'na humainoa keleti meni kanafina kaiyekea hu-nenatae huno humaine.

<sup>22</sup> Higeno Filikisi'a Yisasi kema nehaviya vea'mo'ya haya kea havimaineanagino mage huno hie “Haile. Ati vayate ala kava kanoa Lisiasi'a elavino esige'na kaiyeketamia fatago hulamategahue.” huno humaine. <sup>23</sup> Huteno ati



vayate kava ne'yagaiya kanomofe ke higeno egeno mage hie “Polona avaleka nofi nopina mo hutegananagi tokiya'age huka nofila hu o'ateka atalenege'ya nefu'ya kavela afa'a memi'ya aya hisae.” huno humaine.

*Filikisi'a Polona tole kafu nofila hutene.*

<sup>24</sup> Nago'a kanamo'a ha'no hutegeno Filikisi'ene a'amo'a Yuta ale agia Talusila'ene a'ageno Filikisi'a Polofe ke higeno eno Yisasi Kalaisife havi'ya amakupima male'ya amametiti nehaya kea mehanapai-maine. <sup>25</sup> Mage huno hanapaiye “Fatago hutana mainetana tanaku tanakesale kava yagai hetofa hutana mai'o.” Anumaya Koti'a haenagama kaiyeke humatesia ke nehigeno Filikisi'a koli nehuno mage huno humaine “Haile. Menia nenataleka eteka vuo. Haenaga ali'yani'a omalesige'na nago'ene keka'a havigahue.” huno humaine. <sup>26</sup> Nehuno agesa mage huno havie “Poloma atalesugeno'a nago'a mone namisifi?” huno agesa nehavino muki'a yupa agaifena ke higeno ege'ana kaiyekea hu'ana maina'e.

<sup>27</sup> Hume ne'a'ageno tole kafumo'a ha'no hutegeno Filikisi ali'yate'ma anona'a alimainea kava kanomo agia Polisiusi Fesatusi'e. Filikisi'a masave age'aino “Yuta vaya'mogamina hamaisia kava hugahue.” huno Polona nago'ene nofi nopina atalegeno maine.

## 25

*Polo'a “Ala Kamani kanoa Sisafe ke'nia havisie.” huno ke humaine.*

1 Fesatusi'a yagaisia kotega ago eva'yi huno tagufa (3) kana maiteno Sisaliati Yelusalemu haimaine. <sup>2-3</sup> Haige'ya mono note kava vaya'ene Yuta kava vaya'ene Polofena “Havi kava humaine.” hu'ya hapaite'ya mage hae “Museka'a nehunagi taya huka Polona hutegeno Yelusalemu eno.” hu'ya humainae. Amakaya kataga kafo malene'ya haesageno falisia amakesaleti humainae. <sup>4-5</sup> Hageno Fesatusi'a mage huno humaine “Polo'a Sisalia nofi nopi mainege'na naga osi kana kano'a maite'na anilega ugahe nehugi tamakaitami kava vaya'mogatama nagai'ene tavi-mainetama agaya havi kava'ma humainesiana kaiyekea mo hutegahae.” huno humaine.

6 Fesatusi'a eiti'a (8) kanao teni'a (10) kanafiga Yelusalemua maiteno eteno Sisalia lavino faeteno ko'ma neliana kaiyekema havi nopi umaineno mage hie “Polona avaletama eho.” huno humaine. <sup>7</sup> Kema higeno ege'ya Yelusalemuti emainaya Yuta vaya'mo'ya ava'ale maigagi maine'ya “Tusi'a havi kava humaine.” hu'ya kaiyekea hutayanagi nago'a aepa'a tamage hu'ya hu falote hu'ya haopainae. <sup>8</sup> Haopaigeno Polo'a mage huno hie “Nagaya nago'a Yuta vea'mogami kahegi kene ala mono nopi'enena Lomu ala kava kanoa Sisa'ene ali-haviyana huo'atenoe. Tamage hu'na nago kanomona havi kavala huo'atenoe.” huno humaine.

9 Hianagi Fesatusi'a masave age aino “Yuta vaya'mogamina hamaisifa kava hugahue.” huno Polofena mage huno havige-maine “Kagaya kanale Yelusalemu haisanage'na anilega hai'na

kaiyekeka'a havi'na fatago hugatesufio?" huno havige-maine.

<sup>10</sup> Higeno Polo'a mage huno hie "Menima Sisa'a kaiyeke nehavia nopi heti-mainesugeka anile kaiyeke'nia havite'asine hu'na nehue. Kagaya ago havilinane nagaya Yuta vayapina nago kanomona havi kavala huo'atenoe.

<sup>11</sup> Nahaesage'na falisua kefo kava'ma humainole'asina kanalelagi'na falule'asinagi manima hunataya kaiyekemo'a tamage huno aepa'ama omalesigekahena amayapina onateganagi ala kanoa Sisa ayapi natesanageno ani kaiyekea hunatesie hu'na nehue." huno humaine. <sup>12</sup> Higeno Fesatusi'a agai'a Kanisole vaya'ene kea kea huteno mage hie "Sisa'a kaiyekea hunatesie huka hanafe Sisatega ugame." huno humaine.

*Fesatusi'a Polofe Yuta vaya'mogami ala sauve kano'amia Agalipana havige-maine.*

<sup>13</sup> Nago'a kanamo'a ha'no hutegeno ala sauve kanoa Agalipa'ene asa'amo'a Peniasi'ene Fesatusina hu falu fala hutegahe Sisalia eva'yi humaina'e. <sup>14</sup> Eva'yi hute'ana aya'aya kanagefa maina'ageno Fesatusi'a Polo kaiyekea sauve kanoa Agalipana hanepaino mage huno hie "Filikisi'ma mainea kanafina nago kanoa nofi nopi mainegeno Filikisi'a anifi ataleno umaine. <sup>15</sup> Umaineanagi'na Yelusalemu hai'na mainoge'ya mono note kava vaya'ene Yuta kava vaya'ene agaifena nahapai'ya 'Kaiyekea huteteka hanageke yana amio.' hu'ya humainae. <sup>16</sup> Hage'na mage humainoe 'Tagaya Lomu

vaya'mogata ma au'ava kava nehunane. Nago kanomo'a kaiyeke hutesia vayala amaule mainesage'ya kaiyekea hutetesageno anona'amile 'Kagaya kaiyekema hugataya kea huo.' huta hagoteta hisunageno hinageta haviteta fatago hugahune huta humainonane.' hu'na hamapai-mainoe.

<sup>17</sup> Huge'ya male melitalu hu'ya mainage'na faete'na aupa'a kaiyeke humate nopi u'na 'Polona avaletama eho.' hu'na humainoe.

<sup>18</sup> Huge'ya kaiyekema hutaya vayala heti'ya aepa he'ya agaila kaiyekea hutayanagi 'Na'a kefo kavala humane.' hu'na nagesama havua kefo kavafena ohunae. <sup>19</sup> Ohunagi amakai'ami mono'amiheke'ya agai'enenana ke ne'vai'ya nagola fali-mainena kanoa, Yisasi'e, kanomofe, Polo'a

'Ani kanoa afa'a hetino maine.' huno hige'ya ke vai-mainae. <sup>20</sup> Hige'na 'Hana'a hu'na ani kemo aepa'a havi'na fatago hisue?' hu'na hute'na mage hu'na havige-mainoe 'Kanale Yelusalemua haisanage'na kaiyekeka'a havite'na fatago hugatesufio?'

hu'na havige-mainoe. <sup>21</sup> Havigogeno Polo'a 'Mainesugenon ala kava kanomo'a kaiyeke'nia havisie.' huno hige'na 'Kanalelagi nofi nopi atesugenon mainesige'na Sisate hutegehue.' hu'na humainoe." huno hie. <sup>22</sup> Higeno Agalipa'a Fesatusife mage

huno humane "Nagaya ani kanomo kea havigahue." huno higeno "Kanalelagi egamaga ke'a havigane." huno humane.

<sup>23</sup> Hige'ya mo faete'ya kotige'ya Agalipagani Penaisigania kanale konagali kena faite'ana kaiyeke havi nopi va'age'ya ati vayate kava

vaya'mo'yaene ani kumate kava vaya'mo'yaene tokae'ya ani nopi hai-mainageno Fesatusi'a Polofe ke hige'ya avale'ya emainae. <sup>24</sup> Ageno Fesatusi'a mage huno humaine “Ala Sauve kanomoga, Agalipagaene muki'a melitalu humainaya vaya'ene haviho. Ma ma agaya kanomofe muki'a Yuta vaya'mo'ya Yelusalemuene ma kumate'ene maine'ya tokiya'age kefiti mage hu'ya nahapaiye ‘Mani kanoa kaiyeke huteka haegeno falino.’ hu'ya ala kefiti humainae. <sup>25</sup> Hage'na nagayama agoana mani kanomo'a nagola falisia kefo kavala ohune hu'na hugeno Polo'a ‘Lomu ala Sauve kanomo kaiyeke'nia havigahie.’ huno hige'na ‘Kanalelagika ugane.’ hu'na humainoe. <sup>26</sup> Huanagi ani kanomo'a falisia kefo kava'ma humainea kemo'a omalege'na ‘Na keleti kaiyekea huto.’ hu'na ala Sauve kanomotega auta'ma kaesugeno visia ke'nia omalege'na tamakaite avale'na ne'ogi ala kava kanomoga Agalipaga mani kanomo kaiyekea havilama huka havisanage'na avona kae'na atalesue hu'na tanakaite avale'na ne'oe. <sup>27</sup> Nagaya havuana nofi kanoa hutesugeno vinage'na kaiyekema hutesaya kema kae'na o'amisuana haviya hugahie hu'na nehue.” huno humaine.

## 26

*Polo'a agai'ma kaiyekema hutaya kea huhaleno Agalipana hapai-maine.*

<sup>1</sup> Agalipa'a Polofe mage huno hapaiye “Kagaya keka'a huo.” huno higeno Polo'a ayana ha'ya

huno kaiyeke hutea kenona'a mage huno humaine.

<sup>2</sup> Agalipaga, ala sauve kanomogae, menia kagai kaule hufalote hu'na Yuta vaya'mo'yama kaiyeke hunatenaya kemo anona'a hisua yafena muse nehue. <sup>3</sup> Yuta vaya'mogatama nehuna kava'ene ke ne'vauna aepa'a kagaya ago age-mainanafene hu'na tusi'a muse nehue. Na'a humainanafe museka'a nehugi kagaite'ma hisua kehena kasalola okahaenageka ako huka maineka havio.

<sup>4</sup> Nafa'nema mainolegati Silisia mainoanagi'na haenaga'a Yelusalemuma elavi-mainoana ani nofi veamo'ya kama vai-ne'ayoa yana Yuta vea'mo'ya nage-mainae. <sup>5</sup> Nayona nagaya Falasia vaya'mogami kahegi kema akave maloge'ya nage-mainaya yafema kahapaisuge'yahena ani kea kahapaigahae. <sup>6</sup> Kahapaigahagi nayoma taginagomogamifema Anumaya Koti'a "Nago yana hulamategahue." huno hulokiya vai-malenea kele'ma nametiti hua yateti menia kaiyekea hunatage'na heti-mainoe. <sup>7</sup> Anima hulokiya vai-malenea kelefena muki'a tuelufu'a (12) Yuta nofi vea'mo'ya amametitia nate'ene kege'ene ani yama hulatesiafene hu'ya Anumaya Koti agia ayeme ayeme ne'vae. Ne'vage'na Agalipaga, ala sauve kanomogae, nagaya ani'a hu'na nametiti hua yateti Yuta vaya'mo'ya kaiyekea mai'ya hunenatae. <sup>8</sup> Na'a higetama nagaya "Anumaya Koti'a fali-mainaya veala ali hetimatene." hu'nama hua kehena "Havige nehie." hutama nehae?

<sup>9</sup> Nayona nagaya "Nasaleti Yisasi agia ali'na mopafi atalesugeno lavisie." hu'na alu kava

alu kavala humatenoe. <sup>10</sup> Mono note kava vaya'mo'ya “Na'ama huo.” hu'ya hunatage'na Yelusalemu maine'ya Yisasina amaku'a amitafa humainaya vea'mogamina amavale'na nofi mo humatenoge'ya kaiyekema humataya yupa “Hamaege'ya faliho.” hu'na humainoane. <sup>11</sup> Yisasi vea'mogamina “Kalaisifena kamuge hatagetama vaimateho.” hu'na nehu'na kasago'ya mono nopi ka'yona mo ne'amami'na nahai-vai'na Yuta vea'ne omainaya vaya'mogami kumapina moli-haviya hune'amatoane.

*Polo'a agai'a Yisasina agu'a aiyahae huno aminea ke'a humaine.*

<sup>12</sup> Ani kava hisuafe ala mono note kava vaya'mo'ya hunatage'na Tamasigusi ugahe umainoe. <sup>13</sup> Ala Sauve kanomogae, yagemo'a amu'noka'no hige'na katega nehaugeno ikapinagati tusi'a vasa yamo'a, yagemona agaseno ala yakefa, huno aivasa hige'na age-mainoge'ya nagai'ma navagi hageta hauna vaya'ene aivasa lahou-maine. <sup>14</sup> Hige'na lagaya mopafi asaga hu-lavita tago'ya aye-maineta havugeno Yuta vaya'mogami kefiti mage hie “Sologae Sologae na'a hige'ka nagaila ali haviya nehane? Ani'ama hanana avela hanegeni kagaika'a kagata ne'aiye.” huno humaine. <sup>15-16</sup> Hige'na mage hu'na hue “Ala kanomogae kagaya lagae?” hu'na hugeno mage hie “Nagaya Yisasi'nae ali-haviya maikama hunatana kanomo'nagi hetio. Kagaila hugatesugeka nagai ali'yana alika nagai'ma nagana yafe'ene haenagama kavelisua yafe'ene hamapaisanafene hu'na kagaitela eva'yi

nehue. <sup>17</sup> Nehuafe Yuta vea'ne omainaya vea'mogamitega hugategahugi haenagama ali haviya hugatesaya Yuta vayapiti'ene Yuta vea'ne omainaya vaya'mogami amayapiti'ene kavale'na kaugafa aligatigahue. <sup>18</sup> Yuta vea'ne omainaya vea'mogamina asuma humainea amaulaga alika kaligali humatesanage'ya haniki-mainea yapima mainaya yana ne'atale'ya amaku'a aiyahae hu'ya vasa yapi maisaya yafe hunegatoe. Satani kava yagai-mainea yapina ne'atale'ya amaku'a aiyahae hu'ya Anumaya Koti kava yagai-mainea yapi maisaya yafe hunegatoe. Nagaiife havi'ya amakupi male'ya amametiti hisage'na kefo ya'amia aige'amate'na atalematete'na alu aotage anaga'niene amavale'na amatesuge'ya maisae hu'na hunegatoe.” huno humaine.

*Polo'a agai'ama Yisasi kema hamapaino vaiye-mainea kavafe Agalipana hapai-mainie.*

<sup>19</sup> Agalipaga, ala Sauve kanomogae ani kema hige'na ikate age-mainoa yafenagi'na akave malenoe. <sup>20</sup> Hagote'na Tamasigusi ute'na anileti Yelusalemua ua'yamo'na anileti muki'a Yutia kotega ute ete hu'na Yuta vea'ne omainaya veate'ene mage hu'na hamapai-mainoe “Kefo yatamia ne'ataletama tamaku'a aiyahae hutama Anumaya Kotitega etama kanale au'ava yana hisage'ya tamaku'ama aiyahae hisaya yana agesae.” hu'na hamapai-mainoe. <sup>21</sup> Mani kema hamapai-mainoa keleti ala mono nopi mainoge'ya Yuta vaya'mo'ya natafa hu'ya nahaesage'na falisua kavala hunatenae. <sup>22</sup> Hunatenagi Anumaya Koti'a muki'a yupa naya hige'na menia heti'na



maine'na ala kava vaya'ene osi vaya'enena tamahanepauve. Mosese'ene Anumaya Koti aune vaya'ene “Na'a yana ma'a yana falote hugahie.” hu'ya humainaya ke'age hamapai-mainoe. <sup>23</sup> Mage hu'ya humainayane “Anumaya Koti'ma taugafa aligatigahema hutenea kanomo'a augafa agata aisigeno faligahie. Fali-mainesifiti muki'a veala amakaseno uhagotelamateno hetiteno hale yama'a hanesia kea Yuta vea'nene Yuta vea'ne omainaya vea'nene hama-paigahie.” hu'ya humainayane huno humaine.

*Polo'a Agalipafe “Anumayafena havika kagupi maleka kametiti huo.” huno hapaimaine.*

<sup>24</sup> Polo'a na ke higeno Fesatusi'a ala kefiti mage huno hie “Pologae aifo'nafo ke maika nehanaagi alu avo alu avoma maika nehapalina ya'yagamo aifo'nafo kavala hugatene.” huno humaine. <sup>25</sup> Higeno Polo'a mage huno hie “Fesatusigae, ala kava kanomogae, aifo'nafo kea nohugi kelamage nehue. <sup>26</sup> Nehugi nagayama hua kemo'a ala Sauve kanomoga Agalipagae havilinanage'na hufalote hu'na nehue. Nagaya havuana muki'a ani kavala falaki'ya ohunagi ani kavala ago age-mainane. <sup>27</sup> Ala Sauve kanomoga, Agalipagae, kagaya Anumaya Koti amaune vaya'mogami kea ago havika kagupi maleka kametiti nehano? E, kagupina ago alika malana yana nagaya ago havilinoe.” huno hapaiye. <sup>28</sup> Higeno Agalipa'a mage huno hie “Menima hana keleti aupa'a nagaya Yisasife havi'na nagupi malegahue huka nehano?” huno humaine. <sup>29</sup> Higeno Polo'a mage huno hie

“Aupa kana kano'afi aya'aya kana mainesanano nagaya hua augafa kava huka Yisasife havika kagupi malesanafe Anumayamotega ke hu'na havi-negoe. Kagai feke'ya mani kea nohugi muki'a ma kanale'ma maine'ya nagai kema nehaviya vea'nenefe nagaya mainoa augafa kava hu'ya maisae hu'na Anumayamotega havinegogi nofipi maisaya yafena nonahaiye.” huno humaine.

<sup>30-31</sup> Hige'ya ala Sauve kanoa Agalipa'ene nago kava kanoa Fesatusi'ene Penaisi'ene amakai'enema mainaya vea'nemo'ya hetiya alule umaine'ya kea kea mohu mehu hute'ya mage hae “Mani kanomo'a nofila hutete'ya haesageno falisia augafa kefo kavala ohune.” hu'ya humainae. <sup>32</sup> Hayanagi Agalipa'a Fesatusina mage huno hapaiye “Mani kanoa, Polo'e, ‘Sisa'a kaiyeke'nia havisie.’ huno'ma ohunele'asina ‘Nofipitila atalegeno vino.’ hu'na hule'asine.” huno humaine.

## 27

*Polona Lomu kumate visia tipi kalefi avale'ya atenae.*

<sup>1</sup> Polofe “Lomu kumate tipi kalefi ugane.” hu'ya hute'ya avale'ya nago'a nofipi mainaya vava'ene amavale'ya ati vayate kava kanomo ayapi amatenae. Ani ati kanomo agia Yuliusi'e. Ani kanoa Sisa'a, Sauve kanomo, ati kano'a maineane. <sup>2</sup> Nagaya Luku'nae Alisatakusi'ene Polo'ene umainone. Alisatakusi'a Masetoniati kanoe. Osi kuma'amo agia Tesalonaika kanogino tagai'ene vigeta nago Atalamitiumu kumate tipi

kalefi haisaga humaunageno tipi kalemo'a Esia ko'mo haopalega haigahe higeta hai-mainone. <sup>3</sup> Nehaunageno kotigeta ega Saitoni kumate hai va'yi hunageno Yuliusi'a Polona ali kayone hune'ateno “Kanalelagika vayakamogamitega visanage'ya ali kanale hulamatesae.” huno tatalegeta umainone. <sup>4</sup> Umaigeta Saitoni kumala ne'ataleta yasimo'a tusiya huno alino halage higeta yasimo'a osi'ma hisiafe nago hagelimo amu'nopi hanea kuma'mo aupate eumainone. Ani kuma'mo agia Saipalusie. <sup>5</sup> Hagelipi Silisiaene Pamafilia kuma'ene mogaseta Maila euva'yima hunana ani kuma'mona ala agi'a Lisia eumainone. <sup>6</sup> Maila mainonageno kava humainea ati kanomo'a nago Alekasatalia tipi kalea ageteno ani tipi kalemo'a Lomu ugahe higeno tavalegeta ani tipi kalefi haisaga humaita eumainone.

<sup>7</sup> Tipi kalefima unana aiyayeno o'unegi kasago'ya kanagefa hako hako huno vigeno osi yasi kano'a aligeta Nitusi umainone. Yasimo'a osi higeno nagola timo amu'nopi hanea kotega Kaliti ko'mo aupate unana Salamone kumala aupa'ale hane. <sup>8</sup> Kaliti limo agegayalega hako hako huta unana nago kuma'mo agia Kanale Ti kahaepatele hu'ya nehaya ti agegayalega euva'yi humainone. Ani agegayalega ala kuma'mo aupate Lasie huno hane.

<sup>9</sup> Hako huta una yafe aya'aya kanagefa katega ne'unageno Yuta vaya'mo'ya kave monesiya kanamo'a ago falote hianagi timo'a ayamufa aigeno Polo'a ani vayafe mage huno hama-paiye, <sup>10</sup> “Nagaya nagesa havuana tipi kalefina

kasageke huta ne'visunageno afeno'yatiene tipi kalene tagaitiene tusiya huno alihaviya tahau-gahie.” huno hamapaiye. <sup>11</sup> Hamapaiyanagi ati vayate kava kanomo'a ani kea havino agupina omaleanagi tipi kalemo ka'yoma'ale'ma ne'alia kanomo kene tipi kalemo nefa kene havino akave malenegi Polo'ma hia kea havino akave omalene. <sup>12</sup> Akave omalege'ya ani kumala tusi'a yasima alia kanafinagi'ya kanale hu'ya maisaya kumala omalege'ya tipi kalema ne'aliya vaya'mo'ya ke huge havige hute'ya “Ani kumala ne'ataleta Finikisia, Kaliti kuma'mo haupalega nagola tipi kalema malesuna kumafe avame huta visune. Ani kumatela yasima alisia kanalela mo maigahune.” hu'ya humainae.

*Tusi'a yasimo hage lina ali haviya humaine.*

<sup>13</sup> Amuko yasimo'a ako huno alige'ya “Kanalelagita ugahunagi afa'a vigetao.” nehu'ya tipi kalema atafa hulino nemaiya yana alisaga hute'ya ani lipi kalea Kaliti limo agegayalega eumainae. <sup>14-15</sup> Ene'vageno Kaliti kumateti tusi'a yasimo'a alino egeta “Eteta ani kumate ugahune.” huta hunanagi ani yasimo'a tipi kalea melino haviya huno aiyahae huno atalegeno ani yasimo'a ayetufegeta emainone. <sup>16-17</sup> Onana nagola hage limo amu'nopi hanea kumala osi kuma'mo avate eumainone. Ani kuma'mo agia Kautae. Ne'onageno yasimo'a osi'a alino laga higeta tusi ali'ya aliya'amo'ya hevayu hu'ya osi tipi kalea alisaga hu'ya ala tipi kalefi malene'ya ani ala tipi kalemo'ma kofa-nafa ohiseafene hu'ya nomo aiyafi nofila kitafa

humalenaē. “Yasimo'a ayetufesigeta Afelika ko'mo ti kahaepatega mo haviya hugahune.” hute'ya anale asai-malenaya kena yasimo'ma ayetu-nefea kena kalu he'ya afepi maletageno yasimo'a ayetu-fegeta emainone. <sup>18</sup> Ne'eta mo faonageno ko'ma neliana timo'a ayamufa'age hige'ya ani lipi kalefima hanea afeno'ya'yaga ali'ya kalemō'a yo'yo huno visiafene hu'ya hage lipi haga'yu haga'yu hu-talenaē. <sup>19</sup> Tagufa (3) kanale tipi kalemō ali'ya yama'a amakai'ami amayapiti ali'ya tipi haga'yu haga'yu hutalenaē. <sup>20</sup> Kasago'ya kanagefa yagene ka'nefi'enena o'agogeno limo'a tusiya huno ayamufa aigeta taugafa aligatisia yafema tametiti nehuna yana ago ataleta “Ani lipi fanane hugahune.” huta maita humainone.

<sup>21</sup> Nehu'ya vaya'yaga aya'aya kanagefa kavela one'ya maigeno Polo'a amu'no'amifi hetino mage huno hie “Nafu'naganagatama tamakaya havi kava hutama hagote'nama tamahapauva kea ‘Kaliti kumala o'atalesune.’ hu'na hua kea ohavinaē. Tamakayama havile'asina ma ma ali haviyama hulatea yana falote ohigeno afeno'yatienena o'va'yagile'asine. <sup>22</sup> Nagi menia tamahanepauve kolia ohutama tokiya vaitama maiho. Tagaipitila nago kanoa ofaligahigi tipi kale'age haviyana hugahie. <sup>23</sup> Nagaya Anumaya Koti nafa'ne mainoanagi'na muki'a kanafina agia alisaga hume hume ne'ogeno meni kegela agai'a ensole kanomo'a navate me hetimaine. <sup>24</sup> Heti-maineno mage huno nahapaiye ‘Pologae kolia ohuo. Kagaya Sisa aulela mo hetigananagino Anumaya Koti'a muki'a mani

lipi kalefi kagai'enema ne'vaya vaya'mogamina amaugafa aligatigahie.' huno nahapaiye. <sup>25</sup> Nahapaiyafe tamakaya muki'amogatama kolia ohiho. Anumaya Koti'a nahapaiya avamete huno ani kate hugahie hu'na nagupi male'na nametiti nehue. <sup>26</sup> Nehuanagi yasimo'a ali haviya hisigeta nagola ti amu'nopi hanea kumate vailagailita ugahune." huno humaine.

<sup>27</sup> Ani tipi kalefina tole sota onageno timo'a ayamufa'age higeta Metiteleniani hage li amu'nopi onageno kege amu'no hige'ya tipi kalefi ali'ya vaya'mo'ya "Kumate uva'yi hugahe aupa nehune." hu'ya humainae. <sup>28</sup> Hute'ya augelifipi amegafi hu'ya nofi'mo atupale tumo tumo yana kana'age ya ayete'ya atalageno tipinaga lavitege'ya alisaga hu'ya agayana augelimo'a aya'aya'amo'a foti'a (40) mita humaine. Nago'ene osi'a utonage'ya ani'a hu'ya tipinaga ani nofila atalet'e'ya agayana ti augelimo'a teti'a (30) mita humaine. <sup>29</sup> Hige'ya "Havigu yafa agupifi visunageno yafamo'a tahaiyafene." hu'ya koli hute'ya fo'a (4) tipi kalema atafa hulino maisia yana tipi kalemo ai'a kapiti tipi atalageno lavi-mainegenon yagemo'a aupa'a eva'yi hisiafene hu'ya nunamuna humainae. <sup>30</sup> Nehu'ya tipi kalefi ali'ya vaya'mo'ya koli hu'ya "Faleta ugahune." nehu'ya osi tipi kalea ali-talageno lipi lavige'ya mage hu'ya vayala ayemavataga hae "Tagaya kalema atafa hulino maisia yana agosisinapalega atalenone." hu'ya ayemavataga humainae. <sup>31</sup> Hageno Polo'a ati vayafe'ene

amakai'ami kava kanomofe'ene mage huno hamapaiye “Mani vaya'yagama ala tipi kalefima omaisayana tamakaila tamaugosamo'a fanane hugahie.” huno humaine. <sup>32</sup> Nage hige'ya ati vaya'mo'ya osi tipi kalema atafa hulinea nofila taga hutalageno osi tipi kalea tipina umaine.

<sup>33</sup> Yagemo'a eva'yi hugahe aupa higeno Polo'a muki'a vaya'mogamife mage huno hie “Tole sotana koli hutama kavela mositama onenagi menia kavela neho. <sup>34</sup> Lokiya'age ke nage gaya tamahanepauve ‘Kavela neho.’ hu'na nehue. Kavela netetama tokiya aligahae. Tamage lamahanepauve muki'amogatama kanale hutama uva'yi hugahae. Nagoke kanoa fanane ohugahae.” huno humaine. <sup>35</sup> Mani kea nehuno maya alino amaulagale Anumayamotega muse nunamu huno havigeteno kolino nemaine. <sup>36</sup> Nege'ya agete'ya amaipamo'a kanale hige'ya amakai'enena ani'a hu'ya kavela ne-mainae. <sup>37</sup> Tagaya lipi kalefima mainona vayala tu hataleti seveti sikisi'a (276) vaya mainone. <sup>38</sup> Kavela nemamu hute'ya tipi kalemo'a kana'agela ohisie hu'ya viti avinayaga tipi ali'ya atalena.

*Tipi kalea ago alino haviya humaine.*

<sup>39</sup> Yagama va'yi hige'ya agayana no'agaya kotega uva'yi hute'ya agayana nagola timo'a moyetageno humainea yatela kanale ti kahaepa hanege'ya agete'ya “Lipi kalemo'a anile aupa'a visie.” hu'ya humaine. <sup>40</sup> Hute'ya tipi kalema atafa hulino nemaiya nofila heka'no hutalet'e'ya ali'ya moli kagi meli kagi nehaya ka'yote kimalaya nofila ali'ya kale'yo humalet'e'ya yasi

alisia kena anale male'ya atafa humalageno tipi kalemo'a aiyayeno ti agegayalega ugahe ne-hie. <sup>41</sup> Vianagi tipina kahaepamo'a ago'yagefa hai-mainea kahaepate haino anifi mo vailino ago'yamona atafa huno tokiya'age huligeno kangela ohuno hanegeni timo'a tokiya'age huno ai'a katega aino kofanafa humaine.

<sup>42-43</sup> Kofanafa hige'ya ati vaya'mo'ya nofi'ma humatenaya vayafena “Hamaesunage'ya falisae. Havigu nago kanomo'a tipiti faleno visigi.” hu'ya hayanagi ati vayate kava kanomo'a Polo'a ofalisia agesa nehavino “Na'a ohiho.” huno hune'ama-teno muki'a tipi nagosa ne'aiya vayafe “Nagosa aitama ti agegayalega viho.” huno humaine. <sup>44</sup> Higeta muki'amogata tipi kalemo'ma haviya hia yosamo ayamufa alita agupile maiteta ayetufeta ti agegayalega umainone.

## 28

### *Polo'a Malata kumate maine.*

<sup>1</sup> Tagaya kanale huta eva'yi hune. Eva'yi huna ko'mo agia Malata kumale hu'ya tahapaigeta havimainone. <sup>2</sup> Ani kumate vaya'yagamo'ya kanale'ya hu'ya ali kayone hulatageta mainonageno kola aiteni yasi'age hige'ya ata kae-malete'ya me lavale'ya ata mo lota hulatenae. <sup>3</sup> Polo'a ata haefusa ha'ya alino ata kaeyana nagola vaya'ma nehaeya osifa'vemo'a ata haefusa ha'yafiti augafa leno amuko higeno hati-lavino Polo ayapi menilage-lage humaine. <sup>4</sup> Menilage-lage hulinege'ya anile maiya vaya'mo'ya agete'ya mage hae “Mani



kanoa vava hamaeno hevai-ne'amatea kanogino hage tipina ofalianagino fatago Anumayamo'a anona'a alisiafe haeyanagino ago faligahie.” hu'ya hae. <sup>5</sup> Hayanagi Polo'a ani osifa'vea alino aye-tafaino atafi ataleteno agaila augafa alino haviya ohigeno afa'a maine. <sup>6</sup> Afa'a maige'ya anile maiya vava'mo'ya augafa halegino asaga hulavino falisiafene hu'ya aya'ayate agava maiyanagi nagola havi yamo'a agaitela falote ohige'ya ete'ya alu amakesa havi'ya mage hae “Agaya nago Anumaya maine.” hu'ya havimainae.

<sup>7</sup> Va'yima huna mopamona aupa'ale hanea kumatela ti amu'nopi kotega kava kanomo mopae. Ani kava kanomo agia Pupiliusi'e. Ani kanomo'a lavaleno noma'alega mo lateneno tagufa (3) kanafi kave yagita huno nelamino yagai-latene. <sup>8</sup> Yagai-lateneno Pupiliusina nefa'a amuko kaliene ai'amo'a tolo ya agea kaliene alino mainegeni Polo'a mo-geteno Anumaya Kotitega havigeno augafale aya malegeni ani kali'amo'a falu hu-tene. <sup>9</sup> Falu hutege'ya nago'a ani kumate kali vava'mo'ya ageno Polo'a kali'amia alino kanale humatene. <sup>10</sup> Alino kanale humatege'ya tagaila kanale kava hulatageta maineta hae-naga'a uгахema hunage'ya tagaila nesuna yama aupa huna yana tamite'ya tipi kalefi ali'ya late-nae.

*Polo'a Lomu kumate uva'yi humane.*

<sup>11</sup> Tagaya tagufa (3) ika ani kotega maiteta nago tipi kalea, ala yasima alia kanafinagi'ya Malata kumate maiya tipi kalea, Alekasatalia

kumateti emaiya tipi kalefi asaga humaita umainone. Ani tipi kalemo ago'yalela tole kuyave netalamogani anamena talo humalenae. <sup>12</sup> Ani tipi kalefima onana Sailakiusi kumate eva'yi huta tagufa (3) kana mainone. <sup>13</sup> Sailakiusi kumala ataleta kagita kagita Legiumi eva'yi huta faenonageno yasimo'a alino aepa hegeta nagoke taula mo faeteta Puteoli eva'yi huteta hati-lavita lipi kalea agola ne'ataleta mopafi emainone. <sup>14</sup> Puteoli nago'a mainaya tafu-taganagamina amakonage'ya mage hae “Tagai'ene nagoke sota maigahae.” hu'ya hageta anile maigeta Lomu kumatela umainone. <sup>15</sup> Katega ne'onage'ya Lomu kumate mainaya tafu-tagana'ya “Katega ne'ae.” hu'ya haya kea havite'ya e'ya nagola Apiusi maketie nehaya kumate me fotu hage'ya nago'a vaya'mo'ya “Tali'a (3) Natu Vaya'mo'ya Nefayaya No'yaga Hane.” hu'ya haya kumate fotu hunageno Polo'a ani vayala amaketeno Anumayamotega muse nehigeno agu'amo'a tokiya'age humaine.

<sup>16</sup> Lomu kumate'ma unana ala kava kanomo'a Polofe “Kanalelagika kagaika'a nopi mainesageno nago ati kanomo'a kava yagaigategahie.” huno humaine.

*Polo'a Lomu kumate Yisasi kanale mono kea huhaleno hamapai-maine.*

<sup>17</sup> Polo'a tagufa (3) kana maiteno ani kumate mainaya Yuta soka vaya'yagahe ke hige'ya melitalu hageno mage huno hamapaiye “Nafu'naganagatama nagaya tagaiti nofi vaya'mogami'ene taginagomo'ya

humainaya kava'ene ali'na haviyana ohunoanagi Yelusalemu nofila hunatete'ya Lomu vaya amayapi natenae. <sup>18-19</sup> Lomu vaya'mo'ya ke'nima haviyana nagaipina nago'a nahaesage'na falisua ke'nia omalege'ya natalegahe hayanagi Yuta vaya'mo'ya ani kehena 'A'ao' hu'ya haya yafe nago'ma visua kani'a omalege'na 'Sisa kaiyeke'nia havisie.' hu'na humainoanagi nagai'ni nofi vayala kaiyeke humatesua yana omalene. <sup>20</sup> Mani kema tamahapaisuafene hu'na ke hugetama age'na tamahanepauve Isaleli vaya'mo'ya amametiti hu'ya agava mainaya kanomofe havi'na nagupi malenoa yateti nofila hunatenae." huno humaine. <sup>21</sup> Hige'ya ani soka vaya'mo'ya Polofe mage hae "Nago'a Yutia vaya'mo'ya kagaifena avona kae'ya tamigeta ohavinone. Nago'a vayatimo'ya tagaite e'ya ke hagea nagola havi kava'ma humainana kea me lahaopainae. <sup>22</sup> Tahaopainagi muki'a kotegati vaya'mo'ya Yisasina amaku'a aminaya vea'mogamifena 'Havi kava mai'ya nehae.' hu'ya hagea ago havimainonagi menia kagaika'a kagu'afiti hisana ke havigahune." hu'ya humainae.

<sup>23</sup> "Na kanale havigahune." hu'ya hapali-malete'ya ani kanalela muki'a vaya'yaga Polo'ma mainea nopi me-litalu hageno Polo'a natema aepa heno Anumaya Koti'a kava yagai-matesia kea hamanepaino Anumaya Koti'ma Yisasina hutegeni emainea kanomo kea Mosese kae-malenea kefiti'ene Anumaya Koti amaune vaya'mo'ya kae-malenaya kefiti'ene

amakaila amaku'a alino hetisige'ya Yisasife havi'ya amakupi male'ya amametiti hisayafene huno huge huge nehigeno yagemo'a lavi fale-maine. <sup>24</sup> Polo kea nago'a vaya'mo'ya haga ne'ya amakupi malenagi nago'a vaya'mo'ya amakupina ali omalena. <sup>25</sup> Alu amaku amakesa havi'ya mohu mehu hute'ya ugahe nehigeno Polo'a mage huno hamapai-maine “Alu Aotage Avamu'mo'a tamage huno Aisaiyana hapaigeno Aisaiya'a, aune kanogino, taginagomogamina mage huno tamage hamapai-mainene.

<sup>26</sup> Kagaya mage huka vea'mogamina mo hamapaiyo ‘Tamakaila tamakesamo'a havime havime haigahayanagi ani kemona aepa'a havilama hutama ohavigahae. Tamaulagamo'a kasago'ya yupa ageme ageme haigahayanagi nago yana agelama hutama o'agegahae. <sup>27</sup> Mani kemona aepa'ama havisaya amaku amakesa omale vea'ne mainae. Mani kema ohavisayafene huno amakesamo'a ago tile-mainene. Amaulagamo'a ani'a huno ‘O'agesae.’ huno ago asu humaine. Mani kea amakesamo'a havisigeno amaulagamo'a agesigeno amaku'a aiyahae hu'ya nagaitega esage'na ali hilato humateyafene.’ huno hige'ya.” kae-malenayane.

<sup>28-29</sup> “Anumaya Koti'a mani kea tamakinagomogami'ene tamakayaenefe lamaha-pai-mainenanagi tamakaya lamakave'no hutenagi haviho Anumaya Koti'a anima lamaku tamamema aligatisia kea Yuta vea'ne omainaya

veafe ago humateneanagi'ya ani vea'mo'ya havigahae.” huno humaine.

<sup>30</sup> Polo'a nago nona miya huteno ani nopi tole kafu maineno agaitegama aya veala kanale'ya humatene. <sup>31</sup> Hune'amateno Anumaya Koti kava yagaimatesia kea huhaleno hamanepaino Anumayati Yisasi Kalaisi kanale mono kea huge amavelige huno kea hulokiya vaino hige'ya nago'a vea'mo'ya “Na kea ohuo.” hu'ya kahegi o'atena.

**Anumayamo'a Haegafa Alino  
Hagelafilatenea Kea  
The New Testament in the Kanite Language of Papua  
New Guinea  
Nupela Testamen long tokples Kanite long Niugini**

copyright © 2002 Wycliffe Bible Translators, Inc.

Language: Kanite

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2021-04-21

---

PDF generated using Haiola and XeLaTeX on 11 Nov 2022 from source files dated 30 Nov 2021

55807fd5-1005-5405-89da-5533a7950c65